

eInjiri imbu bwakianga
Ruka
waandika yo

Comité de Traduction de la Bible en Langue Kinyanga

République Démocratique du Congo

L'Evangile de Jésus-Christ selon Luc en Kinyanga

Publié sous le titre

eInjiri imbu bwakianga Ruka waandika yo

ISO 639-3: nyj

République Démocratique du Congo

© 2021 Comité de Traduction de la Bible en Langue Kinyanga

Première édition d'essai 2021

En ce qui concerne les illustrations:

Illustration aux pages 66 et 68 par Louise Bass

© The British & Foreign Bible Society, 1994.

Illustration aux pages 4, 10, 15 et 56 par Darwin Dunham

© United Bible Societies, 1989.

Illustration à la page 70 par Horace Knowles

© The British & Foreign Bible Society, 1954, 1967, 1972, 1995.

Illustrations aux pages 7, 9, 11, 12, 19, 29, 31, 32, 35, 41, 54, 62, 64, 75, 78, 82, 83, 84, 87 et en couverture par Graham Wade © United Bible Societies, 1989.

Ihano kuri ōngo ng'usomange ekitabo kino

Mu kitabo kino, ukúsungă mo binwa bimă mbi byebwange bumpe kukwinu, burî «kwabesenga» bampe mbu «kwabesanga» abe «nensi» na bampe mbu «nenki», «bushwa mbu» bampe «bushwe mbu», «nge» bampe mbu «ngi»... Nampo usibanga mbu ebiti mbyo nge butumba bw'ekinyanga. Bushwa mbu kusira mwebe ngu webwanga buma mu sankaro siti s'echuo. eKinyanga chaandikwa mbu bwatushéa erufabe rwa cho. Umisumya isoma ekitabo kino, ukúsiba binwa bingi mbi byabesengă bitangasomanga ōngo.

eKinyanga mwebe uma mu myebe y'eBabantu bushwa mbu kírí na binwa mbi bisondange isusana na ntíbyatura mwasi uma itukana n'efwayere. eKinyanga kírí na bikoe binye: kikoe chataya (´), kikoe chahita (˘), kikoe chataya n'ihita (ˆ) nanchi chahita n'itaya (˘). Buna «bibí/bíbi/bíbí», «muronge/muróngé», «kúti/kúti, kâni/kâni», «wendanga/wendángă/wéndanga», «Ongo/ōngo», «mwaka/mwăka, kúno/kúno», twabikira byo mbu mayari.

Mu rufabe rw'eKinyanga murikire mirenge 31: fwayere 7 na konsone 24. Kuri fwayere sibi nsi ntí saandikwa nguru bushwa mbu ito sisusange burî sishasha kuri eBanyanga, ina murisoma ukúteerera mbu /i/ na /u/ sasanguha nakiro mbu saandikwa /i/ na /u/ mu kinwa nchi kisirá mo iyari.

Kinsi kinwa kírí n'ekiteerere ch'enkekeni () chashea mbu ekinwa ncho chansonsomorwa hende n'ekitabo kino. Na kinsi binwa birikire mu [...], ngerieba mbu emukororo ngo usira mu bitabo bimă bya karekare by'eBibiria. Nampi hasesunga ōngo emitiro a, b, c, ngerieba mbu ekinwa chansonsorwa hisikwa n'ekaratasi nki kasomange ōngo.

Muribundura ekitabo kino cha Ruka mu Kinyanga, twabeseyo tukoreshange eBibiria y'eKikiriki hima na Bibiria bya impě myebe. Twabeseyo tukoreshange na bitabo mbi byiturángé emyasi y'eBibiria. Twakoreshayo hotu na impě mirimo nji yaronjiwanga karekare n'ebikembe mbi byabuchángă ibundura eBibiria mu mwebe w'eKinyanga. Ebikembe bya Seed Company na SIL-ECG hima-hima na Banyanga bingi nge baktusakenga muribindura ekitabo kino cha Ruka mu Kinyanga.

Ebabunduri b'eBibiria mu Kinyanga



eInjiri imbu bwakianga Ruka waandika yo

Ntangiro

eInjiri imbu bwakianga Ruka waandika yo, iyo kitabo kimã mu bitabo binye byaroso munkati n'eRirai Rishasha imbi byatura ebuingo bwa Yesu n'ebinwa biti mbi byakoranga we. Mu bitabo binye mbyo, kira kima chabikirwa mbu «Injiri», nge rieba mbu «Mwasi Wakonda». Ebitabo mbyo byaandikwángá kuruma n'erikwa ra Yesu.

Matayo, Mariko, Ruka na Yohana nge baandikanga ebitabo mbyo. Ruka ntw'aandikanga ho bushwa n'ebuingo bwa Yesu n'ebinwa mbi byakoranga we, ina waandikanga hotu ekitabo ch'emeta abi inchi chabikirwa mbu «Mikorere y'esantumwa». Ekitabo ncho chatura ebinwa mbi byakoranga ebanafunsi ba Yesu kuruma n'erikwa n'erifuka, n'erikuruka ra Yesu mu mbingu.

Kusira mwea wosi shu ematu ngi aandikwanga eInjiri ino ya Ruka, abe impi haandikirénga we yo. Ina basomi bingi basimirana mbu yaandikwanga buna mu mwaka we 70 kuruma n'eribútwá ra Yesu Kirisitu.

Ruka nge mwandiki w'eInjiri ino, wabesenga hotu munganga (Bakorosai 4.14). Eburenga bw'erieba rae emwebe kumunda n'ekitabo kino bwashéá mbu Ruka wabesenga wasoma masomo a kwiyo nguru.

Ruka wahunanga iandika shǔ-shǔ ebinwa bushwa n'ebuingo bwa Yesu n'ebinwa mbi byakoranga we n'ieba mbu bwetángá byo kongo bampe bakasanirwa murisoma byo (Ruka 1.1-3). Ruka ntí wabesenga Muyuta, ina waandikanga imbu bwamukía enti Muyuta wamukochá irukira. Ekinwa ncho chasungwa shǔ-shǔ mu ntambi nji iturange we ekutime y'eBayuta (Ruka 1.8).

eInjiri imbu bwakíánga Ruka waandika yo, iyo kitabo chasusana n'ebitabo bya Matayo na Mariko imbu bukiange ebitabo bino byatura ebinwa mu inse sasusana, nakiro mbu byarengana kakeke.

Mu bitabo bino binye, ekitabo cha Ruka chisine ngi chatura nguru emyasi y'eribútwá ra Yohana Mubatisai. Ruka wisimike nguru mu binwa mbi byakae emusasiro (Ruka 3.3; 11.4; 17.3-4; 23.34) nambi byeba bushwa n'emahemo (Ruka 3.21; 5.16; 6.12; 11.1-12; 22.32).

Emutondeko w'ebinwa

1. Entangiro n'echasingwa eInjiri ino yaandikwa 1.1-4
2. Emyasi y'eribútwá ra Yesu n'ematarisho emurimo wae 1.5—4.13
3. Emahano a Yesu n'ebishisharo byae 4.14—21.38
4. Erikwa, erifuka n'erikuruka ra Yesu mu mbingu 22.1—24.53

Ntangiro y'emyasi ya Yesu Kirisitu

1 ¹Emukwakare Teofire, bea bingi bakwereká iandika emyasi y'ebinwa byetángá munkati nitu. ²Bakuandika yo ímbu bwaturirwanga bate yo nãmbi barukirangá yo raroso, na nge baninkwangá emurimo weritura emwasi wa Ongo. ³Ngyasingwa nani hotu nakúkíanga namasibirira emwasi shũ-shũ, nasungá nti rakomenwa nikuandikiri óngo mukwakare Teofire. ⁴Namaronja mbo kongo usiba eríira r'ebinwa byahanwangá óngo.

Maraika waturá ebusebutwa Yohana

⁵Mu matu abesenga Herote mubake w'echuo cha ku Yundea, kwabesenga kuhani* umă nt'ubikirwange mbu Sakaria, wa mu kikembe ch'ebakuhani ba Abiya^a na mukari Risabeti nti wa mu ruanda rw'ekuhani mukiri Aroni. ⁶Ebati bábí babesenga bea baombokara mu makako a Ongo. Babesenga nti bamísá shu emyomba n'emiko iti ya Nyere kuritu. ⁷Ina nti basirá mwana, bushwa mbu Risabeti nti ngumba nabo bábí nti bamakunguha nguru. ⁸Otu rumă, Sakaria wabesenga ukorange emurimo wae mu makako a Ongo, bushwa mbu erotu ndo rwabesenga ukóro rw'ekikembe chábó. ⁹Itukana n'emwenjo w'ebakuhani, Sakaria ngwáronдорwa mu mishari mu rikime mu Numba ya Ongo* isacha mo emwaka. ¹⁰Mu ntambi Sakaria wabesenga usachange emwaka, ebea bati basia habutara bahemange. ¹¹Nampo maraika* wa Nyere kuritu wásaire Sakaria, wásimana mu ruharo rw'ekwabume rw'ebutanda bw'erisachie emwaka. ¹²Sakaria, mu rimusúnga wísarima, wátangirwa na böba. ¹³Ina emaraika wámwire mbu: «Sakaria, angisubaha, Ongo wamarukira emahemo abe. Mukari wabe Risabeti wasekúbute mwana wabume na ukúmuninkă rina ra Yohana. ¹⁴Ukúbésě na ngoa hima n'imoa ringi, na bea bingi basemoere eribútwá rae. ¹⁵Bushwa mbu wasebese mukwakare mu makako a Nyere kuritu. Watômuyo ndifai* abe mau ati-ati. Waserisayo Mutima Washurukara

^a 1.5 Abiya wabesenga mukwakare wa meta munani mu kikembe ch'ekuhani Sakaria. Soma 1Biranga 24.7-18.

itukire mu bura bwa nina. ¹⁶Wasekuruchayo bingi b'ebana ba Isiraeri kuri Ongo wăbó. ¹⁷Wasesondore erieya ra Nyere kuritu na nti ũri n'emutima hima n'emaa buri emutahwa Eria, kongo waronganya tu ebana na bishe bábó. Wasebutwa hotu kongo wabindura ebakwemi ebatinangă ebinwa bya Ongo,^b kongo bábése na bwenge buri bea bakomenwa mu makako a Ongo. Nampo wasetunganyieyo Nyere kuritu uanda rwakonda indu rwámurindirá.»

¹⁸Ina Sakaria wáshísha emaraika* mbu: «Kinki chashenisheayo mbu ebinwa bino by'íira? Bushwa mbu ani na mukari'ani twamakunguha nguru.» ¹⁹Maraika wámusako mbu: «Ani nge Kaburieri,^{ch} ani nge nisimananga mu makako a Ongo! Iwe ngwanitú má ikutúre emwasi uno wakonda. ²⁰Ebinwa mbyo biseberererayo mu matu abyó, ina bushwa mbu nt'ukusimira byo, ukúbésě karumbu. Utukochiyo ieba ieya n'erotu indu rusekiayo ebinwa bino byabererera.»

²¹Mu ntambi njo, ebea mbi babesenga barindira Sakaria hambuka bashishara bushwa n'erísía rawe mu Numba ya Ongo*. ²²Warekia wasaa mo, wafundwa ieba nabo. Ina bushwa mbu iwe ngé karumbu, wabucha ieba nabo na mine, basiba mbu wakusunga kiasha kumunda n'eNumba ya Ongo.

²³N'ematú a Sakaria erikora arekia ásira, wákuruka kukwae. ²⁴Kuruma na matu makeke, mukari Risabeti wabese murito. Wámana myéri isanu ntwasaa-saanga ekumbuka, ntwebange mbu: ²⁵«Mukai byakonda ebyamanikore Nyere kuritu! Wamanikuto nkene munkati n'eměso ebea.»

Maraika waturá ebusebutwa Yesu

²⁶Ebukure bwa Risabeti bwarekia bwarengékă myéri mutuba, Ongo watúma maraika* Kaburieri ku Nasareti, ubungu rumă rwa ku Ngariraya. ²⁷Wámútúma kuri kitasa kimă nge Maria. Ekitasa ncho chabesenga nti nge muchúmba wa Yosefu, mushúkíra umă w'ekisasa ch'emubake Ndauti. ²⁸Emaraika ngo wéyere Maria mu mwabo n'imwire mbu: «Nakukea, ōngo urishée nchumo ya Ongo! Nyere kuritu ũri hima nabe.»

²⁹Maria wáshishara mu kinwa ncho, waanikira mu mutima wae mbu: «Nkei ya buni ino?» ³⁰Maraika* wámwire mbu: «Usubahi, eMaria, bushwa mbu umashée nchumo kwa Ongo. ³¹Ukúríá bukure, ukúbută mwana wabume, na ukúmuninkă rina nge Yesu. ³²Wasebese mukwakare, wăbikirwa Mwana wa Ongo íngu ũri hiyo n'ebítí. Nyere kuritu Ongo wasemuninkayo ekitumbi ch'ishiku Ndauti. ³³Iwe nge usesimanireyo ebea ba ku Isiraeri ematu ati, n'ebwami bwae butabesiyo na ngendero.» ³⁴Maria wáshísha

^b 1.17 Soma Maraki 3.23-24. ^{ch} 1.19 Soma Ndanyere 8.16; 9.21; Ruka 1.26.

emaraika mbu: «Ekinwa kino chasebese buni na ntĩnosi wabume?»
35 Emaraiika wámusako mbu: «eMutima Washurukara usekuhite, n'ema a Ongo íngu uri hiyo n'ebĩtĩ ase kubumbe buri kirumbirumbi. Ngyasingwa, emwana wasebuta ōngo wasebese Washurukara, wasebikirwa mbu Mwana wa Ongo. **36** Rukira! Risabeti w'eruanda rwabe nae ngie murito, wasebuta mwana wabume nakiro mbu wamakunguha nguru. Iwe ngu wabeseyo ubikirwange mbu ngumba ngie uri na bukure bwa myeri mutuba. **37** Bushwa mbu kusira kinwa kihundusangā Ongo.»



Emaraika wasaire Maria (1.28)

38 Nampo Maria wéba mbu: «Ani mukobe wa Nyere kuritu, kai bibesĩ ímbu bwameba ōngo!» Kuruma nampo, maraika wēnda rae.

Maria wendá katangura Risabeti

39 Mu matu a, Maria wásimana n'ienda tete mu chuo ch'esangu, mu rubungu rumā rwa ku Yundea. **40** Wákime mwa Sakaria n'ikea Risabeti. **41** Entambi Risabeti warukiranga enkei ya Maria, emwana witenja-tenja mu bura bwa Risabeti, nampo warísíwa n'eMutima Washurukara. **42** Wéba mu murenge mukiri mbu: «Ongo wamakukasane irénga ebamína bati, n'emwana wasebuta ōngo nae hotu wakasanírwá! **43** Ani inyé murihierwa na nina wa Nyere kuritu mu mwani? **44** Bushwa nākukía narukira emurenge w'enkei yabe mu mate āni, emwana witenja-tenja na ngoa kumunda n'ebura bwani. **45** Ukasánirwa ōngo bushwa umārisíá mbu ebinwa byakweba Nyere kuritu bisebererera!»

Erumbo rwa Maria

46 Ngerikia Maria wéba mbu:

«Emutima wani wátatirisá Nyere kuritu,

47 Namooere Ongo,
Muramya wani;

48 Bushwa wamanikwire bonso ani mukori wae.

Mu ríira, itukire enompena, ebea bati basembikira mbu nakasanirwa,

49 bushwa mbu Ongo Miné Maa wamanikore binwa bikiri.

Erina rae rashurukara ho!

⁵⁰ Na wasenda ukwírengi bonso
ebámusubaha b'esankiso siti.

⁵¹ Wamakoresha emaa ae mu rikoresha ebunkangwe bw'emömbó wae,
wamansansabanya ebari n'emutima w'engári.

⁵² Wamakuto ebami mu bitumbi byábó,
n'itúmbía ebihoea.^e

⁵³ Wăkusukucha ebakwa rwaka,
ina wákukurucha ebatúmbá kobokobo.

⁵⁴ Wakweya kásake emukori wae Isiraeri
na ntí wakóbya imukwire bonso,

⁵⁵ ímbu bwarananga we na batitanku bitu, ietere
kuri Iburahimu n'erubuto rwa ematu ati.»

⁵⁶ Maria wámana kwa Risabeti myéri ishatsu, kuruma nampo wákuruka
ku kwábó.

Eribútwa ra Yohana Mubatisai

⁵⁷ Entambi ya Risabeti y'eribúta yakia yarumirá, wabuta mwana wabume.

⁵⁸ Ebanunsane na banachabo, barekia barukirá bwakukwíré Nyere kuritu
Risabeti bonso, bamo a hima nae. ⁵⁹ Kuruma na matu munani, banachabo
bêya kamonesha^f emwana. Bahuna imuninka erina r'ishe Sakaria. ⁶⁰ Ina
nina wátina mbu: «Ntí mbo, erina rae nge Yohana.» ⁶¹ Bamwíre mbu: «Ina
kusira mwea mu ruanda rwabe uri n'erina ndo!»

⁶² Basime ishe w'emwana mu rimushisha watikă erina rashimae kuri
emwana e. ⁶³ Sakaria wakonga bo kisaí, na waandika mu cho mbu: «Erina
rae nge Yohana.» Ebati bisarima. ⁶⁴ Hiha-hiha ebunú bwa Sakaria bwoboka,
wabucha tu ieba n'itata Ongo. ⁶⁵ Ebea bati imbi babesenga nko batingirwa
na böba. Emwasi ngo wánsansabana mu sângu siti s'echuo cha ku Yundea.
⁶⁶ Ebati mbi bárúkírángá emwasi ngo bâníkira na kwishishirisha mu
mitima mbu: «Emwana uno wăbeseyo buni?» Bushwa, mu rííra, emaa a
Nyere kuritu abesenga hima nae.

Erumbo rwa Sakaria

⁶⁷ Sakaria ishe w'emwana warísíwa n'eMutima Washurukara, n'ibucha
ihurukwa, n'ieba mbu:

⁶⁸ «Watatwe Nyere kuritu, Ongo wa Baisiraeri,
bushwa mbu wamasake ebea bae n'ishukaya bo.

^e 1.52 Soma Yubu 5.11; 12.19. ^f 1.59 Soma Barawi 12.3.

- 69 Wamaturishie Rukombora miné bunkangwe,
itukire mu ruanda rw'emukori wae Ndauti.
- 70 Nge bwebángá we karekare mu mǎnũ ebatahwa* bae bashurukara mbu
- 71 wasetutúmiroyo íngu usetushukayayo mu mine y'ebarenda bitu
na mu mine yambi ebatubaangǎ.
- 72 Waraangá mbu wasekwireyo batitanku bitu bonso;
n'isubukia erirai rae rashurukara,
- 73 nge chaserenga we kuri titanku witu Iburahimu mbu
- 74 wasetushukaya mu mine y'ebarenda bitu,
kongo twamukore na nti tusira böba,
- 75 na tushurukare n'ibese n'iombokara mu makako ae
ematu itu ati.^h
- 76 N'ongo, mwanani, ukubikirwǎ mutahwa* wa Ongo íngu uri hiyo
n'ebítĩ,
- bushwa ukũsondorě Nyere kuritu mu rimutunganyie ênse,
- 77 na kongo usubukia ebea bae mbu waseshukaya bo
n'isasira esansambi sǎbó.
- 78 Íra, Ongo witu urisere nchime na burongu,
waturebeki chaka ituka ko kwiyo.
- 79 Washéi bo chaka imbi barerika mu mwirimya n'ebahendwange
n'eroku,
kongo watushéa imisa ense y'ebuhoro.»
- 80 Emwana ngo wabesenga woshukange na maa emutima. Wênda karika
ínkũ ekusira bea ieya n'erotu rw'ishéangá we kuri Baisiraeri.

Eribátwa ra Yesu

(Matayo 1.18-25)

2 ¹Mu biranga mbyo, Kaisari^a Okisito wa ku Roma wakuto momba mbu baanse ebea b'ebuyo biti byasimanire we. ²Emwanso ngo nge waroso waronjiwanga, mu matu Kurenio nti nge wasimanire echuo cha ku Suria. ³Ebea bati bênda kiandikisha kira mwea mu rubungu rwae rw'ebubutwa. ⁴Yosefu nae wátuka mu rubungu rwa ku Nasareti, mu chuo cha ku Ngariraya, n'ienda mu chuo cha ku Yundea mu rubungu rw'emubake Ndauti, erubikirwange mbu Beterehemu. Wendángá nko bushwa wabesenga umǎ mu bǎna b'eruanda rwa Ndauti. ⁵Wênda kiandikisha nko hima na Maria muchúmba wae, na nti murito. ⁶Barekia

^h 1.75 Soma Ntangiyo 22.16-17. ^a 2.1 *Kaisari*: Rina ra kinsi mwami wasimanirenga echuo cha ku Roma.

bárfi ku Beterehemu, ematu ae erikwikokora árumira. ⁷Wabuta mwana, entangi yae. Wamubumbe byeri n'imuraamya mu muringa w'eririshíe esanyama, bushwa bárukwángá buari mu nkambi y'ebeni.

Maraika wasáíré ebasumba

⁸Na mu chuo ncho, kwabesenga basumba mu michacha nti barangangá ebituana byábó mutu. ⁹Maraika* wa Nyere kuritu wásaíre bo nsisu, na chaka ch'ebusime bwa Nyere kuritu chabumbe bo. Nabo basubaha nguru. ¹⁰Ina emaraika wére bo mbu: «Anga musubaha, bushwa naburishie Mwasi Wakonda eusekokomya nguru ebea bati. ¹¹Runotu runo Rukombora wamabutwa bushwa banu mu rubungu rwa Ndauti, iwe nge Kirisitu* na nge tu Nyere kuritu. ¹²Na mukûmuteerera buno: mukûkumana ekabonsobonso kabumbírwa mu byeri na nti kekinde kumunda n'emuringa w'eririshíe ebituana.»



Emaraika wasáíré ebasumba (2.9)

¹³Nampo hasúngwa kikembe kikiri cha bamaraika* ituka mu mbingu, bákúmána emaraika ngo, nti batatange Ongo n'ieba mbu:

¹⁴«Ongo watatwe mu mbingu,
na buhóro mu chuo kuri ebea mbi ebashima we.»

Ebasumba benda ku Beterehemu

¹⁵Ebamaraika* barekia bamakuruka mu mbingu, ebasumba babucha ierane mbu: «Eo, twéndí ku Beterehemu kongo twasunga echakusaa ko, inchi echakutwire Nyere kuritu.» ¹⁶Nge bumbo, benda tete, bákúmána

Maria na Yosefu, n'emwana wikinde mu muringa w'eririshé mo ebituana. ¹⁷Barekia bamasunga ekabonsobonso, batura emyasi nji yakiana emaraika wére bo bushwa n'emwana ngo. ¹⁸Ebea bati mbi bárúkírángá emwasi ngo ewaturanga ebasumba, bashishara. ¹⁹Ina Maria iwe, warangángá ebinwa biti mbyo kumunda n'emutima wae n'ianikira mu byo nguru. ²⁰Nampo, ebasumba bákúrúka nti batatange Ongo n'imumoe bushwa n'ebinwa biti ebyarukiranga bo n'ebyamasúngá bo, bushwa mbu ebiti byakweta ímbu ebwaturirwanga bo byo n'emaraika.

Emwana waninkwa rina ra Yesu

²¹Emwana warekia wamarúmísha matu munani wabutwa, bámumónésha.^b Bámunínka rina mbu nge Yesu. Erina ndo nge raninkwanga we n'emaraika*, nina nti tínensi murito.

Yesu washeiwa mu Numba ya Ongo

²²Ematu erihoswa^{ch} ra Maria na Yosefu akia arumirá, itukana n'ebweba emyomba ya Musa, benda n'emwana ku Yerusaremu kongo bámunínkána kuri Nyere kuritu. ²³Bushwa raandikwa mu Myomba ya Nyere kuritu mbu: «Kinsi ntangi ya muyu iseninkanwayo kwa Nyere kuritu.» ²⁴Basibura tumpite túbí na byana bíbí bya pisho ímbu bweba emyomba ya Nyere kuritu.

Ebutahwa bwa Simioni

²⁵Mu matu ngo, ku Yerusaremu kwarikanga mwea umă wabikirwá mbu Simioni. Emwea ngo wabesenga waombokara na ntwasubaha Ongo. Wabesenga urindirengi na mbusha y'erisunga erishukara ra Baisiraeri. eMutima Washurukara nti uri hima nae, ²⁶wabesenga wamamushea mbu iwe watákwi kuba nensi ntí wasúngá Kirisitu* íngu usetúmwayo na Nyere kuritu. ²⁷Simioni wénjiwa n'eMutima Washurukara mu Numba ya Ongo*. Ebuti ba Yesu bámurisha mo kongo bámuronjee ímbu bweba eMyomba. ²⁸Simioni wángirira emwana Yesu mu mine, watata Ongo, wéba mbu: ²⁹«Eo ke Nyere kuritu, umabereresha ebwaraanga öngo, ngíe umanirekě ani mukori wabe nikwe rani mu buhóro, ³⁰bushwa namisungire ani kisine emuramya watuká kuri öngo,

^b 2.21 Bayuta babesenga bamoneshangá emwana w'emuyu erotu rw'emunani wabutwa. ^{ch} 2.22 Soma Barawi 12.1-8. ^e 2.23 Soma Ituka 13.2.

31 *ingu* watayarishanga *öngo* mu
makako ebea bati,

32 na ngo Muramya ng'usebeseyo
echaka ch'ebuyo,
nae ngwaserishayo ebusime
mu bea babe Baisiraeri.»

33 Mu rirukira ebinwa mbyo
ebye bange Simioni bushwa n'emwana,
ebabuti ba Yesu bashishara. 34 Simioni
wakasane bo, wére Maria, nina
w'emwana mbu: «Emwana uno
wamabutwa kongo wakíría n'isimanya
bea bingi ku Isiraeri. Wasebese
kiteerere chatuka kwa Ongo
ekisetinwa n'ebea, 35 kongo emihaki
y'ebea bingi eyarebiswa itabukaré. Na
öngo Maria, ukúrukirayo bwae buri
mwea wasoswá itumo mu mutima.»



Simioni waangirira Yesu (2.28)

Emutahwa Ana

36 Kwabesenga mutahwa* umă mumína, erina rae Ana, kikumí cha
Fanueri, w'eruanda rwa Aseri. Wabesenga nti wamakunguha nguru.
Warikanga na moke myăka irında ho itukire babingana. 37 Kuruma nampo,
wamana myăka makumi munani na inye mu bushumbakari. Wárika mu
Numba ya Ongo* nti umukorengi mutu na mumwishi, nt'urekenga ebió
na nti uhemange. 38 Wêya mu ntambi njo, wabucha itata Ongo. Wátura
emyasi y'emwana kuri ebea bati ebabesenga barindirengi ímbu busekíayo
Ongo washukaya ebea ba ku Yerusaremu.

Ebabuti ba Yesu bakuruká ku Nasareti

39 Ebabuti ba Yesu barekia bamakinda ironja ímbu bweba eMyomba
ya Nyere kuritu, bakuruka hima nae mu chuo cha ku Ngariraya, mu
rubungu rwabo rwa ku Nasareti.

40 Emwana ngo wabesenga woshukange n'ibese na maa, nti urisere
butésá, n'enchumo ya Ongo yabesénga hima nae.

Yesu mu Numba ya Ongo

41 Kira mwăka, ebabuti ba Yesu nti bendangă ku Yerusaremu mu rotu
rukiri rw'ePasaka*.

⁴²Yesu warekia wabese na myăka ikúmi na ibi, wênda hima nabo ekunkumanano y'erotu rukiri itukana n'emwenjo w'eBayuta^f. ⁴³Ematu ePasaka arekia ameta, bákúruká ku kwabo, ina emwana Yesu iwe wasia ku Yerusaremu n'ebabuti bae nti tíbósi. ⁴⁴Babesenga bânikirange mbu kúti uri hima nămbi ebendanga nabo. Barekia bamēnda uendo rw'otu rumă, babucha imusondekanyie kuri banachabo na kuri mbi bamosi. ⁴⁵Ina bushwa ntí bamusungángá, bákuruka tu ku Yerusaremu nti bamusondekanyange. ⁴⁶Kuruma na matu ashatu, bāmukúmana mu Numba ya Ongo*, ntwarika munkati n'ebahani b'eMyomba, nti urukirange bo n'ishisha bo binwa. ⁴⁷N'ebati mbi bāmurúkírángá bashishara mu risúnga ebwenge bwae n'emisubyo yae. ⁴⁸Ebabuti bae barekia bamamusunga, bashishara nguru. Nina wamushisha mbu: «Emwana'ni, bushwa nki utukóré biri buno? Ani na iso twamakusonda na nti twatingirwa na koha.» ⁴⁹Yesu wásako bo mbu: «Banu munisonderengi inki? Nti banu mosi rero mbu rakomenwa nibesi mu numba ya Tita?» ⁵⁰Ina batateereri ekinwa ncho chakianga wére bo.

⁵¹Ngerikia ke Yesu wákuruka hima nabo ku Nasareti, wênderana irúkire bo. Nina wabesenga nt'usubukianga ebinwa biti mbyo kumunda n'emutima wae. ⁵²Yesu wênderana ibese na butésá, nti woshukange n'ikokomya Ongo hima n'ebea.



*Emwana Yesu usishanange ebakwakare
binwa mu Numba ya Ongo (2.46)*

^f 2.42 EkuBayuta, emwana wamarúmisha myăka ikumi na ibi, nti tí mwana tu. Nge rieba mbu ngié wamukomenwă ieya hari ebamakunguhe mu binwa bya Ongo.

Emahubiri a Yohana Mubatisai

(Matayo 3.1-12; Mariko 1.1-8; Yohana 1.19-28)

3 ¹Mu mwāka w'erikumi n'isanu w'ebwami bwa Tiberio mubake wa ku Roma, ebakorangá nae nge bano: Ponso Pirato nti nge wasimanire echuo cha ku Yundea, na Herote nti nge wasimanire ku Ngariraya, na musike wǎbó Firipo nti wasimanire echuo cha ku Iturea na cha ku Taroniti. Risania nae ntwasimanire echuo cha ku Abirene. ²Anasi bána Kayafa nabo babesenga nti nge bakuhani bakíri*. Mu matu ngo, Ongo wanínka Yohana musike wa Sakaria ekinwa chae nti uri munkati n'ebweru. ³Yohana wetana mu byuo biti bya mwendende erusi Yorondani, nti uhubiringi eMwasi Wakonda. Wére ebea mbu: «Múbunduké kongo mureke esansambi sinu, mubatiswe, na Ongo wasebusasira.» ⁴Nge bumbo, ebinwa byabererera ebyaandikanga mutahwa* Isaya mu kitabo chae mbu:



Yohana uhubiringi ebea (3.3)

«Murenge wa mwea ukuange mu bweru mbu:

«Mutunganyanye ense ya Nyere kuritu, muombore ekusetayo we!

⁵Kira mpúkú isebumbirwa.

Kira ntata na kira ou biserengechiwa.

Esanse saomba-omba siseomborwayo,

n'esânse s'ebiribu sisebumbirwayo.

⁶Kira mwea wasungi ímbu bukíanga Ongo washukaya.»

⁷Nampo bea bingi beyerengá Yohana wabatise bo. Nae wére bo mbu: «Banu muri buri nsoka! Banu muhakange mbu mumakocha ibeka ebusubuke bwa Ongo ímbu bweyange? ⁸Kai mwendi mushea mu mikorere mbu mumabunduka mwireke esansambi sinu. Kiro mwendi mwitata ho mbu Ibrahimu nge titanku winu. Nibwirengi mbu Ongo wamúkocha ibundura emakoi ano abesi bána ba Ibrahimu! ⁹N'enompena, emwandá

ngié uri hitina n'emití. Kira mutí íngu ntwabútá byuma byakonda usekerwa n'itawa munkati n'ekashá.»

10 Ngerikia ke ebea bamushisha mbu: «Túkié ke buni?» **11** Nae wásako bo mbu: «Kinsi ngu uri na nchangi sibi waninkane nima kuri íngu usira kikai, nǎngu uri na bió nae wakié hotu búbo.» **12** Batuanyi ba horo nabo bamwiyere hotu kongo wabatisa bo. Bamushisha mbu: «eMuhani, túkié buni?» **13** Na Yohana mbu: «Kiro mwendi banu mutáríkange bimpe hiyo nǎmbi byakongwa mu mituro.»

14 Ebasura nabo bamushisha mbu: «Na bate túkié buni?» Nae wásako bo mbu: «Kiro mwendi muronja bukongobanya mu mwea uti-uti abe imuhambike kinwa, ina mwendi mumoere ebihembo byinu.»


15 Ebea babesenga barindirengi erieya ra Kirisitu*, n'ebati báanikira mbu kúti ke Yohana nge iwe. **16** Nampo, Yohana wére bo mbu: «Ani nabubatisa mu mecha, ina íngu weyange kuruma nani uri na maa inirenga. Kasa nani ntí nakomenwa iobora n'emirí y'ebirato byae. Iwe usebubatisa mu Mutima Washurukara na mu kashá. **17** Watíngé rweri mu mine yae mwifufura engáno. Usekumanyányá engáno n'iranga yo mu mwiso wae, ina waseshiká ebifufuru mu kashá inki katarimanga.»

18 Yohana wabesenga uturengi ebea mbo eMwasi Wakonda n'ininka bo mahano mingi. **19** Emubake Herote wábinga Herotia mukari wa Firipo musikyabo. Wákora hotu bimpe bibí bingi. Bushwa nǎmbyo, Yohana wamufine. **20** Ina Herote watáríka tu kímpě kibi mwitáa Yohana mu mwiýóróró.

Eribatiswa ra Yesu

(Matayo 3.13-17; Mariko 1.9-11)

21 Ebea bati mbo barekia bamabatiswa, Yesu nae wabatiswa. Warekia uhemange, embingu yóboka, **22** eMutima Washurukara wahite hiyo nae kimúbi buri pisho. Na murenge warukírwa ituka mu mbingu wéba mbu: «Ōngo nge musike wani kitwana chani, nakushima nguru.»



Yohana wabatisa Yesu (3.22)

Ekisasa cha Yesu

(Matayo 1.1-17)

23 Yesu warekia wabucha emurimo wae, wabesenga nti uri na myāka buna makumi ashatu. Ebea babesenga bahakange mbu Yesu musike wa Yosefu.

Yosefu wabesenga nti musike wa Heri,

24 na Heri wabesenga nti musike wa Matati,
na Matati wabesenga nti musike wa Rawi,
na Rawi wabesenga nti musike wa Mereki,
na Mereki wabesenga nti musike wa Yana,
na Yana wabesenga nti musike wa Yosefu.

25 Na Yosefu wabesenga nti musike wa Matatia,
na Matatia wabesenga nti musike wa Amosi,
na Amosi wabesenga nti musike wa Nahumu,
na Nahumu wabesenga nti musike wa Esiri,
na Esiri wabesenga nti musike wa Nake,

26 na Nake wabesenga nti musike wa Mati,
na Mati wabesenga nti musike wa Matatia
na Matatia wabesenga nti musike wa Simeu,
na Simeu wabesenga nti musike wa Yoseki
na Yoseki wabesenga nti musike wa Yota.

27 Na Yota wabesenga nti musike wa Yoanani,
na Yoanani wabesenga nti musike wa Resa,
na Resa wabesenga nti musike wa Serubaberi,
na Serubaberi wabesenga nti musike wa Saratieri,
na Saratieri wabesenga nti musike wa Neri,
na Neri wabesenga nti

28 musike wa Mereki,
na Mereki wabesenga nti musike wa Ati,
na Ati wabesenga nti musike wa Kosamu,
na Kosamu wabesenga nti musike wa Erimatamu,
na Erimatamu wabesenga nti musike wa Eri.

29 Na Eri wabesenga nti musike wa Yeshua,
na Yeshua wabesenga nti musike wa Erieseri,
na Erieseri wabesenga nti musike wa Yorimu,
na Yorimu wabesenga nti musike wa Matati,
na Matati wabesenga nti musike wa Rawi.

30 Na Rawi wabesenga nti musike wa Simioni,

- na Simioni wabesenga nti musike wa Yuta,
na Yuta wabesenga nti musike wa Yosefu,
na Yosefu wabesenga nti musike wa Yonamu,
na Yonamu wabesenga nti musike wa Eriakimu.
- 31** Na Eriakimu wabesenga nti musike wa Merea
na Merea wabesenga nti musike wa Mena,
na Mena wabesenga nti musike wa Matata,
na Matata wabesenga nti musike wa Natani,
na Natani wabesenga nti musike wa Ndauti.
- 32** Na Ndauti wabesenga nti musike wa Yese
na Yese wabesenga nti musike wa Obeti,
na Obeti wabesenga nti musike wa Buasi,
na Buasi wabesenga nti musike wa Sarumoni,
na Sarumoni wabesenga nti musike wa Nasoni.
- 33** Na Nasoni wabesenga nti musike wa Aminatabu
na Aminatabu wabesenga nti musike wa Atimini,
na Atimini wabesenga nti musike wa Ramu,
na Ramu wabesenga nti musike wa Esironi,
na Esironi wabesenga nti musike wa Peresi,
na Peresi wabesenga nti musike wa Yuta.
- 34** Na Yuta wabesenga nti musike wa Yakobo
na Yakobo wabesenga nti musike wa Isake,
na Isake wabesenga nti musike wa Iburahimu
na Iburahimu wabesenga nti musike wa Tera
na Tera wabesenga nti musike wa Nahori.
- 35** Na Nahori wabesenga nti musike wa Serungu,
Serungu wabesenga nti musike wa Reu
na Reu wabesenga nti musike wa Perengi,
na Perengi wabesenga nti musike wa Eberi,
na Eberi wabesenga nti musike wa Sera, na Sera wabesenga
- 36** nti musike wa Kainama,
na Kainama wabesenga nti musike wa Aripakisati,
na Aripakisati wabesenga nti musike wa Semu,
na Semu wabesenga nti musike wa Noa,
na Noa wabesenga nti musike wa Rameke.
- 37** Na Rameke wabesenga nti musike wa Metusera,
na Metusera wabesenga nti musike wa Enoke
na Enoke wabesenga nti musike wa Yareti,
na Yareti wabesenga nti musike wa Mahareri,

na Mahareri wabesenga nti musike wa Kainama.

³⁸ Na Kainama wabesenga nti musike wa Enosi,
na Enosi wabesenga nti musike wa Seti,
na Seti wabesenga nti musike wa Andamu,
na Andamu wabumbwanga na Ongo.

Yesu werekwá na Mushumbu


(Matayo 4.1-11; Mariko 1.12-13)

4 ¹ Yesu wátuka ekúsi mûri Yorondani ntwamarísa eMutima Washurukara. N'eMutima ngo wamwenja mu bweru. ² Nánko, Mushumbu* wamwereká mu matu makumi anye. Mu matu ati ngo, Yesu ntwârerisa bió. Kuruma n'emátú ngo, wákwa rwaka.

³ Kuruma nampo, Mushumbu* wamweyere n'iwire mbu: «Kuba óngo Musike wa Ongo, eba n'erikoi ríno ribinduki mukati.» ⁴ Yesu wámusako mbu: «Raandikwa mu Mitiro Yashurukara mbu: «Emwea watakoche iíshi bushwa n'emikati ho.»»^a

⁵ Ituka mpo, Mushumbu wámuría hakangama nguru. Na mu rikohya, wamushea emami ati echuo, ⁶ n'iwire mbu: «Nasekuninka emaa n'ebutumba b'wemami ati ingi, bushwa mbu nareninkwa ebite mbi, nani namuninkana byo mu kinsi mwea ewashima ani. ⁷ Umanisimanike, ebite mbi bisebesa byabe.» ⁸ Ina Yesu wámusako mbu: «Raandikwa mu Mitiro Yashurukara mbu: «Umanikenga Nyere kurwabe Ongo wabe n'imukore iwe kisine.»»^b

⁹ Nampo, Mushumbu wámuría ku Yerusaremu. Wamutarisha hamambio eNumba ya Ongo* n'iwire mbu: «Kuba óngo ho Musike wa Ongo, ítáe



*Mushumbu watarisha Yesu
hiyo n'enumba (4.9)*

^a 4.4 Soma Isubukia 8.3. ^b 4.8 Soma Isubukia 6.13.

ekwansi itukire hano, ¹⁰ bushwa raandikwa mu Mitiro Yashurukara mbu: «Ongo waseere ebamaraika* bae bakurange.» ¹¹ Raandikwa mbu: «Basekuria mu mine yăbo, kongo ekisando chabe kiro chasitara mwikoi.»^{ch} ¹² Ina Yesu wámusako mbu: «Raandikwa mu Mitiro Yashurukara mbu: «Angienda ōngo werekange Nyere kurwabe Ongo wabe.»»^e

¹³ Mushumbu* warekia wamakind'iereka Yesu mu sâanse siti, wamureke kasa kashángi kakeke.

Yesu wabucha emurimo wae mu chuo cha ku Ngariraya

(Matayo 4.12-17; Mariko 1.14-15)

¹⁴ Yesu wákuruka mu chuo cha ku Ngariraya nti urisere n'ebunkangwe bw'eMutima, n'emyasi yae yêya kuti-kuti mu sankaro'nso. ¹⁵ Wabesenga uhanange mu masinangoki* ábó, n'itatwa n'ebeta bati.

Yesu watinwa ku Nasareti

(Matayo 13.53-58; Mariko 6.1-6)

¹⁶ Yesu wêya mu rubungu rwa ku Nasareti kwôshukenga we. Erotu rw'eSabato* rwarekia rweya, wákime mu sinangoki* ímbu esenga buronjangă ho we. Wásimana mwisoma eMitiro Yashurukara. ¹⁷ Bámunínka ekitabo ch'emutahwa* Isaya. Nampo, wóbora cho, wásúnga impi haandikwa mbu:

¹⁸ «Mutima wa Nyere kuritu uri hima nani,
bushwa wamanirondora nihubirĩ ebasene eMwasi Wakonda.
Wanitámá iture ebamínwa mbu baseoborwa
n'ebihumihumi mbu bisekae.
Wanitámá kobora ebanénwá,

¹⁹ n'iture ebea ímbu emwăka wameya íngu usekiayo Nyere kuritu
washéá enchumo yae.»^f

²⁰ Kuruma nampo, wôndonda ekitabo, wanínka cho emukori w'esinangoki n'irika. N'ebeta bati ebabesenga kumunda n'esinangoki* babesenga nti bamukaengi nguru. ²¹ Yesu wabucha ke iere bo mbu: «Emitiro ino yamarukira banu hano yamabererera runotu.» ²² Ebati bamukokome n'ishishara mu binwa byakonda ebyebangá we. Beba mbu: «Mbeni uno nti mwana wa Yosefu?»

²³ Yesu wére bo mbu: «Íra, nosi mbu mukânĩre emushumo uno: «Emunganga, iramyé ōngo kisine!» Na bumbo tu mukânĩre mbu: «Twamarukira ebite byakukora ōngo mu rubungu rwa ku Kaperenaumu,

kai kora tu byo kũno kurinu.»²⁴ Nae wéba mbu: «Íra nibwirengi: kusira mutahwa* eusimirwanga ku rwabo. ²⁵ Nibwirengi íra: kwabesenga bashumbakari bingi mu chuo cha ku Isiraeri mu biranga by'emutahwa Eria. Mu matu ngo, embura ntí yakengá mu myáka ishata na chunda, na kwábése rwaka rukiri mu chuo kiti. ²⁶ Ongo ntí watúmánga Eria kuri mwea uti-uti, ina ho kw'emushumbakari wa ku Sarepata, mu chuo cha ku Sindoni. ²⁷ Na mu chuo cha ku Isiraeri kwabesenga hotu babembi bingi mu biranga by'emutahwa Erisha. Kusira mwea uti-uti waramanga, ina ho Naamani w'echuo cha ku Suria.»^h

²⁸ Ebea bati ebabesenga kumunda n'esiangoki*, mu rirukira ebinwa mbyo, basubuka nguru. ²⁹ Básiána, bakurura Yesu ieya na hikúra n'erubungu erwabesenga rwumbwa mu ntata. Bamutarisha hambasiro kongo bamurekera kumbo n'erou. ³⁰ Ina iwe wéta munkati-nkati nabo, nienda rae.

Yesu wahénsá kifwasi mu mwea

(Mariko 1.21-28)

³¹ Nampo Yesu wahitire ku Kaperenaumu, mu chuo cha ku Ngariraya. Erotu rw'eSabato* rwarekia rwameya, wáhana ebea. ³² Nabo bashishara nguru murísúnga ímbu buhanange we, bushwa wabesenga uhanange bo na burai. ³³ Mu sinangoki* njo mwabesenga mwea umă watingírwa na kifwasi. Nae wákuwa mu murenge mukiri mbu: ³⁴ «eYesu wa ku Nasareti, óngo utusondange mo nki? Ukweya katushiria? Ani nikosí nguru, óngo nge Mushururuka watúmwa na Ongo.»

³⁵ Yesu wamufine mbu: «Bibira, na tukă kumunda n'emwea uno!»

Hiha-hiha, ekifwasi ncho chamurekera ekwansi mu makako ebea, n'ituka kumunda nae nti tíchamubabaya. ³⁶ Ebea bati bashishara nguru n'ishishana mbu: «Inki kino? Tutangasanganga binwa biri bunu! Emwea uno uhensange ebifwasi mu bunkangwe na maa ae, nabyo byatuka!» ³⁷ Emyasi ya Yesu yánsansabana ekuti mu chuo ncho.

Yesu waramyá bakoni bingi

(Matayo 8.14-17; Mariko 1.29-34)

³⁸ Yesu wátuka kumunda n'esiangoki*, wénda kakime mwa Simoni. Inabe wa Simoni wabesenga ntwamatingirwa na kaburura kasuma, bákóna ke Yesu wamuramyé. ³⁹ Yesu wíndama kwihi n'emumína ngo, wáfine ekaburura mbu katuke kumunda nae, náko katuka. Hiha-hiha, emumína ngo wásimana n'ibucha ironjee bo bió.

^h 4.27 Soma 2Bami 5.14.

⁴⁰Emwishi warekia wamasika, e babesenga n'ebakoni babó ba kira bususé barisha bo kuri Yesu. Wátereka emine yae hambasiro na kira umă mubo, wáramya bo. ⁴¹Ebifwasi byatuka kumunda na bea bingi, na nti bikuange mbu: «Ōngo nge Musike wa Ongo!» Ina Yesu wáfine byo, na ntwasierenga byo mbu byebe, bushwa byáteererangá mbu iwe nge Kirisitu*.

Yesu wahubiri ku Yundea

(Mariko 1.35-39)

⁴²Ebutu bwarekia bwamacha, Yesu wátuka mu rubungu n'ienda kishíka kwahehe. Kikembe kikiri cha bea babucha imusondekanya. Barekia bamamusunga, básonda imuhangire mbu anga wasia tu bo. ⁴³Ina Yesu wére bo mbu: «Rakomenwa nihubiri eMwasi Wakonda w'eBwami bwa Ongo* mu simpě mbungu hotu, nge chasingwa Ongo wanitámá.»

⁴⁴Nae wênderana n'erihubiri mu chuo cha ku Yundea kumunda n'em asinangoki*.

Yesu wabikira ebanafunsi baroso

(Matayo 4.18-22; Mariko 1.16-20)

5 ¹Otu rumă, Yesu wásimana mu kirindo ch'enyanza Kenesareti^a na bea bingi nti bamukutakutange kongo barukira ekinwa cha Ongo. ²Wásúnga mitumbu ibi kumushi n'eririba, n'ebarobi nti bamatuka kumunda nayo, babesenga bashuange etukira twábó. ³Yesu wákime mu mutumbu umă, na nti nge wa Simoni. Yesu wámwire mbu wahimire o kore kakeke n'ensocho. Nampo wárika mo, wabucha ihana ebea.

⁴Warekia wamakind'ihana, wáshísha Simoni mbu: «Kensea emutumbu ehari emecha mingi na muhiche etukira twinu, murobe bikwă.»

⁵Simoni wámusako mbu: «eMuhani, twamanuba n'eriroba emutu uti, twăkühina. Ina bushwa mbu ōngo nge uměba, nasehicha tu etukira.»

⁶Barekia bamahicha etukira, bashura bikwă bingi nguru n'etukira twáhiere mu ngerero y'isonda ibereka. ⁷Nampo basime banachabo b'emutumbu umpě mbu beye kásake bo. Nabo bêya, barísía emitumbu ibi bikwă, nayo yábucha itia. ⁸Simoni Petero warekia wasúngă ebinwa mbyo, waanda emaru mu makako a Yesu n'ieba mbu: «Nyere kuritu, umátúkánge kwihhi nani, bushwa mbu ani mwea wa nsambi!» ⁹Simoni webángá mbo bushwa iwe na babine bati bashishara nguru mu risúnga ebwingi bw'ebikwa ebyashuranga bo.

^a 5.1 Nyansa ya Kenesareti: Ríno rimpe rina r'enyanza ya ku Ngariraya.



Petero na banachae bashura bikwa bingi bushwa na Yesu (5.6)

¹⁰ Yakobo na Yohana basike ba Sebendayo ebabesenga hotu barobi hima na Simoni, nabo bashishara. Yesu ke wére Simoni mbu: «Kiro usubaha, itukire enompena ukúkoră murimo w'iroba bea.»

¹¹ Ngerikia ke bakurura emitumbu yăbo kumushi, bareke ebiti n'imisa Yesu.

Yesu waramyá mubembi

(Matayo 8.1-4; Mariko 1.40-45)

¹² Yesu warekia ũri m'ubungu rumă mu chuo ncho, kwasaa mwea umă nti urisere bibembi emubi uti. Warekia wasúngă Yesu, wíndama embaso ieya n'ekwansi, n'imuhema mbu: «eNyere kuritu, úmasasa, umuniramya^b.»

¹³ Yesu wôro emwine, wamutinge mo n'imwire mbu: «Nashima! Ramá!»

Hiha-hiha, emwea ngo wárama ebibembi. ¹⁴ Yesu wamuhangire nguru mbu: «Angítüre mwea emwasi uno. Ina endá kishéá kuri ekuhani*. Năńko, ukutonga ebisabo ímbu bwebanga Musa, kongo rashea mu bea ebati mbu umarama.»

¹⁵ Na kiro mbo, emwasi wa Yesu wênda nkúrá na bea bingi benda batumanange mwirukira ebinwa byae n'irama emakoni ábó. ¹⁶ Ina wabesenga ntwishíkánge nabo kwahehe n'ihema Ongo nko.

^b 5.12 Soma Matayo 8.2.

Yesu waramyá mwea wa rumbonsa

(Matayo 9.1-8; Mariko 2.1-12)

¹⁷Otu rumă Yesu warekia uhanange ebea. eBafarisayo* n'ebahani b'eMyomba* ebatukángá mu kira ubungu rw'echuo cha ku Ngariraya na ku Yundea n'ituka ku Yerusaremu, babesenga nti barerika mpo. Yesu wabesenga nti uramyange ebakoni mu maa a Nyere kuritu.

¹⁸Bea bimă bêya na nti bária mwea wa rumbonsa mu kipoi. Básonda inse y'imukimisha kumunda n'enumba kongo bamutereka hamakako na Yesu. ¹⁹Ina barúkwa ense y'erimukimisha kumunda bushwa n'enteko nkiri y'ebea. Bushwa năncho, bataya hamambio enumba njo, bakakura mu matebura, bahicha emwea w'erumbõnsa munkati-nkati n'ebea, nt'uri mu kipoi chae, n'imusicha mu makako a Yesu.^{ch} ²⁰Yesu warekia wamasunga erisimira rabo, wéba mbu: «Emirani, esansambi sabe samasasirwa.»

²¹Ebahani b'eMyomba* n'eBafarisayo* babucha kwishisha mbu: «Inyé mwea ngu eukambange Ongo? Inyé ngwamukochă isasira nsambi, kuba ntí Ongo wisine?» ²²Yesu warekia wamateerera emihaki yăbo, wáshísha bo mbu: «Bushwa nki banu mwishishange ebinwa biti mbyo mu mitima yinu? ²³Kini kinwa nge chatamba, mu rieba mbu: «Esansambi sabe samasasirwa», abe ieba mbu: «Simaná, endá?» ²⁴Nisondänge musibe mbu ani eMwana w'eMwea* niri na maa erisasira esansambi hano hansí.» Nge bumbo, Yesu wére emwea w'erumbõnsa mbu: «Ani nge nikwiréngi mbu: simaná, ria ekipoi chabe na kurukă ku kwabe.»

²⁵Hiha-hiha, emwea ngo wásimana kubusondori nabo ebati. Wáría ekipoi chabesenga chikindirengi mu we, wênda ku kwae nti utatange Ongo. ²⁶Ebea bati bashishara n'itingirwa na böba. Batata Ongo n'ieba mbu: «Runotu, rero twamasunga binwa bya bishisharo!»

Yesu weré Rawi mbu wamumise

(Matayo 9.9-13; Mariko 2.13-17)

²⁷Kuruma nampo, Yesu wátuka mu numba njo. Wásúnga mukongori umă wa horo erina rae nge Rawi^e, ntwarika hamesa yae y'eritunya ehoro. Yesu wámwire mbu: «Nimise!» ²⁸Rawi wásimana, wasia ebiti n'imumisa.

²⁹Ituka mpo Rawi waronjee Yesu bió bingi mu numba yae. Bakóngóri bingi ba horo na bampe bea bingi babesenga barisange hima nabo. ³⁰eBafarisayo* n'ebahani b'eMyomba* barekia bamarukira mbo, babucha

^{ch} **5.19** Bayuta bimă, mu riimba emanumba ábó, babesenga báríangă mití hiyo n'itereka mu yo matebura. ^e **5.27** Rawi nge wabikirwá tu mbu Matayo. Soma Matayo 9.9.

ihuhuma. Bashisha ebanafunsi* ba Yesu mbu: «Bushwa nki banu murisange n'iomore hima n'ebakongori b'ehoro, n'ebakori b'ebibí?»

³¹Yesu wásako bo mbu: «Ebankangwe ntibaráé mu munganga, ina ebakoni. ³²Nti neyángá kabikira ebea mbi baombokara mu makako a Ongo, ina ebari n'ebubí kongo babundúka ituka mu sansambi sábó.»

eBafarisayo bashíshá Yesu bushwa n'ebió

(Matayo 9.14-17; Mariko 2.18-22)

³³Bafarisayo* bimă bashisha Yesu mbu: «Ebanafunsi* ba Yohana hima n'ebitu baronjangă mahemo na bihangisangă ringi irisa bió, ina ebanafunsi babe ibó barisange n'iomomo.» ³⁴Yesu wásako bo mbu: «Banu mwanikirange mbu mumakocha ihangire ebira ba'ngu waherucha irisa bió entambi ukiri hima nabo? Anga! ³⁵Ina kuseyayo matu shiherucha ngo wakuturwa munkati nabo, n'emátú ngo ke nge asekwihangisayo bo irisa.»

³⁶Yesu wákere bo emushumo uno: «Kusira mwea ngu wamukeră kiraka mu nchangi nchasha n'iranda cho mu nchangi yamanaa. Kúti wakia mbo, wabese nti wamabenga enchangi nchasha, n'ekiraka ch'enchangi nchasha kitamukocha itingane n'enchangi yamanaa. ³⁷Na kusira hotu mwea wamúria ndifai* nchasha kumunda na nkŭ y'ohu^f esamanaa. Emwea wámaronja mbo nti endifai nchasha isebuya esanku s'ekihŭ; nampo endifai isekubuka n'esankŭ sisekwa busa. ³⁸Ina rakomenwa iría endifai nchasha kumunda n'ohŭ rushăsha. ³⁹Emwea wámomo mu ndifai ya karekare wataraenga tu mu ndifai nchasha, bushwa waseba mbu: «Endifai ya karekare yashamuka nguru!»»

Yesu nge miné Sabato

(Matayo 12.1-8; Mariko 2.23-28)

6 ¹Otu rumă rwa Sabato*, Yesu wabesenga wetange mu mashwă a ngáno. Ebanafunsi* bae babucha ikekeraa etukobe tw'engáno, babungabunga to mu mine n'irísa etuma. ²Bafarisayo* bimă bashisha bo mbu: «Era! Bushwa nki banu mukíángé binwa ebyahangirwa ikorwa erotu rw'eSabato?»

³Yesu wásako bo mbu: «Ntínensi musoma ímbŭ bwaronjanga Ndauti wisine n'ebea bae entambi yarukiranga bo rwaka? ⁴Wakimenga mu Numba ya Ongo*, wátíngé mikati eyasibŭrwanga Ongo, warísa yo n'ininka mu

f 5.37 Inkŭ s'ohu: sabesenga inkŭ satunganyiwa na ohŭ rwa mpene. Bayuta babesenga bushienga ndifai mu nkŭ s'ohŭ sishăsha bushwa mbu ito sitakoche ibereka entambi endifai ibukange. Babesenga baronjangă mbo bushwa mbu esanku s'erohŭ insi samanaa satamba-támá na nti samubereka tete. Hano hebange mbu ebinwa mbi byabesengă bihanange Yesu byabesengă bishăsha na nti bitamusonyana n'emwenjo wêma wa karekare.

yo ebea bae, n'emikati njo yakomenwanga rero iriwa ho n'ebakuhani* bisine.»^a ⁵Ngyasingwángá ke Yesu wére bo mbu: «Ani Mwana w'eMwea* nge miné erotu rw'eSabato*.»

Yesu waramyá mwea w'ikasa ra rumbonsa

(Matayo 12.9-14; Mariko 3.1-6)

⁶Otu rûmpě rwa Sabato*, Yesu wákime mu sinangoki* n'ibucha ihana ebea. Kumunda mo nti m̄ari mwea umă wa rumbonsa mu rikasa r'ekwabume. ⁷Ebahani b'eMyomba* n'eBafarisayo* babesenga bakairirengi Yesu kúti useramya mwea mu rotu rw'eSabato, kongo bashée kinwa chimusongere. ⁸Ina bushwa Yesu wabesenga wosi emyanikiri yăbo, nge rikía ke wére emwea w'erumbõnsa mu rikasa mbu: «Simaná! Kensere habusondori n'ebea.» Nae wênda kasimana mpo. ⁹Ngerikía ke Yesu wére bo mbu: «Nibushishange: mbeni eMyomba yatukonga ikora byakonda abe ebyema mu rotu rw'eSabato? Iramya mwea abe imushura?»

¹⁰Yesu wákae bo ebati, kuruma nampo wére emwea ngo mbu: «Oró erikasa rabe.»

Nae wôro erikasa, n'erikasa rae rabesa tu shu. ¹¹Ina ebahani b'eMyomba n'eBafarisayo mbo basubuka nguru, babucha ishíshana bisine kinki echamukore bo Yesu.

Yesu warondorá esantumwa ikúmi na sibi

(Matayo 10.1-4; Mariko 3.13-19)

¹²Otu rumă, Yesu wátaya mu rou, wênda kakérésha mwihema Ongo emutu m̄atí. ¹³Ebutu bwarekia bwamacha, wabikira ebanafunsi* bae, n'irondora mu bo ikúmi na bábí, wabikira bo mbu ntumwa*. ¹⁴N'emína ábó nge ano: Simoni íngu wakianga Yesu wáninka erina ra Petero na musikyabo Nderea, na Yakobo, na Yohana, na Firipo na Bariteremayo, ¹⁵na Matayo, na Tomasi, na Yakobo musike wa Arufayo, na Simoni w'ekikembe ch'eBaseroti, ¹⁶na Yuta musike wa Yakobo, na Yuta Isikarioti íngu wasiburanga Yesu.

Yesu uhanange bea n'iramya bakoni

(Matayo 4.23-25)

¹⁷Yesu wáhita mu rou hima n'esantumwa sae, n'isimana hari buari bwarambama. Himpó nge habesenga ebanafunsi* bae hima na kikembe kikiri nguru cha bea ebatúkángá mu rubungu rwa ku Yerusaremu, na mu

^a 6.4 Soma Barawi 24.9.

chuo cha ku Yundea, na mu sankaro-nkaro s'esambungu sa ku Tiro na ku Sindoni mwendende enyansa. ¹⁸Ebea mbo beyánga karukira Yesu na kongo wáramya emakoni ábó. Námbo ebabesenga barenuubiwa n'ebifwasi bárama. ¹⁹Ebea bati básondángá imutinge mo, bushwa mbu kumunda nae kwabesenga kusaange maa aramyange ehati.

Erikanirwa n'erisherwa

(Matayo 5.1-12)

²⁰Yesu wákae ebanafunsi* bae n'ieba mbu:

«Mukasanirwa banu mbi ebasene,
bushwa mbu eBwami bwa Ongó* bwinu.

²¹Mukasanirwa banu mbi muri na rwaka enompena,
bushwa mbu mukúsukutá.

Mukasanirwa banu mbi murěngi enompena,
bushwa mbu mukúsea.

²²«Mukasanirwa banu, kuba ebea bábubaá, bamikuto kuri banu, bámábukamba n'ibubishie emina inu bushwa nani eMwana w'eMwea*!

²³Ebinwa mbyo bisékía byamasaa, mumoanga na kwikuba-kuba, bushwa mbu mubikirwa bihémbó bikíri mu mbingu. Bumbo nge bwakíángá bishiku bábó bákóre ebatahwa*.

²⁴«Ina mumaherwa banu ebatúmbá,
bushwa murikinda ishée esangoa sinu.

²⁵Mumaherwa banu mbi musukuta enompena,
bushwa mbu mukúkwa rwaka.

Mumaherwa banu mbi museange enompena,
bushwa mbu mukusungayo buhanya n'irire.

²⁶Mumaherwa banu kuba ebea bati babutatange, bushwa mbu bumbo nge bwakíángá bishiku bábó batata hotu ebatahwa b'emanko!»

Mushime ebarénda binu

(Matayo 5.38-48; 7.12a)

²⁷«Ina banu mbi munerukirange, nibwirengi mbu mwendi mushima ebarénda binu, mwendi mukóra byakonda kuri imbi bábubaá. ²⁸Mwendi muhemere mukisa imbi ebabuhérange. Mwendi múheme imbi babuterange. ²⁹Emwea wámakurasa kihi mu ritema rima, mushée n'erîmpě hotu. Emwea wámakunyaka erikóti rabe, musieri n'erishibabu hotu. ³⁰Emwea wamakuhema kikai múninké cho, n'ewakunyaka bikai byabe, angimuhema mbu wakukurichii byo. ³¹Mwendi mukore bampe ímbu busondange ikorerwa hotu banu.

³²«Banu mūrī n'ishima ra buni kúti mushima ho mbi ebabushima? Bushwa mbu n'ebea b'esansambi nabo bashimangă ho imbi ebashima bo. ³³Kuba banu mukorengi byakonda kuri ho mbi ebabukorengi byakonda, ínı nchime ishéange banu? Bushwa mbu n'ebea b'esansambi nabo hotu bakoranenga bumbo. ³⁴Kuba banu musombyange ho mbi ebinyihire banu ho mbu bamubutua, ínı nchime ishéange banu? N'ebea b'esansambi hotu nabo basombyangă banachabo b'esansambi mu mwinyihiro mbu basetua ímbu bwakwisombyanga bo! ³⁵Ina banu, mwendi mushima ebarénda binu. Mwendi mukore bo byakonda n'isombya bo na nti tímwinyihire ikuruchiwa. Nampo mukuninkwă uhembo rukiri na mukubeseyo băna ba Ongo íngu ırı hiyo n'ebîti, bushwa mbu iwe mǒngó mu bea bati ebabí nămbi ebatashimanga mu byakorerwa bo. ³⁶Mwendi mukwírane bonso, ímbu bubukwirengă Tita winu bonso.»

Kiro muhukumu bampe

(Matayo 7.1-5)

³⁷«Kiro mwendi banu muhukumungi bampe, na Ongo nae watêndi ubuhukumungi. Kiro mwendi banu mwansiranengi bibí, na Ongo nae watêndi ubuansirengi bibí. Mwendi musasira bampe, na Ongo nae wendí ubusasirange na banu hotu. ³⁸Mwendi banu muninkange bampe, na Ongo nae wasenda ubuninkange. N'ekisebuninka we, waserisia cho shu n'isoseka cho, n'irísia esanku sinu mu meno. Bushwa mbu Ongo wasebupimireyo mu nengo nji ipimirengi mo banu kuri bampe.»

³⁹Yesu wákere tu ebanafunsi bae emushumo uno, wáshísha bo mbu: «Mbeni kihumihumi chamakochă ibunja kîmpě kihumihumi? Ebati bábí batakiri mu kiribu? ⁴⁰Emwanafunsi* watáréngánga emuhani wae. Ina kinsi mwanafunsi íngu warihanwa shu, wamubesě buri emuhani wae.

⁴¹«Buni bwamusungă ōngo ekası kárı kumunda n'erıso ra munakinu, ina utungarae mu kitıká kırı mu rıso rabe? ⁴²Abe, buni bwamukocha ōngo iere munakinu mbu: «Rekė nikúkútu ekası mu rıso rabe», na kendekeke kumunda n'erıso rabe ōngo mukırı kitıká! Ōngo mwea wa nkusé! Kuto kasa ekitıká kırı mu rıso rabe, kongo ukae ishı n'ıkuto ekası mu rıso ra munakinu.»

Emuti n'ebyuma byao

(Matayo 7.16-20; 12.33-35)

⁴³«Kusira mutı wakomá wámubuta byuma byema, abe kusira mutı wêma wámubuta byuma byakonda. ⁴⁴Bushwa mbu kira mutı usibwangă mu byuma byao. Ebea batamusiro byămbá abe nkobe mu mutı w'eruso.

⁴⁵Nge bumbo, emwea wakomá wěbanga binwa byakoma ímbu bwakonda emutima wae. N'emwea wemá wěbanga binwa byema ímbu ebwema emutima wae. Bushwa mbu ebunú bw'emwea bwebangă binwa ebrisere mu mutima wae.»

Emanumba abi
(Matayo 7.24-27)

⁴⁶«Bushwa nki banu mumbikirange ‹Nyere kuritu, Nyere kuritu›, na mutungakora imbi bibwirengi ani? ⁴⁷Nihunange ibushéa ímbu bwusúsá emwea ngu unimisange, n'urukirange ebinwa byani n'ikora byo: ⁴⁸wasusanyiwa na mwea wumbángá numba. Watíma nguru eroto n'ieya na mu rutandare. Kuruma nampo, wũmba emúsíngi hiyo n'erutandare n'iumba enumba hiyo n'emúsíngi. Mbura nyankende yarekía yamake, erusi rwarisa n'emikombi yírasa mu numba njo, ina itatengí, bushwa mbu yimbwángá shu. ⁴⁹Ina íngũ warukirá ebinwa byani na watangaronja byo, wasusanyiwa na mwea wumbángá numba mu roto na nti tíwimba músíngi. Emibimbi yarekía yirasa mu numba njo, mu kashángi ho kakeke, yenduka n'ikakukara.»

Yesu waramyá mukori wa mukwakare wa basura
(Matayo 8.5-13)

7 ¹Yesu wakíanga waměba ebinwa biti mbyo kuri ebea mbi babesenga bamurukirange, wěnda mu rubungu rwa ku Kaperenaumu. ²Nńńko kwabesenga mukwakare umă wa basura wa Baroma. Emukwakare ngo wabesenga na mukori wae umă washima we nguru. Emukori ngo wabesenga usambange nti uringi mu nsanga nareke. ³Entambi yakianga emukwakare o warukirá emwasi wa Yesu, watúma kuri we bakúngú bimă ba Bayuta imuhema weye kăramya emukori wae. ⁴Ebakúngú mbo barekia basaa hari Yesu, bamuhema nguru mbu: «Emwea uno wakomenwa umúkori ebikuhemange we, ⁵bushwa mbu iwe utushimanga bate eBayuta, nae ngwakutwimbenga n'esinangoki* yitu.»

⁶Nńńhă Yesu wěnda hima nabo. Warekia wěya kwihi n'enumba y'emukwakare ngo, watúma bira bae bamweberi kuri Yesu mbu: «Nyere kuritu, kiro winubya, bushwa mbu ani ntínakomenwa ikukóke mu mwani. ⁷Ngyasingwa nasunga nti tínakomenwa ieya harikire óngo. Ina, óngo eba kinwa kimă ho, n'emukori wani waserama. ⁸Nĩri n'ebanisimanirengă mu murimo witu, ina nani niri nămbi basimanirengă ani. Námeré umă mbu: ‹Endá!› Nae ntwenda na! Námeré umpě mbu: ‹Iya!› Naha nti weyá! Námeré ntumwa yani mbu: ‹Kora buno!› Nae nti wakórá na bumbo!›»

⁹Yesu warekia warukirã ebinwa mbyo, wáshishara bushwa n'emukwakare ngo. Wákæe kuri ekikembe ch'ebamumisange, n'ieba mbu: «Nibwirengi, ntángasunganga mu chuo kiti cha ku Isiraeri mwea uri n'isimira nguru buri uno!»

¹⁰Ebea mbi batúmwángá barekia bákuruka ekunumba, bákúmána emukori ngo ntwamarama.

Yesu wafura musike w'emushumbakari

¹¹Kuruma n'ebinwa mbyo, Yesu wênda tu m'ubungu rumã nge Naina. Ebanafunsi* bae hima na kikembe kikiri cha bea bamumisa. ¹²Wakíanga wasond'ieya mu rubi rw'erukito rw'erubungu ndo, kwasaa bea báriá kînda cha ngómó ya musike. Na nina w'emusike ngo nti mushumbakari. Bea bingi b'erubungu ndo babesenga nti batindikiangе nyamukwirirwa. ¹³Nyere kuritu warekia wasúngã nyamukwirirwa, wámukwire bonso n'imwire mbu: «Angíre.» ¹⁴Yesu wásheere kwihi n'itinge mu sanduku, n'ebæa mbi babesenga báriá esanduku básímána. Wéba mbu: «Nikwiréngi öngo musike, sumuka!» ¹⁵Himpo, wásumuka, wárika n'ibucha ieba. Yesu wámukurucha kuri nina. ¹⁶Ebea bati batingirwa na böba, batata Ongo nti bebange mbu: «Emutahwa* mukiri wasáiré tu ku kwitu! Ongo wameya kashukaya ebea bæe.» ¹⁷Emwasi ngo wánsansabana ku Yundea ekuti na mu byuo biti bya mwendende.

Yohana watúma banafunsi bæe bábí kuri Yesu

(Matayo 11.2-19)

¹⁸Ebanafunsi* ba Yohana bamuture emwasi w'ebiti mbi byetayo. Nampo Yohana wabikira bábí mu bo. ¹⁹Watúma bo kwa Nyere kuritu kãmushisha mbu: «Mbeni öngo nge Masia íngu wakomenwanga ieya, abe turindire umpě?» ²⁰Ebanafunsi mbo barekia bêya kuri Yesu, bamwíre mbu: «Yohana Mubatisai wamátutúma kuri öngo tukúshíshe kuba öngo nge Masia íngu weyange, abe turindire umpě.» ²¹Mu ntambi iya-iya, Yesu wáramya bea bingi imbi babesenga banubange na makoni mingi, n'eburema hima nãmbi batigirwa n'ebifwasi. Wáninka hotu bihumihumi bingi enchumo y'erikæe. ²²Nampo, Yesu wásubíe ebanafunsi ba Yohana mbu: «Mwéndí kature Yohana ebiti mbi byamasunga banu n'irukira banu: ebihumihumi ngíe bikaengi, n'ebirema ngíe byendange, n'ebabembi ngíe báramange,^a n'ebatwitwi ngíe barukirange, n'ebakwire ngíe bafukange, n'eMwasi Wakonda ngíe uturwange kuri ebasene. ²³Wamákanirwa kinsi mwea ngu watâriminyiyo erisimira ræe kuri ani.»

^a 7.22 Hano, erirama r'emubembi nge rishukara.

24 Ebanafunsi ba Yohana barekia bamakuruka kuri we, Yesu wabucha iture ebikembe by'ebea emyasi yebá kuri Yohana mbu: «Mbeni mwendángá mu bweru kasunga ko nki? Mbeni eriséké indi rabesenga rirubyiwange n'eriuhu? Anga! 25 Mwendángá kasunga ko inki ke? Mbeni mwea íngu wambara nchangi yahunda? Anga! Ebambarangă nchangi sa busí kwasuma na bári mu muanoano, barikangă mu manumba ebwami. 26 Mbeni mwendángá kasunga nki ke? Mutahwa*? Ae, nibwirengi banu mbu iwe wabesenga nti mukwakare irénga emutahwa. 27 Yohana ngo nge washembwa mu Mitiro Yashurukara mbu:

«Rukira! Natú má entumwa yani íkusondori,
kongo yatunganya ense yasêtere mo óngo!»^b

28 Nibwirengi mbu: «Mu bea mbi barikire mu chuo, kusira mukwakare waréngá Yohana. Ina kinsi íngu mwanunke mu Bwami bwa Ongó*, iwe nge mukwakare imurénga.» 29 Ebea bati mbi bárúkirángá Yohana, n'ebakongori b'ehoro hotu basimira mbu Ongó nge waombokara, na Yohana wabatisa bo. 30 Ina eBafarisayo* n'ebahani b'eMyomba ibó bítiníre ebisondange Ongó kuri bo. Bushwa náncho, batina mbu batabatiswi na Yohana. 31 Yesu wéba tu mbu: «Nísusanyé ebea ba runotu na banye? Ibó bea bári buni? 32 Barengekane na băna mbi báriká kwansi mu butara nti babikirange babine mbu:

«Twakubwombere ngoma ina ntímukumína!

Twakubusimbengá rumbo rwa kiro ina ntímukure!»

33 «Nge buno hotu bweyángá Yohana Mubatisai, iwe nti witinishangá írísá bió n'iomu ndifai*. Banu nti mwebangă mbu uri na bifwasi. 34 Ani Mwana w'eMwea* nameya nirisange n'iomu, banu mwebange tu mbu: «Mukai! Uno murohoroho tūna mutamiri, mwíra w'ebakongori b'ehoro na bísá esansambi.» 35 Ina ebati mbi basimira Ongó, basibirira mbu ebutesa bwae bwaombokara.»

Yesu mu numba ya Simoni Mufarisayo

36 Mufarisayo* umă wabikira Yesu mbu weye karisa bió mu mwae. Yesu wênda mu numba y'eMufarisayo ngo, wárika n'írísá bió. 37 Na mu rubungu ndo mwarikanga mómína umă nti uri na nkúru yemá. Emúmina ngo warekia warukirá emwasi mbu Yesu uránga bió mw'eMufarisayo, wêya mo na nti wahátá murangi umă urisere marashi a busí kwasuma. 38 Wêya n'isimana kuruma na Yesu, kwíhi n'ebisando byae n'urengi. Ebiririo byae byabucha irare mu bisando bya Yesu, wakono byo n'ebuteo bwae.

^b 7.27 Soma Maraki 3.1.

Warimba ebisando^{ch} bya Yesu n'isingo byo marashi. ³⁹eMufarisayo ngu wabikiranga Yesu mu mwae warekia wasúngă bumbo, w'iebesha mu mutima mbu: «Emwea uno wamubesengi mutahwa*, wamusibange mbu emumina uno umutígengi mo wasusa buni. Wamuteererange rero mbu iwe uri na nkúru yemá.»

⁴⁰Yesu wére eMufarisayo ngo mbu: «Simoni, niri na chikushisha.» Simoni wásako mbu: «eMuhani, ebă.» ⁴¹Yesu wéba mbu: «Kwabesenga bea bábí bisombya behe kwa mwea umă. Umă wabesenga na mwinda wa tinari^e mia isanu, n'eumpě makumi asanu. ⁴²Shemine ebehe mu risúnga mbu barúkwá maa erikurucha ebehe byae, wásasira bo. Niri ke, mu bano bábí, inyé ngwaseshima emwea o nguru?» ⁴³Simoni wásako mbu: «Nasunga nti ungu wasasirwanga emwinda mukiri.» Yesu wámwire mbu: «Umasako shu.»

⁴⁴Nampo, Yesu wákæe kuri emumina ngo n'iere Simoni mbu: «Usunga emumina uno? Nákukime múno mu mwabe nt'ukumbese mecha ishua ebisando, ina emumina uno, iwe wamashúwá ebisando byani n'ebiririo byae n'ikono byo n'ebuteo bwae. ⁴⁵Ōngo umanikoke na nt'ukunirimba ebisando, ina emumina uno ntíwakureke irimba ebisando byani itukire nakime múno. ⁴⁶Ōngo nt'ukusingo mafuta mu muntwe wani, ina iwe wamasingo ebisando byani marashi. ⁴⁷Bushwa nâncho, nikwiréngi mbu nakiro esansambi s'emumina uno síngi nguru, ina esiti samasasirwa. Kino nge chashea mbu emumina uno washima nguru. Ina ngu wasasirwa mu bikeke watakoche ishéa nchime ningi.»

⁴⁸Nampo ke, Yesu wére emumina ngo mbu: «Esansambi sabe samasasirwa.»

⁴⁹Imbi babesenga barisange hima na Yesu, babucha kwiebesha mbu: «Uno nae inyé usasirange esansambi?» ⁵⁰Ina Yesu wére tu emumina ngo mbu: «Endá rabe na buhóro, erisimira rabe ramakushukaya.»

Ebamína ebasakenga Yesu mu murimo wae

8 ¹Kuruma naha, Yesu wéta mu sambungu nkiri-nkiri n'eseke-seke nti uhanange n'itura eMwasi Wakonda w'eBwami bwa Ongó*. Esantumwa sae ikúmi na sibi sabesenga hima nae, ²na bamína bimă mbi baramyiwangá nae bifwasi na makoni ampe. Munkati n'ebamína mbo, habesenga umă erina rae nge Maria, íngü ubikirwange mbu wa ku Makitara íngü wakíanga Yesu wahambură mo bifwasi birinda, ³na

^{ch} 7.38 EkuBayuta, kuba emwea uhunange ishéa umpě eshima mu rimukoke, wabesenga urimbanga ebisando byae. ^e 7.41 Tinari yabesénga behe. N'etinari nima nge yabesénga ikorerwanga mu mubisi w'otu rumă.

Shani mukari wa Kusa, murangi w'ebehe bya Herote, hima na Susana na bampe bingi. Ebamína bano babesenga bakutongă behe byábó mwisake Yesu n'esantumwa sae.

Mushinga wa mweki w'embuto

(Matayo 13.1-9; Mariko 4.1-9)

⁴Bea ba kinsi ubungu babesenga biyerengi Yesu, na kikembe kikiri cha bea bákúmánana. Nampo Yesu wákere bo emushinga uno mbu:

⁵«Mweki umă wendángá keka mbuto sae. Warekia urekeraange esambuto mu rishwa rae, sima sarare mwendende n'ênse. Ebea banyenchaa to n'emirónge yára to. ⁶Simpě sakire habasirwa n'erutandare. Sarekia samashuka, sákáma bushwa n'erirukirwa mecha. ⁷Simpě mbuto sakire munkati n'emenke. Emenke njo yáshuka hima n'embuto n'iekenya to. ⁸Ina simpě mbuto ito sarare mu oto rwakonda, sashuka na kira kakobe kabúta mpinga iyana.»

Yesu warekia wamakinda ieba ebinwa bya, wéba mbu: «fngu uri n'emate erirukira warukire!»



Emweki urekeraange esambuto sae (8.5)

Yesu webange mu mishumo bushwa nki?

(Matayo 13.10-17; Mariko 4.10-12)

⁹Ebanafunsi* ba Yesu bamushisha ke buni nge bweba emushinga ngo.

¹⁰Wásubíe bo mbu: «Banu mumashee nchumo y'erisiba enama y'eBwami bwa Ongó*, ina ntí nge bumbo mu bea bampe. Ibó nerengi bo ebinwa bino mu ngano, kongo

«Bákae ina batasungi kikai,
barukire ina batasibi kikai.»^a

Yesu wansonsomora emushinga w'emweki

(Matayo 13.18-23; Mariko 4.13-20)

¹¹Yesu wéba mbu: «Emushinga w'emweki weba buno mbu: embuto nge kinwa cha Ongó. ¹²N'embuto eyararenga mwendende n'ênse nge

^a 8.10 Soma Isaya 6.9.

sasusanyiwa n'ebea barukirangă ekinwa cha Ongo. Ina Mushumbu* weyanga kakuto ekinwa ncho mu mitima yăbo kongo batasimiri n'ikocha ishukara. ¹³ Esambuto nsi sararenga hutandare sasusanyiwa nămbi barukirangă ekinwa cha Ongo n'isimira cho na ngoa. Ina ekinwa ncho kitarikanga na miri kumunda nabo. Basimirangă cho mu ntambi nkeké ho, emyereko yámahiere bo nti basia cho. ¹⁴ Embuto nsi sakirenga munkati n'emenke sasusanyiwa n'ebea mbi barukirangă ekinwa cha Ongo. Ina eminubo, ebusoki n'erishima by'echuo by'ékenyangă ekinwa ncho mu mitima yăbo. Ngyasingwangă batábútí byuma byákó. ¹⁵ Na nsi esararenga mu roto ndu rwakoma, ito sasusanyiwa n'ebea mbi barukirangă ekinwa cha Ongo n'ibika cho mu mutima wakonda na w'íira. Bimbo nge bárangangă ekinwa ncho n'isumya mutima n'ihiere mwibúta byuma byakonda.»

Emushinga w'eritára

(Mariko 4.21-25)

¹⁶ Kuruma nampo, Yesu wéba mbu: «Kusira mwea wamusachă eritára n'ibumbe ro mu kikai abe warie ro kumunda n'entangé. Ina urembeanga ro mu kango kongo ebakimengi mu numba basungé echaka. ¹⁷ Kiti nchi chabiswa kisetaburwayo, na kinsi nama isesaayo hambuka.

¹⁸ «Kai mukohyanga n'eburukirange banu ebinwa. Bushwa mbu íngu urikire na kikai wasénikwa tu kîmpé, ina íngu usira kikai wasenyakwa nănchi chanikirengi we mbu chae.»

Banachabo Yesu na nina

(Matayo 12.46-50; Mariko 3.31-35)

¹⁹ Otu rumă, banachabo Yesu na nina bêya kămusúnga, ina ntíbákochángá imusúnga bushwa n'ekikembe kikiri ch'ebea. ²⁰ Ngerikia ke ebea bere Yesu mbu: «Banakinu na nsoko básímáná hambuka, basondange ikusunga.» ²¹ Ina Yesu wásubíe bo mbu: «Banakitu na koyo nge bimbi barukirange kinwa cha Ongo n'ikora cho.»

Yesu wakobesha enyansa

(Matayo 8.23-27; Mariko 4.35-41)

²² Otu rumă Yesu wákime mu mutumbu hima n'ebanafunsi* bae. Wére bo mbu: «Tusoké mu o mwiri w'enyansa.» Bênda. ²³ Barekia basokange, Yesu wênda toro. Hiha-hiha, iuhu rasuma ríkáso mu nyansa. N'emecha ábucha ikime mu mutumbu, bêya mu ngerero y'isonda itia. ²⁴ Ebanafunsi bae bákensere kwihi nae, bamusimo nti bebange mbu: «Nyere kuritu, Nyere kuritu, twakwa!» Yesu warekia wabambukă, wáfine emibimbi,



Yesu wafine emibimbi y'emecha (8.24)

nayo yakóba n'emecha na o ákóba. ²⁵Nampo ke Yesu wáshísha ebanafunsi bae mbu: «Erisimira rinu riri kuni?» Básubaha n'ishishara, babucha ishíshana mbu: «Mwea wa buni uno? Ufinengi emibimbi n'enyanza, nabyo byamusúbáhá ná kubá!»

Yesu waramyá mwea watingírwa na bifwasi

(Matayo 8.28-34; Mariko 5.1-20)


²⁶Kuruma nampo, Yesu n'ebanafunsi bae básoka enyanza. Basia emutumbu mu chuo ch'eBakerasi, mu o mwiri w'echuo cha ku Ngariraya. ²⁷Yesu wakianga watukă mu mutumbu, wákumanana na mwea umă mu rubungu ntwatingirwa na bifwasi. Emwea ngo wamananga matu mingi ntwatambaranga tu nchangi, na nti watarikanga tu mu numba, ina ekutuburi

ho. ²⁸Warekia wasúngă Yesu, wírake na kwirúnda ekwansi mu makako a Yesu, n'íeba mu murenge mukiri mbu: «eYesu Musike wa Ongo íngũ uringi hiyo n'ebítí, mbeni kuri kinwa munkati ani nabe? Nikuhemange, angininubya!»

²⁹Webángá mbo bushwa mbu Yesu wabesenga wamere kifwasi ncho mbu kituke kumunda n'emwea ngo. Ekifwasi ncho chabesenga kitingengă emwea ngo meta mingi. Nakiro mbu bāmumína emaboko n'ebisando mu burébúré na byăma kongo wataromboki, wabesenga ukekeraanga byo. Ekifwasi ncho chabesenga kimutaangă ínkũ kutarikanga bea. ³⁰Yesu wamushisha mbu: «Erina rabe ng'inye?» Nawe wásũbya mbu: «Erina rani ‹Kikembe.›» Wasakonga mbo bushwa mbu kumunda nae kwabesenga bifwasi bingi. ³¹Ebifwasi mbyo byakóngá Yesu mbu wamahensa bo kiro warekera bo ekwirúngá.

³²Nampo habesenga nti harikire iimba rikiri ra mpunu sihuange hambasiro n'erou. Ebifwasi mbyo byakóngá Yesu nguru mbu wareki byo, bikimi mu riimba r'esampunu. Yesu wárisia byo. ³³Ngerikia ebifwasi byatuka mu mwea ngo n'íkime mu sampunu. Eriimbá riti r'esampunu rahita n'erou n'ikwirekera mu nyansa n'itia. ³⁴Ebasũmba b'esampunu barekia basunga ekinwa ncho, bēnda tete katura emwasi ekumbuka n'ekutunsari. ³⁵Ebea bēya kasunga ebyameta. Barekia bēya hari Yesu, bákúmána emwea ngo wamakuturwa mo ebifwasi ntwarika mu makako a Yesu. Emwea ngo wabesenga nti wamambara nchangi, n'ebwenge bwae nti bwamakuruka. Ebea mbo basubaha. ³⁶Ebasunganga ebyakweta, babucha itura emwasi kuri bampe bea ímbũ bwakũkianga emwea ngu wabesenga n'ebifwasi wárama.

³⁷Ebea bati b'echuo ch'eBakerasi batingirwa na koha nguru. Bushwa năncho, bere Yesu mbu: «Tutukiriri mu chuo kitu.» Nge bumbo, Yesu wákime mu mutumbu na kwikuruke rae.



Esampunu satia mu nyansa (8.33)

³⁸Emwea ngu wakuturwanga ebifwasi wahema Yesu mbu wêndi hima nae, ina Yesu wamutinire, wámwire mbu: ³⁹«Kurukă ku kwinu, endá katura ebiti byamakukore Ongó.» Emwea ngo wênda kurwabo n'itura ebiti mu rubungu rûti ebyakumukore Yesu.

Yesu waramyá mwisi wa Yairo na mũmína umă

(Matayo 9.18-26; Mariko 5.21-43)

⁴⁰Yesu warekia wakurukă wásoka mu umpě mwiri w'enyanza, nkumanano nkiri yámukoke na ngoa bushwa mbu ebati babesenga bamurindirengi. ⁴¹Nampo, mukwakare umă wa sinangoki* mbu nge Yairo wêya. Wísunda ekwansi mu bisando bya Yesu n'imuhema mbu weye ku kwae, ⁴²bushwa mbu engomo yae y'ekikumi yabesénga iri mu nsanga nareke. Ekikumi ncho chabesenga kírí na myăka buna ikúmi na ibi.

Yesu warekia wendange kwa Yairo, kikembe kikiri cha bea chabesenga nti kimukutakutange. ⁴³Mu kikembe ncho mwabesenga mũmína umă warisamba bukoni bw'ituka mo nchama. Wabesenga wamahea n'ebukoni mbo myăka ikúmi na ibi. Wabesenga ntwamahea ebehe byae biti kuri ebanganga. Ina kwárúkwá na umă ewakochanga imuramyá. ⁴⁴Emũmína ngo wásaíre Yesu kuruma nae, wáturana mwendende enchangi yae. Hiha-hiha, ebukoni bwae bw'erituka enchama bwarama nákwá.

⁴⁵Yesu wáshisha mbu: «ñyé ngwamanitinge mo?» Ebea bati bítúna, ina Petero wéba mbu: «eNyere kuritu, utungasunga mbu bea bingi bakutimbá n'ikukutakuta?» ⁴⁶Ina Yesu wéba mbu: «Kuri ho mwea ewamanitinge mo, bushwa mbu nasunga ntyemaa amanituka mo.» ⁴⁷Emũmína ngo warekia wasúngă mbu bamamukíma, wírisha wisine nti utitimanengi na böba na kwisunda mu makako a Yesu. Nampo habusondori n'ebea bati, wátura echakusingwa wamutinge mo nămbu wamarama we hiha-hiha. ⁴⁸Yesu ke wámwire mbu: «Emwisi'ani, erisimira rabe ramakushukaya. Endá rabe mu buhóro.»

⁴⁹Yesu warekia ukiri webange ebinwa bya, kwa Yairo mukwakare w'esinangoki* kwasaa mwea umă n'iere Yairo mbu: «Enyere kuritu, Oho! Mwisyabe wamakera emutima! Anginubya tu eMuhani.» ⁵⁰Ina Yesu warekia warukirá mbo, wére Yairo mbu: «Angisubaha, simirá ho, wasêrama.»

⁵¹Yesu warekia wêya mu numba ya Yairo, ntíwananga ikime mo na umpě mwea waréngá Petero, Yohana, Yakobo, hima n'ishe w'emwana na nina. ⁵²Ebea bati babesenga baréngi na kwikama-kama bushwa n'erikwa r'ekikumi ncho. Ina Yesu wére bo mbu: «Kiro mure, bushwa mbu ntíwakwa ina urere!» ⁵³Ebea mbo babucha imusea, bushwa ibó basibanga mbu wamakind'ikwa. ⁵⁴Yesu wamutinge mu rikasa n'imwire

mu murenge mukiri mbu: «Emwisi'ani, simană!»⁵⁵ Hiha-hiha, wakurucha emutima, n'isimana. Yesu wére bo mbu: «Mumunike bió.»⁵⁶ Ishe na nina bashishara nguru. Ina Yesu wáhangire bo nguru mbu kiro bereka itura kuri mwea uti-uti imbi byamasunga bo.

Yesu watúmá esantumwa ikúmi na sibi

(Matayo 10.5-15; Mariko 6.7-13)

9 ¹Otu rumă, Yesu warikecha esantumwa sae ikúmi na sibi, wáninka to maa na burai bw'erihensa ebifwasi n'iramy ebakoni. ²Watúma to katura emyasi y'eBwami bwa Ongó* n'iramy ebakoni. ³Wére to mbu: «Mu ruendo rwinu, anga muría kikai kiti-ki abe nkoma, abe inkũ, abe bió, abe behe, kira mwea waríanga ho nchangi nima. ⁴Murikanga mu numba yasekokerwá mu banu nămbu bwâtuki banu mu rubungu ndo. ⁵Mu kinsi ubungu indu rwasekia bĭsa kuro batina ibukoke, mutukanga mu ro nti banu mutitongi emukungú w'ebisando byinu.^a Ekinwa ncho kiseshéá bo mbu bakukora bubí.» ⁶Esantumwa sênda, seta ubungu m'ubungu, siturange eMwasi Wakonda n'iramy ebea ekuti.

Herote wasúbáhá emwasi wa Yesu

(Matayo 14.1-12; Mariko 6.14-29)

⁷Herote, mukwakare w'echuo cha ku Ngariraya, wárúkĭra emyasi iti y'ebinwa bikorwange. Năwe wákwa koha bushwa mbu bea bimă babesenga bebange mbu Yohana Mubatisai ngwamafuka. ⁸Na bampe babesenga bebange mbu emutahwa* Eria nge wamasungwa tu. N'ebampe beba mbu umă mu batahwa ba karekare nge wamafuka. ⁹Ina Herote wéba mbu: «Ani nge nebángá mbu bákeré emuntwe wa Yohana. Mbeni íngu nirukirange emyasi yae, iwe inyé tu?» Bushwa năncho, Herote wásonda ke buni bwasesunga we Yesu.

Yesu wasukucha bea erefu isanu

(Matayo 14.13-21; Mariko 6.30-44; Yohana 6.1-14)

¹⁰Esantumwa* sarekia sakurukă, bature Yesu emyasi iti nji yakukora bo. Năhă wénda nabo hima. Kuruma nampo, Yesu wishĭka nabo kwĭhi na ku Betesaita. ¹¹Ebikembe by'ebea byarekĭa byamasĭba mbu kuko nge kwameta we, byamutúcha ko. Yesu wakoke bo n'ibucha ieba nabo bushwa n'eBwami bwa Ongó*. Nampo wáramya ebati mbi bahunángá mbu waramye bo.

^a **9.5 Itito emukungú w'ebisando:** nge rieba mbu emwea ewakutúmwanga usira tu mwinda kuri ebea ebakurishiwangá emwasi nabo bĭtine o.

¹²Emwishi warekia wamabucha itamba, entumwa ikúmi na sibi sa Yesu samweyere n'imwire mbu: «eNyere kuritu, Reké ebea bano bendi kásonda nkambi na bió mu sambungu esiri kwihi-kwihi bushwa mbu hano tũri hasirá bea.» ¹³Ina Yesu wásako bo mbu: «Banu bisine múninké bo bió!» Nábó bamusubie mbu: «Bate tũri ho na mikati isanu na bikwá bibí. Óngo'hunange mbu twëndí kachure ebea bati bano bió?» ¹⁴Himpo habesenga nti harikire babume buna erefu isanu. Yesu wére esantumwa sae mbu sirikeche bo mu bikembe bya bea makumi asanu-asanu.

¹⁵Esantumwa sakora bumbo, sarikecha ebea bati ekwansi. ¹⁶Kuruma, Yesu wátinge emikati isanu njo n'ebikwá bíbí mbyo, wákae ekwio, watata Ongo. Nampo, wabengaa byo, wáninka byo ebanafunsi* bae mbu bábanyíi ebea bati. ¹⁷Ebati barísa n'isukuta. Esantumwa sasombo ebyasianga bo, barísía mitúndú ikúmi na ibi.



Yesu wasukucha bea bingi bió (9.17)

Petero webá mbu Yesu nge Kirisitu

(Matayo 16.13-19; Mariko 8.27-29)

¹⁸Otu rumá Yesu wabesenga uhemange Ongo iwe wisine. Ebanafunsi* bae babesenga barikire kwihi nae, wáshísha bo mbu: «Mbeni ebea bebange mbu ani ng'inye?» ¹⁹Nabo mbu: «Bimá bebange mbu óngo nge Yohana Mubatisai, bampe mbu óngo nge Eria, n'ebampe mbu óngo umá mu batahwa* ba karekare ewafukanga.» ²⁰Yesu wáshísha bo mbu: «Na banu ke mwebange mbu ani ng'inye?» Petero wamusubie mbu: «Óngo nge Kirisitu* íngũ watutúmiré Ongo.»

Yesu waturá emwasi w'erikwa rae n'erifuka rae

(Matayo 16.20-28; Mariko 8.30—9.1)

21 Yesu wáhangire bo nguru mbu kiro bereka iture umpě mwea emwasi ngo. **22** Wére tu bo mbu: «Rakomenwa ani Mwana w'eMwea* ninube n'itinwa n'ebakúngú, n'ebakuhani* hima n'ebahani b'eMyomba*. Niseshurwa, ina erotu rw'emeta ashatu nti nafuka.»

23 Ngerikia wére ebea bati mbu: «Kuba emwea waráé inimisa, watěndi wiraengi mo. Ina wěnda uriange emusaraba wae n'initúcha ematu ati. **24** Bushwa mbu íngu usondángo iramya ebuingo bwae waseriminyayo bo, ina íngu waseshia ebuingo bwae bushwa nani waseramyayo bo. **25** Emwea wámashéé ebusoki bw'echuo kiti, wabese ntamashéé kikai nki ke kuba wariminya ebuingo bwae abe kwitaa mu roku wisine? **26** Emwea wamanikwire nkene n'ikwire ebinwa byani nkene, ani eMwana w'eMwea* nasemukwireyo hotu nkene. Rasebeseyo buno mu rotu ruseyayo ani mu busimé bwani, na nge busimé bwa Tita, na nge bw'ebamaraika* bashurukara. **27** Íra, nibwirengi mbu: bimă mu banu mbi muri hano, batăkwiyo kúti ntíbasunga nensi ebwasimana eBwami bwa Ongó*.»

Yesu wabundurwa embaso

(Matayo 17.1-8; Mariko 9.2-8)

28 Kuruma na matu buna munani Yesu warekia wamakinda ieba ebinwa mbyo, iwe wáringa Petero, Yakobo na Yohana, wátaya nabo hiyo n'erou kahema Ongó. **29** Warekia uhemange, embaso yae yábinduka, n'esanchangi sae sásana n'inyyenya nguru. **30-31** Nampo, kumunda n'echăká ncho kwasaa babume bábí, Musa bána Eria. Ebabume bábí mbo, babesenga nti bebanange na Yesu bushwa n'ebusekinda we emurimo wae, mu rikwire ku Yerusaremu. **32** Entambi njo, Petero na babine babesenga baměnda toro twingi. Ina barekia basimukă, basunga ebusime bwa Yesu n'ebabŭme bábí mbo babesenga básímáná hima nae. **33** Ebabume bábí mbo barekia básonda isiana na Yesu, Petero wámwire mbu: «Nyere kuritu, rakonda buno buri bate hano. Twímbe héma ishata: nima yabe, impě ya Musa na impě ya Eria.» Nae wabesenga webange nti tíwosi echebange we.

34 Mu ntambi Petero wabesenga webange mbo, erutundo rwahita n'ibumbe bo. Esantumwa nso sasubaha mu ribumbirwa n'erutundo ndo. **35** Kwarukirwa murenge umă wasaa mu rutundo ndo ntwebange mbu: «Uno nge Musikyani ewarondoranga ani. Mwendu banu mumutee mate!» **36** Kuruma n'erirukira emurenge o, Yesu wasúngwa ntamasia wisine.

Ebinwa biti mbyo ebyasunganga esantumwa mpo, ntíbatúrénká mwea uti-uti enama njo ematu ati ngo.

Yesu waramyá mwana uri na kifwasi

(Matayo 17.14-18; Mariko 9.14-27)

³⁷Mu richa r'ebutu, Yesu n'entumwa sae ishatu nso báhíta erou. Kikembe kikiri cha bea bamwiyere. ³⁸Hiha-hiha, mwea umă munkati n'ekikembe wakua mbu: «eMuhani, nakukónka unikairi mu musikyani, bushwa mbu iwe nge mwanani umă ho! ³⁹Ukiange wamatingirwa n'ekifwasi, hiha-hiha, emwana ntwirake, nti chamuinya-inya nguru n'erihúro nti ramutuka mu bunu. Ekifwasi ncho kitangamutuka mo tete, kimunubyanke nguru. ⁴⁰Nakongayo ebanafunsi* babe mbu bahense cho, ina kárankuso.»

⁴¹Yesu wásubya mbu: «Ah! Banu ebea b'ematu ano, banu bea bema! Murúkwa n'erisimira! Naserikayo ninu tu matu ánga? Niseshireyo kuni n'erirukira ebinwa binu? Rishá musikyabe hano.» ⁴²N'emwana ngo warekia weyanke hari Yesu, ekifwasi ncho chamutaa ekwansi n'imuiya-inya nguru. Ina Yesu wákéme cho, wáramya emwana n'imukurucha kuri ishe. ⁴³Ebea bati bashishara mu risúnga ebunkangwe bwa Ongo.

Yesu waturá tu ebusesiburwa we

(Matayo 17.22-23; Mariko 9.30-32)

Ebea bati barekia bashisharange mu binwa biti ebyamaronja Yesu, iwe wére ebanafunsi* bae mbu: ⁴⁴«Munitée emate shu: Ani Mwana w'eMwea* nisêsiburwa mu mine y'ebea.» ⁴⁵Ina ibó batateereri ebweba ebinwa mbyo, bushwa mbu byabesengá byamabiswa kuri bo kongo batasibi byo, nabo basubaha imushísha buni nge bwebange byo.

Inyé nge mukwakare?

(Matayo 18.1-5; Mariko 9.33-37)

⁴⁶Otu rumă, ebanafunsi ba Yesu básonda isiba inyé nge mukwakare munkati nabo. ⁴⁷Yesu warekia wamasiba emihaki yăbo, warisha mwana, wámuría hamushi nae, ⁴⁸wére bo mbu: «Emwea uti wasekokeyo emwana uno mu rina rani, ntyani ngwamanikóke. Na kinsi ngu wanikoke, wakoke íngu warínítúma. Bushwa mbu emwanunke munkati ninu nge mukwakare.»

Kinsi ngu ntí murenda winu uri mu ruharo rwinu

(Mariko 9.38-40)

⁴⁹Ngyasingwanga Yohana wéba mbu: «eNyere kuritu, twăkusunga mwea umă uhensange kifwasi mu rina rabe, twámuhangireyo, bushwa

mbu iwe ntí umă mu bate.» ⁵⁰Yesu wámusako mbu: «Kiro mumuhangire, bushwa mbu kinsi íngu ntí murenda winu urikire mu ruharo rwinu.»

eBasamaria batina ikóke Yesu

⁵¹Ematu erikuruka ra Yesu mu mbingu arekia ari këya, wásúnga mbu rakonda wataye ku Yerusaremu. ⁵²Watúma kasa bea bimă kubusondori nae. Bênda, bêya mu ubungu rumă rwa Basamaria* kongo bamutunganyie ekwasehiere we. ⁵³Ina ebea b'erubungu ndo batina ikóke Yesu ku rwabo bushwa mbu wabesenga uteanange ienda ku Yerusaremu. ^b ⁵⁴Ebanafunsi* bae, Yakobo na Yohana barekia basúngă mbo, beba mbu: «eNyere kuritu, ushima tuheme kashá káhítiri bo ituka ekwio n'ishiria bo?» ⁵⁵Ina Yesu wíkebera kuri bo n'ifine bo. ⁵⁶Ituka mpo bênda mu rûmpě ubungu.

Ebasondange itucha Yesu

(Matayo 8.19-22)

⁵⁷Yesu n'ebanafunsi bae barekia bári mu munse, mwea umă wére Yesu mbu: «Nendí nikumisange ekuti kwasêta öngo.» ⁵⁸Ina Yesu wámwire mbu: «Emiterere irikanga na biribu by'isáme mo, n'emirónge irikanga na birumba, ina ani Mwana w'eMwea* nisira n'ehamusame ani.»

⁵⁹Yesu wére umpě mwea mbu: «Nimise.» Emwea o nae wéba mbu: «eNyere kuritu, nikuhemange mbu nendí kasa kataa tita.» ^{ch} ⁶⁰Yesu wámwire mbu: «Reké ebakwire batae ebakwi bábó, ina öngo endá katura emwasi w'eBwami bwa Ongó*.»

⁶¹Umpě mwea wére Yesu mbu: «eNyere kuritu, nendí nikumisange, ina nikuhemange mbu nendí kasa karaá eruanda rwani.» ⁶²Yesu wámusako mbu: «Emwea wámabuchá ihinga nukaengi tu kuruma, nti twâkomenwa ikora mu Bwami bwa Ongó*.»

Yesu watúamá banafunsi makumi arinda

(Matayo 10.7-16)

10 ¹Kuruma n'ebinwa mbyo, Nyere kuritu wáronдора bampe bea makumi arinda. ^a Wátúma bábí-bábí bamusondori ieta mu kira ubungu na kira nku kwasondángá ienda we. ²Wére bo mbu: «Emukene mwingi, ina ebakori nge bakeke. Nge bumbo, múkongé Nyere kuritu miné

^b **9.53** Itukire karekare, eBayuta n'eBasamaria nti batashimanga. Bushwa náncho, eBasamaria babesenga batánanga mbu eBayuta bete munkati n'echuo chábó mu rienda kahema ku Yerusaremu. ^{ch} **9.59** EkuBayuta, itáa tita ng'erimuranga mu matu ebukángú bwae ieya n'erotu rusekwayo we. ^a **10.1** Bimpe bitabo byeba mbu bea makumi arinda na bábí.

emukene wátumé bakori kákao. ³Mwêndí! Ina mukohyanga! Nabutúma banu buri byana bya mburi munkati n'esambibi s'ebusara. ⁴Anga muría behe, abe kimbesa, abe birato, kiro mukea mwea munkati n'ense. ⁵Kinsi numba yakime mu banu, mukeanga kasa bo mbu: «Euhoro bubesi múno!» ⁶Kuba mu numba njo muri mwea waráá mu buhóro, euhoro bwínu busie nae. Ina kuba ntí mbo, euhoro mbo busêbukúruke tu banu. ⁷Murikanga mu njo numba, murisanga n'iomu kiti-kiti chaninkwa banu, bushwa mbu emukori w'emurimo wakomenwa ininkwa ebihembo byae. Kiro mukime-kime mu kira numba. ⁸Kinsi ubungu rúti rusekokerwa mu banu, murisanga kiti chaninkwa banu. ⁹Muramyanga ebakoni b'erubungu ndo na mwebanga na bîsa kuro mbu: «eBwami bwa Ongó* ngie buri kwihi ninu.» ¹⁰Ina mu kira ubungu rwákime mu banu, kuba bîsa kuro ntíbabukóke, mwétanga mu mitangá nti banu mwerengi bo mbu: ¹¹«Twabutiture banu emakungú w'erubungu rwinu íngu uri mu bisando bitu. Ina musibiriranga mbu eBwami bwa Ongó ngie buri kwihi ninu.» ¹²Nibwiringi mu ríira, mu rotu rwa hende, mukusungayo muró irénga ku Sondoma.»

Ubansa mu sambungu esatina isimira Yesu

(Matayo 11.20-24)

¹³Yesu wénderee n'ieba mbu: «Buhanya kuri ōngo ubungu rwa ku Korasini! Buhanya kuri ōngo ubungu rwa ku Betesaita! Bushwa mbu kuba ebishisharo byakuronjiwa banu byámúronjiwange ku Tiro na ku Sindoni, kongo bîsa nko bamabunduká kare, bámúambarángo makunia n'irika mu mote mu rishea eminsori yábo, n'ireke esansambi sábó. ¹⁴Ngyasingwa, erotu rwa hende, mukúsungayo muró irénga bîsa ku Tiro na ku Sindoni. ¹⁵Na ōngo ubungu rwa ku Kaperenaumu, ōngo'hakange mbu basêkutarishayo mu mbingu? Ukúhichwayo ekwirúngá.» ¹⁶Yesu wére tu ebanafunsi bae mbu: «Kinsi waburukira banu, ani ngwandúkíra, nángu wabutina, wanitina ani, n'ewanitina ani, watíná íngu wanitúmánga.»

Erikuruka r'ebanafunsi makumi arinda

¹⁷Kuruma nampo, ebanafunsi makumi arinda mbo bákuruka na ngoa nti bebange mbu: «eNyere kuritu, n'ebifwasi nabyo biturikirengi entambi turikítángo byo mu rina rabe!» ¹⁸Yesu wére bo mbu: «Nasúngáyo Mushumbu* uhúkángo buri kimpunya ituka ekwiyo. ¹⁹Murukire! Nabuninka maa inanta nsoka na nkutú hima na maa ihundusa emurenda Mushumbu. Kusira tu kikai kiti-kiti chámabusindika. ²⁰Kai kiro mumoa

^b 10.11 Soma Ruka 9.5; Mariko 6.11.

bushwa mbu ebifwasi biburukirengi, ina múmoe bushwa mbu emina inu amatirwa mu mbingu.»

Erimoa ra Yesu

(Matayo 11.25-27; 13.16-17)

21 Mu ntambi iya-iyā, eMutima Washurukara wárísíá Yesu ngoa, nampo Yesu wéba mbu: «eTita, Nyere kuritu w'ebingu n'echuo, nikutatange bushwa mbu ebinwa byabisanga ōngo ebea b'ebutesa n'ebasomi, umākandó byo mu băna banúnké. Ae Tita, ebity mbyo ng'erisasa rabe.» **22** Nampo, Yesu wére ebea mbu: «Tita waréria ebikai bitu mu mine yani. Kusira mwea unosi ani eMwana kuba ntí Tita, abe kusira mwea wosi Tita kuba ntí ani eMwana nāmbi ebahunange ani mbu bāmúsíbe.» **23** Kuruma nampo, Yesu wabindúke ebanafunsi* bae bisine, wére bo mbu: «Ebasungange ebinwa bisungange banu, bakasanirwá! **24** Bushwa mbu, nibwirengi: batahwa* bingi na babake bāhunángá isúnga ebinwa bino bisungange banu, ina ntíbarisúnga byo, n'irukira ebinwa birukirange banu, ina ntíbarerukira byo.»

Mushinga w'eMusamaria murongu

25 Kuruma nampo, muhani umă w'emyomba wásimana mwiereka Yesu. Wamushisha mbu: «eMuhani, mbeni namúronjá buni kongo nashée ekaramo k'ematu ati?» **26** Yesu wásúbya mbu: «Inki chatirwa mu myomba yitu? Buni nge burukirangá ōngo yo kuba usoma yo?» **27** Emwea ngo wásúbya mbu: «Ushimanga Nyere kurinu Ongo mu mutima wábé uti, mu mihaki yabe iti, mu maa abe ati na mu bwenge bwabe buti. Ushimanga hotu minu ímbu bwishima ōngo kisine.»^{ch} **28** Nampo, Yesu wámwire mbu: «Umasúbyá shŭ, wenda uronjá ebwameba ōngo, kongo usheeyo ekaramo.»

29 Ina emwea ngo, mwisonda kwiniinka eriíra, wáshísha Yesu mbu: «Na inye nge mitu?» **30** Yesu wásúbya mbu: «Mwea umă watukanga ku Yerusalemu mwihite ku Yeriko. Warekia uri mu munse, ebanyai bamuhenda, bamunyaa ebity byabesengá nae. Bamuhumbaka n'imusia mu nsanga nareke, bíire rabo. **31** Isisimuke, kwasaa kuhani* umă uhitirengi mu'nse njo. Warekia wasúngá emwea o, wéta kumushi nae, wíteane rae. **32** Bumbo hotu, Murawi* umă nae wêya mpo. Wakíanga wamusúngá, nae weitire mu uharo rwânse, na kwiire. **33** Ina Musamaria* umă wabesenga wetange mu'nse njo, wêya mpo hari emwea ngo. Wakíanga wámusunga, wamukwire bonso. **34** Wákensere kwihí nae, wakubure mu bihurũ ndifai* na mafuta mwimushakire, wámína byo. Kuruma nampo, wamutarisha hiyo

ch 10.27 Soma Isubukia 6.5; Barawi 19.18.

n'embándá yae, wamusicha hankambi y'ebeni n'irangana nae. ³⁵Mu richa r'ebutu, wakuto byunda bibí bya rufaranga n'itua byo kuri miné numba n'imwire mbu: «Uranganga emwea uno ishu, n'esafaranga siti sâkoresha tu ōngo hiyo nansi faranga mu rimushakire, nasekurucha to mu rikuruka rani.»»

³⁶Ngerikia ke Yesu wáshísha ingo muhani w'eMyomba mbu: «Ínyé mu bashatu bano ngwasúngá ōngo buri munachabo emwea íngü wahendwanga n'ebanyai?»

³⁷Emuhani w'eMyomba wásubya mbu: «Íngü wamukwirenga ebonso.» Nampo ke Yesu wámwire mbu: «Na ōngo hotu, wenda ukia mbo.»»



Emusamaria murongu washákire emwea ngu wahumbwanga n'ebarénda. (10.34)

Yesu wakímé mwa Marita na Maria

³⁸Yesu n'ebanafunsi bae barekia bendange, bakime mu kubungu kimă. Năńko, mămína umă nge Marita wámukoke mu mwae. ³⁹Marita ngo nti uri na motö'we nti nge Maria. Iwe wêya karika kumushi na Nyere kuritu, mu ririkira ebye bange we. ⁴⁰Ina Marita iwe wabesenga nti utubatubange bushw'emirimo y'eriteka ebió. Ngyasingwanga wêya kuri Yesu n'imushisha mbu: «Nyere kuritu, utungakae bwakíá motö wani wansiere emurimo ani kisine? Mwĩri mbu wanisaki.» ⁴¹Nyere kuritu wamusubie mbu: «Marita! Marita! Ōngo utubatubange n'inuba mu bikai bingi. ⁴²Ina kuri kikai kimă ho nge charaísha. Maria iwe wamarondora muhango wakomá nguru íngü utábakwiyo we.»

Yesu uhanange ebanafunsi bae ihema

(Matayo 6.9-13; 7.7-11)

11 ¹Otu rumă, Yesu wabesenga uhemange Ongo fasi nima. Mu rihea ihema, umă mu banafunsi* bae wámwire mbu: «Nyere kuritu, tuhanise ihema, bwakíángá Yohana wáhana ebanafunsi bae.» ²Yesu wére bo mbu: «Entambi banu muhemange, mwendi banu mwebange buno mbu: «Tita!

Erina rabe ritatwe,
eBwami bwabe bweye.

³ Wendi utuninka ebió bitu kirotu.

⁴ Wendi utusasira esansambi situ,
bushwa mbu na bate hotu tusasiranga ebati mbi batukorengi bibí,
angiturekerere ikire mu myereko.»

⁵ Kuruma wére tu ebanafunsi bae mbu: «Kuba umă mu banu Ƴri na mira'we, nae wámamwendere munkati ebutu n'imwire mbu: «Era mira'ni, nisombye mikati ishatu, ⁶ bushwa mbu umă mu bira bani wamaneyere na Ƴri mu ruendo, nani namarúkwá bió by'imushee.» ⁷ Năngu Ƴri kumunda n'enumba kuba wamámusubiě mbu: «Ndeki, angininubya! Namakinda irindika erubi. Ani n'ebăna bani twamikinde, ntakochi tu isimana bushwa ho n'erikuninka emikati.» ⁸ Nibwirengi mbu, nakiro ngu Ƴri kumunda enumba watamurindo bushwa erimuninka emikati bushwa n'ebwıra ho, ina wamusumukă n'imuninka ebiti ebimuhemange we bushwa n'erikwímíma rae.

⁹ «Nani nibwirengi mbu: mwendi muhema kongo mwendi munínkwa, mwendi músonda kongo mwendi mushée, mwendi mukongota kongo bendi báburundurengi erubi. ¹⁰ Ngyasingwa, kinsi mwea íngu uhemange ng'uninkwanga, năngu usondángo ng'ushéenga, năngu ukongotange ng'urundurirwanga erubi. ¹¹ Inyé ishe wa mwana wamámuninkă nsoka kuba emwanae wamukonga kikwa? ¹² Abe wámuninke nkutú kuba wamukonga í? ¹³ Banu kasa bea bema, ina banu mwosi ininka ebana binu bikai byahundá, nge rashea mbu Tita winu wa mu mbingu waseninkanayo eMutima Washurukara kuri mbi bamukongange!»

Yesu wahensá ebifwasi

(Matayo 12.22-30; Mariko 3.22-27)

¹⁴ Otu rumă, Yesu wabesenga uhensange kifwasi inchi chabunduranga mwea umă wabe karumbu na mutwitwi. Ekifwasi ncho chakianga chatukă, hiha-hiha emwea ngo wabucha ieba. Ebea bashishara nguru. ¹⁵ Ina bimă munkati nabo, ibó bábura mbu: «Emwea ngu uhensange ekifwasi mu maa a Bereseburi, mukwakare w'ebifwasi.» ¹⁶ Na bampe bahunu imweka, bamukonga mbu waronjei bo kengeko káshéa mbu ebishisharo byae bitukange kwa Ongu. ¹⁷ Ina bushwa mbu Yesu wasibanga emyanikiri yăbo, wére bo mbu: «Kuba bea b'ebwami buma bamakwana ibó mu ibó, ebwami mbo nti bwahona. Kuba tu ebana b'eruanda rumă bákwaná ibó mu ibó, eruanda ndo nti rwakire. ¹⁸ Ramabese ke mbu Mushumbu* wikwáníshá wisine, ebwami bwae butakochi tu isimana. Nibwirengi mbo mu risúnga banu mwebange mbu ani nihensange ebifwasi mu kăra ka Bereseburi. ¹⁹ Na kuba ke ani nihensange ebifwasi mu kăra ka Bereseburi, mbeni ebashukira

binu bahensange ebifwasi mu kăra kányé? Ngyasingwa ebashukira binu mbo basebushéayo mbu banu bariú ²⁰Kúti ani nihensange ebifwasi mu kăra ka Ongo, ngerieba mbu eBwami bwa Ongo* bwamakinda ieya kuri banu.

²¹«Kuba emurai wambara ebikai biti byae by'erikwana nabyo mwiranga enumba yae, himpo ebehe byae byarangwa mu buhóro. ²²Ina wámahendwa na umpě murai wamurenga, nampo wasemubaka ebikai biti byae by'erikwane ebinyihire rero we n'ibanya ebikai by'emushokoro. ²³Kinsi mwea ngu ntíuri hima nani nti murenda wani, na kinsi mwea watangasonja hima nani usebese nti unsansabanyange.»

Emakurukiro ekifwasi mu mwea

(Matayo 12.43-45)

²⁴Yesu wênderana n'erieba mbu: «Ekifwasi chamakindi'tuka kumunda n'emwea nti chatúbatubă mu bweru mwisondekanya maruhukiro. Chámrukwa maruhukiro, nti cheba mbu: «Nasekuruka mu numba yani emwakituka ani.» ²⁵Chámakuruka, chákumana enumba yahairwa n'itondwa shŭ. ²⁶Himpo ke, chasênda kăringa bimpe bifwasi birinda byema nguru imurênga, nabyo nti byakime n'irika mo. N'emwea o wasebinduka wemá nguru irênga mbu ebwabesenga we raro.»

Emukisa w'eriira

²⁷Yesu warekia webange ebinwa mbyo, mămína umă munkati n'enteko wákua murenge mukiri mbu: «Emămína íngu wakubutangá n'ikurisha mabere, wakasanírwa!» ²⁸Ina Yesu wásuɓya mbu: «Ebakasanírwa nge bimbi barukirange n'ironja mbu bweba ekinwa cha Ongo.»

Ebea bákóna Yesu wakorĩ bo kashingishiro

(Matayo 12.38-42)

²⁹Bea bingi barekia batumanange hari Yesu, iwe wabucha ieba mbu: «Ebea b'ekiranga kino bema. Basondángé isúnga kashingishiro. Ina bátásungíyo ko kuba ntí inki ka Yona. ³⁰Bushwa ebwabesanga Yona kashingishiro mu bea ba ku Ninawi,^a nge bwabeseyo hotu ani eMwana w'eMwea* kashingishiro mu bea ba runotu. ³¹Mu rotu rwahende, Nyamumbo íngu watukirenga kumbo echuo^b wasêfukayo hima ninu banu bea b'ematu ano kongo wabusongere. Bushwa mbu iwe watukirenga kore nguru mwienda karukira binwa by'ebutesa by'emubake Soromono. Na hano nge harikire ngu waréngá Soromono!

^a 11.30 Soma Yona 3.3-5. ^b 11.31 Soma 1Bami 10.1-10.

³²«Erotu rwa hende rwâkii rweya, bîsa ku Ninawi nabo basefukayo hima ninu ebea b'ematu ano n'ibusongere. Bushwa ibó babundukángá n'ireke esansambi sábó bakiangá barukirá emahubiri a Yona! Na hano nge harikire ngu waréngá Yona!»

Eriso ng'eritára r'emubi

(Matayo 5.15; 6.22-23)

³³«Kusira mwea usachanga eritára na wabise tu ro abe wabumbi ro na mbeketi. Ina urembeanga ro mu kango kongo ebea bakimengi basunga chaka. ³⁴Emeso ng'eritára r'emubi. Kuba emeso abe akaengi shu, emubi wábé uti userika mu chaka. Ina kuba emeso abe abihá-bihá, emubi wábé na o hotu usebese mu mwirimya. ³⁵Bushwa náncho, ukohyanga. Echaka kírí kumunda nabe kitabinduki mwirimya. ³⁶Kuba emubi wábé uti uri mu chaka na kusira kitambo inchi kírí mu mwirimya, kai emubi wábé uti na o wasebese mu chaka, ímbu bakianga eritára rakurishie chaka.»

Yesu watondé eBafarisayo n'ebahani b'eMyomba

(Matayo 23.1-36; Mariko 12.38-40)

³⁷Yesu wakianga waheä ieba, Mufarisayo* umä wére Yesu wêndi karisa bió mu mwae. Yesu wênda mo n'ibucha irisa. ³⁸eMufarisayo ngo wáshishara isúnga Yesu warísa na nti twákushua emine. ³⁹Nampo Nyere kuritu wámwire mbu: «Banu Bafarisayo, banu mushúanga ho ekusungwange mu rusára na mu ntengi. Ina banu murisere mbusha ya bwibi na bumpe bubí kumunda ninu. ⁴⁰Banu birunge! Ntí banu mwosi mbu íngu wabúmbángá imbi bisúngwange ngwabúmbánga hotu kumunda? ⁴¹Kai mwendi musake ebasene n'ebikai imbi birikire kumunda n'esansara sinu nãmbi birikire kumunda n'esantengi sinu. Múmaronjá mbo, ebiti biseshurukara mu mongerero winu.

⁴²«Murikíndá iherwa banu Bafarisayo*! Banu muninkanga Ongo echakumi ch'ematumguru, na ch'isusa, na ch'esanyenyi siti. Ina banu munénángá eriombokara n'inéna erishima Ongo. Bimbyo nge byakomenwa rero ienda bikorange banu. Kiro mwobya tuna erikuto echakumi ch'ebimpe mbyo.

⁴³«Muriherwa banu Bafarisayo*! Banu mumoerenga irika mu bitumbi bya kubusondori mu masinangoki*. Banu mumoerenga tu ná kubá ikeiwa n'isubahwa n'ebea mu sankumanano. ⁴⁴Muriherwa banu! Mususanyiwa n'emasinda ingi asirá tu biteerere, ebea bánantángé o nti tíbasiba tu mbu hari masinda.»

⁴⁵Umä mu bahani b'eMyomba wére Yesu mbu: «eMuhani, mu rieba ongo mbo, na bate utukamba.» ⁴⁶Yesu wámwire mbu: «Na banu ebahani

b'eMyomba, muriherwa! Banu murieshanga ebea mirio yaritohyaa, ina banu bisine mutwerekanga itinge mu yo mu risake bo.

⁴⁷«Muriherwa banu! Banu mwimbishanga emasinda ebatahwa*, ná kubá batitanku binu nge báshurangá bo. ⁴⁸Rashea mbu banu mubéré n'emikorere ya batitanku binu, bushwa mbu basuku báshurangá batahwa, na banu nge mwimbengi bo emasinda. ⁴⁹Nge chasingwangá Ongo mu butésá bwae wéba mbu: «Naseburebeka batahwa hima na ntumwa*. Baseshurayo bimă n'inubya bampe mu bo.» ⁵⁰Ngyasingwa ebea b'ematu ano basetuayo enchama y'ebatahwa eyakubukanga itukire echuo chabumbwa, ⁵¹itukire erishurwa ra Aberi ieya na mu rikwa ra Sakaria^{ch} ewashurwanga mu Numba ya Ongo* munkati n'ebutánda bw'emaherero n'endikaro yashurukara. Íra, nibwirengi mbu enchama y'ebea bati mbi bashurwanga isebeseyo hambasiro n'emintwe yinu.

⁵²«Muriherwa banu ebahani b'eMyomba! Mumabisa erufunguo rw'eririndo erubi rw'erisiba Ongo. Mutukimenga mpo banu bisine. Nămbi basondange ikime, banu mumínírenga bo erubi.»

⁵³Yesu warekia wamasaa mu numba y'eMufarisayo* ngo, ebahani b'eMyomba* hima n'eBafarisayo babucha imusubuke nguru n'imushisha-shisha binwa bingi. ⁵⁴Benda bamwekange binwa kongo bashée buni bwasemusongere bo.

Mahano kuri ebea b'enkuse

(Matayo 10.26-27)

12 ¹Mu kashángi kika-kika, esangenche ningi sa maerefu a bea bákúmánana nti banyantanange. Yesu wabucha kasa ieba n'ebanafunsi* bae mbu: «Mwiranganga n'echachu y'eBafarisayo*, ngerieba mbu enkuse yăbo. ²Kinsi chabiswa kisetaburwayo, na kinsi nama isesibwayo. ³Ngyasingwa ebinwa biti bisêbá banu mu mwirimya biserúkirwayo munkati echaka. N'ebinwa biti bisebayo banu mu nama ekundani kwabisama, biseturwayo hamambio.»

Íngu wakomenwa isubahwa

(Matayo 10.28-31)

⁴Yesu wenderana nieba mbu: «Nibwirengi banu bira bani, anga musubaha rotu imbi bamukochă ishura emubi ho, na batakoche ironja tu kîmpě kikai irénga cha. ⁵Nisebushéa íngu mukomenwa isubaha: mwendi musubaha Ongo bushwa mbu iwe, wamakinda ishura, iwe nge

^{ch} 11.51 Soma Ntangiyo 4.8; 2Biranga 24.20-22.

wamúkocha tu itáa emwea mu marunga. Mu riíra, nibwirengi mbu iwe nge mukomenwa isubaha!

⁶«Kasa bishwi bisanu bisirá busí! Ina Ongo iwe wosi kinsi kimă mu byo. ⁷Iwe wosi iansa n'ebuteo buti bw'emintwe yinu. Kai kiro mwendi musubaha, bushwa mbu banu muraisha nguru irénga bishwi bingi!»

Erisimira n'erítúna Yesu Kirisitu

(Matayo 10.32-33; 12.32; 10.19-20)

⁸Yesu wéba tu mbu: «Nibwirengi mbu kinsi mwea wanirisia munkati na bea, ani eMwana w'eMwea* nani nisemurisiayo munkati n'ebamaraika* ba Ongo. ⁹Ina kinsi mwea wasenitúna munkati na bea, basemutúnayo nae munkati n'ebamaraika ba Ongo. ¹⁰Kinsi mwea webá bubí kuri ani eMwana w'eMwea, wasesasirwayo, ina kinsi mwea wakambá eMutima Washurukara, iwe watasasirwiyo.

¹¹«Ebea basekiayo baburia kabuhukumu mu masinangoki*, abe mu makako ebakwakare n'ebikondó, kiro mwianya mu binwa bisesubyayo banu, abe imbi bisebayo banu. ¹²Bushwa mbu hiha-hiha eMutima Washurukara usebushéayo ebinwa byakomenwa ieba banu.»

Mushinga w'emutumba kiténgi

¹³Mwea umă munkati n'enkumanano wére Yesu mbu: «eMuhani, eba na munakitu wambesi emuhango wani mu mwandu watusierenga tita.» ¹⁴Yesu wamushisha mbu: «Era! Inyé ngwakunironja ibinduke mushunguri winu abe mubanyii w'ebutumba bwínu?» ¹⁵Nampo Yesu wére ebea bati mbu: «Mukohyanga, kiro mwendi mubese na karawa ka behe, bushwa mbu ebehe bitakoche iranga ebuingo bw'emwea, nakiro mbu wamubesě mutumba nguru.»

¹⁶Yesu wákere bo emushinga uno mbu: «Kwarikanga mutumba umă wabesenga na mashwă. Emashwa ngo áse mo mukene mwingi. ¹⁷Wabucha ianikira na kwishisha mbu: «Nikie buni buno bwarukwa ani buari bw'ibike mo emukene wani uti?» ¹⁸Nampo ke wéba mbu: «Niseronja buno: nasekakura esambicho sani kongo nimba simpě nkiri-nkiri sibike mo emukene wani, n'ebimpe behe byani. ¹⁹Kuruma nampo, ani kisine nasiebishayo mbu: "Ani namibike behe bingi itukire myăka mingi. Kai ngíe namiruhuke, nirise, n'omu n'imoa."»

²⁰«Ina Ongo wámwire mbu: «Rero-rero ōngo kiténgi! Mu butu bwa runotu, ōngo ukúkwă. Nampo ke, ebikai biti byarekwibike ōngo byasebese byanye?»»

²¹Yesu wámína ke kinwa mbu: «Bimbyo nge bibesengă kuri emwea íngu wibikengi behe bingi wisine, ina iwe ntíwanswa ibese na kikai mu makako a Ongo.»

Erikwinyihire Ongo*(Matayo 6.25-34)*

22 Kuruma nampo, Yesu wére ebanafunsi* bae mbu: «Ngyasingwa nábwirě mbu: kiro mwianya bushwa n'ebuingo bwinu, bushwa n'ebiserisa banu, abe kiro mwinubya bushwa n'emibi yinu kuba mukûmbară inki. **23** Bushwa mbu ebuingo bwaréngá ebió n'emubi waréngá esanchangi. **24** Musunge ebikona: bitékánga mirime, bitakaonga ná kubá, bisiră buari bw'ibike mo mukene na bisiră mbicho. Ina Ongo uríshanga byo. Kasa banu muréngá kore emirónge! **25** Inyé mu banu, bushwa n'erikwianya rae, wamitarike otu ho rumă mu buingo bwae? **26** Kuba ke mutukoche ironja kikai kikeke buri ncho, banu mwianyange mu bikai bimpe bushwa nki? **27** Musunge kasa ebushukangă esantondo mu mashwă. Sitakoranga murimo, anga kwiruke na nchangi. Ina nibwirengi mbu nakiro emwami Soromono, mu busimé bwae, ntwâmbarangá nchangi yakón da yaréng a n'entondo nima. **28** Kuba ke Ongo wambichange bisu by'emashwa, imbi bisúngwange runotu na bisekâma mukómá n'itawa n'ishikwa, kai ke wata mubumaricha shu banu b'erisimira rikeke?

29 «Kai kiro mwianya mwisondekanya ebyârisa n'iomu banu. **30** Ebpakani b'echuo kino ibó nge basondekanyangă ebikai biti mbyo. Ina banu, Iso winu wosi mbu muráé mu bikai biti mbyo. **31** Kai banu mwendi musodekanya eBwami bwa Ongo kasa, nae usebutarikeyo ebikai bino biti.»

Erikwibike ebütumba mu mbingu*(Matayo 6.19-21)*

32 Yesu wére tu bo mbu: «Banu bea bakeke, kiro mwendi musubaha! Bushwa mbu Iso winu washimanga ibuninka eBwami bwae. **33** Mwendi muchuya ebikai byinu mu risake ebasene. Mwendi mwibike busoki ímbu butabiliyo na butasiriyo, nge kiku kitasiriyo mu mbingu. Inko, ébíbi bateyiyo ko n'erunsenge naro rutarisiyo ebehe mbyo. **34** Bushwa mbu impi habike banu ebütumba bwinu nge harikangă n'emitima yinu.»

Eririndire ikuruka r'eMwami

35 Yesu wére tu bo mbu: «Mwendi murika nti banu mwitunganyanyange ikora murimo n'ematára inu na o nti arika asakange. **36** Mubesenga buri bakori barindirengi nyere kurwabo utukange ekundoa, kongo entambi iserembérá we n'ikongota, hiha-hiha nti bamurundure erubi. **37** Bakasanirwá ebakori imbi basekumanwayo báshéré entambi iseyayo we! Nibwirengi mu riíra mbu: wasembarayo enchangi y'emurimo, warikechi bo n'ishee

bo bió. ³⁸Bakasanirwá ebakori imbi baskumanwayo na Nyere kurwabo nti báshéré munkati ebutu abe mu richa r'ebutu nti bákírí bamurindirengi.

³⁹«Musibanga mbu kuba miné numba wamusibange rero entambi yameya emwibi kashuma mu mwae, watamusiange enumba yae ikakurwe.

⁴⁰Kai na banu mukohyanga, bushwa mbu ani eMwana w'eMwea* nisekurukayo mu ntambi ntíyaanikire rero banu.»

Emukori wakomá n'emukori wemá

(Matayo 24.45-51)

⁴¹Nampo Petero wáshísha Yesu mbu: «Nyere kuritu, mbeni emushinga watukere ōngo watukae ho bate bisine abe w'ebea bati?»

⁴²Nyere kuritu wásúbya mbu: «Inyé ke nge kapíta k'erííra na kárfi na bwenge? Nge íngu watúmwa na nyere kurwabo mwisimane babine ininka bo bió mu ntambi yakomenwa. ⁴³Kakasanirwa ekapíta nko kuba kakumanwa kákiri kakorange emurimo entambi yakuruká nyere kurwabo. ⁴⁴Nibwirengi mu rííra mbu: nyere kurwabo waseria ho ekapíta nko kasimanirí ebehe byae biti. ⁴⁵Ina ekapíta nko kuba kiebesha kisine mbu: «Nyere kuritu wasíá nguru kwendanga we!» N'ibucha ihúmba ebakori banachae babume na bamína, n'ibucha irisa, n'ibucha iomo n'itamira. ⁴⁶Ekapíta nko, Nyere kurwabo usekurukayo erotu ntírwaanikira we n'ekashangi ntíkosí rero we. Nampo Nyere kurwabo wasemukekeraa mo byunda bibí n'imúsúnga buri umá mu mbi bea ntíbinyihirwa.

⁴⁷«Emukori ngu wosi ebyashima nyere kurwabo, ina wámarúkwa kwitunganyanya n'irúkwa ikora imbi byashima nyere kurwabo, waseraswayo tushushu twingi. ⁴⁸Ina emukori íngu wamubesě ntwosi ebishimangá nyere kurwabo, wamakora ebyamusingwa wahumbwa, waseraswayo tushushu tukeke. Emwea waninkwanga bingi, wasekongwayo bingi. Nāngu wabichiwanga bingi waseshishiwayo bingi nguru.»

Yesu weyangá kasionya ebea

(Matayo 10.34-36)

⁴⁹«Neyángá kataa kashá mu chuo, na namushimange nguru kábesí nti kamasaka! ⁵⁰Naria murio wa minúbo íngu wakomenwa iría ani. Na ninubange nguru mu mutima ieya nāmbu bwakíá eminubo njo yábererera! ⁵¹Mbeni banu mwanikirange mbu nareya karisha buhóro mu chuo? Anga! Nibwirengi mbu nareya kárisa isiana. ⁵²Itukire runotu, bea basanu b'uanda rumá basesiana. Bea bashatu bendi babanganange na bábí, na bábí bendi babanganange na bashatu. ⁵³Bamwána n'ishe bendi babanganange, na kikúmí na nina bendi babanganange. Bamwasáná n'inabe bendi babanganange.»

Isiba ebiteerere by'esantambi*(Matayo 16.2-3)*

⁵⁴Yesu wére esangenge s'ebea nabo hotu mbu: «Mumasúnga erutundo rwasaire mu ruharo ruraamanga mo emwishi, hiha-hiha banu mwebanga mbu: «embura iseeke», nayo nti yake nákubá. ⁵⁵N'entambi isúnganga banu eriũũ rasaire uharo rwa kumbo, banu mwebanga mbu: «Kusebese chuka kingi», n'echuka nti chabesa hona. ⁵⁶Banu bea ba nkusé! Banu musibanga ebiteerere by'echuo na by'ekwiyo, bushwa nki mufundwa iteerera ebinwa byetange ematu ano?»

Murongane n'ebarénda binu*(Matayo 5.25-26)*

⁵⁷Yesu wéba tu mbu: «Inki chasingwa banu mutukoche ikora kinwa chakonda inchi chakomenwa ikorwa? ⁵⁸Úmenda kabũrana na mwea, wisumyanga urongane nae munkati n'ense. Kuba ntí mbo, wasekusongere mu makako emushunguri, n'emushunguri nae wamukuría ekubaporisi, n'eporisi nae ntwákutaa mu mwiwóró. ⁵⁹Nikwiréngi mbu utukoche isáa mo kuba ntí utua nensi erufaranga rwa hende.»

Rakomenwa ireke esansambi

13 ¹Mu ntambi njo, bea bimă bêya kature Yesu emwasi ímbũ bwakíángá Pirato watúma bea kashiria bîsa ku Ngariraya bimă, imbi babesenga bachinjange esanyama s'erisibure Ongo. ²Yesu wáshisha bo mbu: «Mbeni banu mwanikirange mbu bîsa ku Ngariraya mbo bakushurwa bumbo, bushwa mbu babesenga bea ba nsambi irénga bîsa ku Ngariraya bampe bati? ³Anga ntí mbo! Ina nibwirengi mbu kuba ntímubunduka ireke esansambi sinu, na banu bati mukúshirirá bumbo hotu. ⁴N'ebea ikúmi na munani ebásikírwanga n'enumba nere mu rubungu rwa ku Siroamu, mbeni banu muhakange mbu ibó babesenga nge bea bema irénga bîsa ku Yerusaremu bati? ⁵Anga ntí mbo! Ina nibwirengi mbu kuba ntímubunduka ireke esansambi sinu, na banu bati hotu mukushirirá bumbo».

Mushinga w'emutí íngu ntíwarebuta byuma

⁶Kuruma nampo, Yesu wákere bo emushinga uno mbu: «Kwabesenga mwea umă wêka mutí wa tini mu rishwa rae r'emisabibu. Otu rumă, wêya kăsonda mu o byuma, ina wárúkwa mo kiro n'echuma kimă. ⁷Nampo, wére emukori w'erishwa rae ndo mbu: «Kaé ke! Ngíe myăka ishata ino neyanga kăsonda byuma mu mutí uno w'etini, ina kárankuso! Konda o, bushwa

mbu ubisha-bishange ho eroto busa-busa.»⁸ Ina emukori ngo wámusako mbu: «Enyere kuritu, rekerere tu kasa o mu mwáka uno. Náshekere tu o n'itereka mu o bumpe buinú. ⁹Kuri ntambi wámubuta byuma mu mwáka musindu, na kuba ntiwabúta ho, nti ngie ukúkondá o.»

Yesu waramyá mumína umă otu rwa Sabato

¹⁰Otu rumă rwa Sabato*, Yesu wabesenga uhanange ebea mu sinangoki*. ¹¹Kai mu sinangoki mo nti muri mumína umă mukoni. Emumína ngo wabesenga wamaronja myăka ikúmi na mumane nt'unubiwange n'ishumbu. Erishumbu ndo rabesenga rarimukunya, na nti watakochanga tu ioro emongo. ¹²Yesu warekia wamusúngă, wamubikira n'imwire mbu: «Ekoyo, umakíndá irama ebukoni bwabe.» ¹³Nampo Yesu wátereka emine yae kuri we, nae wôro emongo hiha-hiha n'ibucha itata Ongo.

¹⁴Ina emukwakare w'esinangoki* wásúnga bubí bushwa na Yesu mu riramyá mwea mu rotu rw'eSabato*. Bushwa nâncho, wére ebea e babesenga batumáná mpo mbu: «Kurikanga matu mutuba ikora. Mwendí mweyange karamyiwa mu matu ngo, ina kiro rwabunduke otu rwa Sabato!»

¹⁵Ina Nyere kuritu wámusako mbu: «Banu bea ba nkusé! Mbeni inyé mu banu íngu wataboranga enkambu abe embúndá yae haminirwangă yo n'ienda komosha yo mecha otu rwa Sabato*? ¹⁶Emumína uno w'erubuto rwa Ibrahímu, wabesenga waminwá na Mushumbu* myăka ikúmi na munani, mbeni ntwakomenwa rero iborwa erotu rw'eSabato?»

¹⁷Yesu warekia wameba mbo, ebarénda bae bati bákwa nkene. Ina enteko iti y'ebea yákokoma mwisúnga emikorere y'ebishisharo biti ebyabesenga bikorange we.

Mushinga w'ekambuto kakeke nguru

(Matayo 13.31-32; Mariko 4.30-32)

¹⁸Kuruma nampo, Yesu wéba tu mbu: «Mbeni eBwami bwa Ongo* bwususana nânki? Namususanya bo nânki? ¹⁹eBwami mbo bwususanyiwa na kambuto kakeke ka harandari, inki kákíangă mwea umă wátíngé n'ieka ko mu rishwa rae. Embuto njo y'oshuka, yábese ke mutí mukiri, n'emirónge yêya k'umba birumba mu santabi saó.»

Emushinga w'echachu

(Matayo 13.33)

²⁰Yesu wéba tu mbu: «Nisesusanya eBwami bwa Ongo* nânki? ²¹eBwami mbo bwususanyiwa na chachu eyakianga mumína umă wakubure yo mu nengo ishata sa nchano y'ironja mikati, ieya na mu ntambi nji enchano iti yábímba.»

Erubi rwekene*(Matayo 7.13-14, 21-23)*

22 Yesu warekia wendange ku Yerusaremu, wéta mu mbungu nkiri-nkiri na mbungu nkeké-nkeké nt'uhanange ebea. 23 Mwea umă wamushisha mbu: «eNyere kuritu, mbeni bea bakeke ho nge baseshukarayo?» Yesu wásubíe ebati mbu: 24 «Mwisumyanga ikime mu rubi rwekene. Bushwa nibwirengi mu riíra mbu bea bingi baseerekayo mbu bakimi mu ró, ina bátâkochiyo.

25 «Etambi miné numba wakíí wamasimana n'irindika erubi, mukûsiayo hambuka n'ibucha ikongota erubi, n'ieba mbu: «Nyere kuritu, turunduri!» Ina wasebusakoyo mbu: «Muntukiriri, ntínosi kusairengi banu.» 26 Nampo ke mukubuchayo imwire mbu: «Twabeséngá turisange n'iomu hima nabe, ubesenga ongo uhanange ebea mu mitangá ya kuritu.» 27 Ina iwe wasebusakoyo tu mbu: «Ntínosi ekusairengi banu. Mutuke kwihhi nani, banu bati bakori bema.»

28 «Mukusungayo Iburahimu, Isake, Yakobo n'ebatahwa* bati mu Bwami bwa Ongó*. Ina banu mukurekerwayo habutara! Nánko mukûreyo n'ishiisha emeno. 29 Ebea basesaireyo ekuti mu chuo, nabo baserikayo nti barisange bió hima mu Bwami bwa Ongó. 30 Murukire! Bimă mu basindu runotu basebeseyo baroso, na bimă mu baroso runotu basebeseyo basindu.»

Yesu wariré erubungu rwa ku Yerusaremu*(Matayo 23.37-39)*

31 Mu ntambi njo, Bafarisayo* bimă beyere Yesu n'imwire mbu: «Tukă hano, írí rabe kumpe, bushwa mbu Herote usondángo ikushura.» 32 Yesu wásako bo mbu: «Mwëndí kere emuterere o mbu runotu na mukómá nasêhensa ebifwasi n'iramya ebakoni, na mukakóma nasekindanya emurimo wani. 33 Kasa nahwa imisa eruendo rwani runotu, mukómá na mukakóma, bushwa mbu emutahwa* ntwakomenwa ishurwa mu rûmpě ubungu kuba ntí ku Yerusaremu.

34 «Banu bísa ku Yerusaremu! Banu nge mushuranga ebatahwa*, n'esantumwa sibutumirengă Ongó banu mushuranga to na makoi. Meta mingi năkusondá ibusonja bukiana enkókó yasonja etunyau kumunda ebyubi byae, ina banu mwitínire! 35 Murukire ke! Erubungu rwinu rusesia kima. Na nibwirengi mu riíra mbu: mutunisungiyo tu ieya n'erotu rusebayo banu mbu: «Wákasanirwé íngu weyá mu rina ra Nyere kuritu.»^a

^a 13.35 Soma Saburi 118.26.

Yesu waramyá mukoni mu rotu rw'eSabato

14 ¹Otu rumă rwa Sabato*, Yesu wênda kara bió mu numba ya mukwakare umă wa Bafarisayo*. Ebea mbi babesenga kumunda n'enumba bárika nti bamukairirengi mwisúnga ebisekora we. ²Na habusondori na Yesu, kai nti hari mwea umă wasamba bukoni bwibimba-bimba emubi. ³Yesu wáshísha ebahani b'eMyomba n'eBafarisayo mbu: «Mbeni eMyomba yitu yarisía abe yahangire iramyá mwea otu rwa Sabato?» ⁴Ina bíbebere. Nampo ke, Yesu wátíngé mu mukoni, wamuramyá n'imwire mbu wêndi rae. ⁵Kuruma nampo, Yesu wáshísha ebea mbo mbu: «Inyé munkati ninu, emwana wae abe enkambu yae yámahuka kumunda n'ekiribu cha mecha, wamurukwă ieya tete n'ikuto yo mo bushwa ho mbu otu rwa Sabato?» ⁶Ina ntíbakochanga isako mu binwa mbyo.

Ongo wasétarisha imbi bihíchá

⁷Yesu warekia wamasunga ebukiange ebakubikirwa bitóma eburiki bwa roso, wáninka bo ihano mbu: ⁸«Kuba mwea wakubíkira mu ndoa, angienda utairire irika mu kitumbi cha kubusondori. Munantambi kwakubikirwa umpě mwea wakurenga itúndá. ⁹Nāngu ewakububikiranga banu bábí wámeya, wákwirí mbu: «Sierě uno ekitumbi warike.» Nampo ukúsimană n'ienda karika mu kitumbi cha kuruma na nkene singi. ¹⁰Ina kuba ubikirwa, wendanga kărika mu kitumbi cha kuruma, kongo íngu wakukubikiranga wasekia wēya, wákwirí mbu: «Emirani, iya kúno kubusondori.» Nampo ukúbésě nti umaninkwa itúndá munkati n'ebea bati mbo ebaríréngi hima. ¹¹Ngyasingwa kinsi mwea witaríshanga wasehichiwayo, na ngu wihichanga wasetarishiwayo.»

¹²Kuruma nampo, Yesu wére emwea ewakumubikiranga mbu: «Kuba ōngo ubikirange ebea mu karamu, rabesa mukoma-koma abe mwiyo, kiro ubikira ho bira babe, abe basike binu, abe ebuti babe, abe ebatúmbá imbi bári mwendende nabe, kongo nábó bákubíkírayo. Nampo risebeseyo buri ikukuruchie ebyaninkanga ōngo bo. ¹³Ina kuba ubikira bea mu karamu, wendi ubikira ebasene, esankáta, ebirema, n'ebihumihumi. ¹⁴Nampo, Ongo wasekukasane bushwa mbu ebea bano basirá ch'erikukuruchie. Na wasekukuruchieyo erotu rusekiayo ebakorangá byakonda báfuka.»

Emushinga w'erirísa ebió mu Bwami bwa Ongo

(Matayo 22.1-10)

¹⁵Mwea umă mu bea ebabesenga barisange hima na Yesu, wakíanga warukirá ebinwa mbyo, wére Yesu mbu: «Wakasanírwá emwea íngu userayo bió mu Bwami bwa Ongo*.»

¹⁶ Yesu wámukere emushinga uno mbu: «Kwarikanga mwea umă wáronja bió bya karamu, wábikira bea bingi. ¹⁷Entambi y'eririsa yarekía yamarumira, watúma emukori wae wëndi kere ebakubikirwa mbu: «Mweye ke bushwa mbu ebikai biti byamarumira.» ¹⁸Ina kira mwea wabucha kwireme. Waroso wámwire mbu: «Nakuchura ishwa, na nahwa ienda kasunga ro. Nikuhemange unisasire.» ¹⁹Umpě wámwire mbu: «Nakuchura nkambu ikúmi s'ihinga, na nendange kereka to kuba sámukoră. Nikuhemange unisasire.» ²⁰Na umpě wámwire mbu: «Năkuhérucha, na bushwa năncho ntěyi ko.»

²¹«Emukori wákuruka kature nyere kurwabo ebwamamusubie bo. Nampo, miné numba wasubuka n'iere emukori wae o mbu: «Endá tete ekubutara bukíri, eta na mu mitangá y'erubungu, ringá ebasene, esankáta, ebirema n'ebihumihumi bakimi múno.» ²²Kuruma nampo, emukori wákuruka n'ieba mbu: «Enyere kuritu, ebiti byakunerenga óngo namakora byo, ina kumunda enumba kúkírí buari.» ²³Nampo ke, nyere kurwabo wámwire mbu: «Endá mu sâse s'esambungu na s'ekutunsari kăringa ko bea, kímia bo na kamimo kongo enumba yani yarísa bea. ²⁴Nibwirengi mbu nga n'uma mu bákubíkírangá ani ewaserora mu bió byani.»»

Buni bwamukía emwea wabese mwanafunsi wa Yesu

(Matayo 10.37-38)

²⁵Otu rumă, bea bingi babesenga bamisange Yesu. Wábunduka kuri bo n'iere bo mbu: ²⁶«Kinsi mwea íngu usondángo inimisa, wánchime irénga ishe, na nina, na mukari, n'ebăna bae, na basike bábó, na bisi bábó. Na wánchime irénga mbu bwishima we. Kuba ntí mbo, watakoche ibese mwanafunsi* wani. ²⁷Kinsi mwea ngu watangaria emusaraba^a wae n'inimisa, watakoche ibese mwanafunsi wani.

²⁸«Mbeni inyé mu banu kuba usondángo iumba numba nkiri, wamurukwă kasa irika n'ibucha iansa ebehe ebisekoresha we kongo wasiba imbi bikwengi we ebyamukindanyă ebwimbe? ²⁹Bushwa mbu wámimba emúsíngi, kuruma nampo wafundwa ikindanya ebwimbe bw'enumba njo, ebea bati mbi basenda basungange yo basenda bamuseange ³⁰n'ieba mbu: «Emwea uno wakubuchanga iumba na wafundwa tu irisía enumba!»

³¹«Mu ntambi mubake murebe usondángo ikwana na umpě mubake, rakomenwa warike kasa, kongo wásúnga, kuba ietere emaa Ebasura bae erefu sibi, wamúkocho ihíma míné eurikire n'ebasura erefu makumi abi.

^a 14.27 *Eriia emusaraba*: hano Yesu uhunange iere ebanafunsi bae mbu bahwa irisia inuba n'ikwa.

³²Kuba wasúngá mbu watamakocha, kai wasekía ukiri kore, wamutúma bea kuri míné bámúshíshe mbu wakié buni kongo washée buhóro. ³³Nge bumbo hotu kuri banu! Kusira umă mu banu ewamukocha ibese mwanafunsi* wani kuba watamakocha isía ebiti bíkwengi we.»

Emukwa ngu usira mufa

(Matayo 5.13; Mariko 9.50)

³⁴Yesu wére tu bo mbu: «Emukwa^b úshamukangă. Ina emukwa wamariminya ebushamuke bwaó, kinki ke tu echamukocha irishie tu o ebushamuke? ³⁵Emukwa ngo nti usira tu mufa abe mu roto abe mu buinú. Ebea batángă o hambuka. Íngu uri n'emate erirukira warukire!»

Emushinga w'emburi nji yariminanga

(Matayo 18.12-14)

15 ¹Otu rumă, ebakongori b'ehoro na bampe bea ba nsambi batumanángă kumushi na Yesu kongo bamwerikire. ²eBafarisayo* n'ebahani b'eMyomba* barekía basunga mbo, babucha imutera mbu: «Bushwa nki ke emwea uno ukokengi ebea b'ebibí n'írísá hima nabo!» ³Nampo ke Yesu wákere bo emushinga uno mbu: ⁴«Kuba mwea umă mu banu uri na mburi sae iyana, na nima mu to yámarimina, buni bwamuronjá we? Nge bumbo wahwa isía emakumi mwenda n'emwenda mu muchacha n'ienda kăsonda eyakurimina mupaka wásheí yo! ⁵Wasekía wamashée yo, wasekuruka na ngoa ntwaria yo mu bituri byae! ⁶Na wasekía wameya mu mwae, wasêbikira bira bae n'ebanunsane n'iere bo mbu: «Mweye mumoe hima nani, bushwa mbu emburi yani nji



Emurangi washee emburi yae nji yariminanga (15.5)

^b 14.34 Emukwa ushembwange hano, wabesenga buri ikoi, na ngwabesenga ukoreshiwanga mu rirunga ebió. Wamakinda iriminya ebushamuke bwaó, nti bátáá o.

yariminanga namashéé yo!»⁷ Nibwirengi mbu, mu mbingu murikanga ngoa nĩngi kuba mwea umă ho wansambi wamabunduka n'ireke esansambi sae, irénga bea makumi mwenda na mwenda baombokara imbi ntfbáráé tu mwireke esansambi sábó.»

Emushinga w'ekichere nchi chariminanga

⁸ Yesu wéba tu mbu: «Kuba mămína umă ũri na bichere ikúmi bya noro, na wámariminya kimă mu mwae, nge bumbo wahwa isacha eritára n'ihae enumba mwisondekanya mupaka wáshef cho!»⁹ Wasekía wamashéé cho, wasebikira barakasi bae n'ebanunsane n'iere bo mbu: «Mweye tumoé mongo, bushwa mbu ekichere chani nchi chariminanga, namashéé cho!»¹⁰ Nibwirengi mbu bumbo nge bukíanga ebamaraika* ba Ongo bamo entambi mwea umă wa nsambi wámabunduka n'ireke esansambi sae.»

Mushinga w'emwana ngu wariminanga

¹¹ Yesu wákere bo umpě mushinga mbu: «Kwarikanga mwea umă nt'uri na basike bae bábí. ¹² Emwansare wére ishe mbu: «Etita, nikuhemange umbesi emuhango w'emwandu wani mu butumba bwabe.» Nampo ishe wabanyie bo ebütumba bwae.

¹³ «Kuruma na matu makeke, emwansare wachüya emwandu wae na kwiire mu kímpě chuo cha kore. Năńko washata n'ebehe byae mu bikai bya busa-busa. ¹⁴ Warekia wamakinda ebehe byae biti, mu chuo ncho mwakime rwaka rwasuma, wabucha irúkwa na bió by'erírísa. ¹⁵ Nampo, wēnda kakore mwea umă w'echuo ncho. Emwea ngo wamutúma mu mashwă ae karanga esampunu^a sae. ¹⁶ Wabesenga uhunange mbu wamurísange mu bió ebirisange mõ esampunu, ina watashei mwea werimuninka mu byo.

¹⁷ «Nampo ke, emushukira ngo wabucha kwiebesha mbu: «Ebakori ba tita bashatange n'ebió, ina ani nge nikwange n'erwaka kúno!» ¹⁸ Nasesimana n'ienda kuri tita, n'imwire mbu: "Etita, namakora nsambi kuri Ongo na kuri ōngo hotu. ¹⁹ Ntínakomenwa tũ ibikirwa mbu ani musikyabe, ina unitingenga burí umă mu bakori babe."»

²⁰ «Nampo, emushukira wásimana n'ienda kuri ishe. Na warekia ũkiri kore n'enumba, ishe wámusunga, wamukwire bonso nguru. Wámukányáhe, wámukoke n'imurimba.

²¹ «Musike we wámwire mbu: «Etita, namakora nsambi kuri Ongo na kuri ōngo hotu. Ntínakomenwa tu ibikirwa mbu ani musikyabe.» ²² Ina

^a **15.15** Mu kutime k'eBayuta, empunu nsirwa bushwa mbu itariwanga n'itatingirwanga mo. Binwa bya nkene n'uneno nguru kuri eMuyuta.

ishe wére ebakori bae mbu: «Mwendi tete karisha nchangi yakomá na mumwambiche yo. Mumwambiche n'upete na birato.^b 23 Na murishe chana cha nkambu echanone, mubae cho kongo twáronja bió bya karamu, 24 bushwa mbu musikyani uno wabesenga wamákwa ina wamafúka, wabesenga wamarimina ina wamashekana.» Nampo babucha irisa bió by'ekaramu.

25 «Mu kashángi nko, entangi yae yabesénga iri ekwishwa. Mu rikuruka rae, warekia uri kwihi n'enumba yábo, wárúkíra engoma n'ebea basimbange n'imína. 26 Wabikira umá mu bakori n'imushisha kuba kinki nge chasaa nko. 27 Emukori ngo wámusako mbu: «Motó

wabe ngwamarembere, na iso wamámukere nkambu, bushwa mbu emwana e wameya na nti munkangwe.» 28 Mukú wae wasubuka nguru n'itina ikime mu numba. Nampo ishe wasaa n'imuhema mbu wakimi. 29 Ina emusike wásako ishe mbu: «Namakukore myáka mingi, na nironjanga ebiti byinirengá öngo. Ina utungänininkanga n'echána ch'empene mbu nani nirise bió bya karamu hima na bira bani. 30 Ina musikyabe uno ewakukindanyanga ebehe byabe bitu mwisingirana n'ebihanga, entambi yameya we, umamukere nkambu nji yanone!»

31 «Ishe wámwire mbu: «Emwana'ni, turikanga hima nabe kirotu, n'ebítí mbi birikangá nani byabe. 32 Kai rakomenwa irisa bió by'ekaramu n'imoa, bushwa mbu motó wabé uno wabesenga wamákwa ina wamafúka. Wabesenga wamarimina ina wamashekana.»»

Mushinga w'emukori mukongobanya

16 1 Yesu wákere ebanafunsi* bae emushinga uno mbu: «Kwarikanga mutumba umá. Emutumba ngo nt'uri na mwea wae w'imurange ebehe byae. Emurangi ngo, ebea benda kámusongere kuri nyere kurwabo mbu ushatange n'ebehe byae. 2 Nyere kurwabo wámubikira n'imushisha



Emwana ngu wariminanga wakokerwa n'ishe (15.20)

^b 15.22 Mu kutime k'eBayuta, ebyakia ishe w'emusike wamuninka byashéa mbu wamamurisia buri mwana, ina ntí buri kahungu abe mukori. Enchangi njo yabesénga ropo imbarwanga mu otu rukiri, ina ntí ya murimo. Erupete rwashea mbu emusike waninkwa tu murimo w'erisimanire ebikai bitu bya mumwabo. N'ebirato byashéa mbu iwe ngié uri huru, bushwa mbu etuhungu twabeséngá tutambaranga birato.

mbu: Íní myasi nji irukirange ani eyebange ebea bushwa nabe? Bushwa nãcho, niansíri ebehe byani bitu enompena, bushwa mbu utûrangi tu byo.»

³«Emurangi ngo wabucha kwíebesha mbu: «Nyere kuritu usondángo inihensa mu murimo. Naseronja ke buni? Emaa erihinga nsira o, n'erihema-hema naro risendishie nkene. ⁴Mbo! Namasiba ebuseronja ani kongo entambi nji basenihensa mu murimo, bampe bea bendi banikokengi mu manumba ábó.» ⁵Nampo wabikira kinsi mwea ngu watingenga mwinda wa nyere kurwabo. Wáshísha ewaroso mbu: «Mbeni ongo'ri na mwinda wa nki wa nyere kuritu?» ⁶Emwea ngo wámusako mbu: «Nkunguru iyana sa mafuta.» Emurangi wámwire mbu: «Tíngě ekaratasi kábé, rika hano tete, andika makumi asanu.» ⁷Kuruma nampo, wabikira umpě mwea n'imushisha mbu: «Na óngo urí na mwinda wa nki?» Nae wámusako mbu: «Tuterere iyana twa nchano ya ngáno.» Emurangi wámwire mbu: «Tíngě ekaratasi kábé, andika makumi munani.» ⁸Nampo ke, nyere kurwabo emurangi ngo mukongobanya wamutata bushwa n'ebwenge bwae. Nameba mbo bushwa mbu ebea b'echuo kino baronjangã ebinwa byábó by'ebukongobanya hima na banachabo irénga mbi bárí mu chaka.»

⁹Bushwa nãcho, Yesu wéba tu mbu: «Nãni nibwirengi mbu: mwendi mukoresha ebehe byinu by'ebukongobanya by'echuo kino mwironja bwira. Bushwa mbu, ebehe mbyo bisekiayo byamarukwa, Ongo wasebukokokeyo mu mbingu mu numba y'ebuingo bw'ematu ati. ¹⁰Emwea urí n'erííra mu bikai bikeke, ungo nge mwea w'erííra hotu mu bikai bingi. N'emukongobanya mu bikai bikeke nge mukongobanya hotu mu bikai bingi. ¹¹Kuba ke banu mufundwa ibese bea b'ííra mwiranga ebehe by'ebukongobanya bya kino chuo, mbeni inyé nge usebwínyihireyo mwibuninka behe by'erííra? ¹²Kuba mutumakochã iranga bya bampe bea mu rííra, inyé ke ngwamubuninkã binu?»

¹³«Kusira mukori wamúkocho ikóre bakwakare bábí. Bushwa mbu wásebaá ho umã n'ishima umpě, abe waserandakana ho n'uma n'inéna umpě. Mutukoche ikóre Ongo n'ikore ebehe mongo.»

Yesu wahaná mahano mingi

(Matayo 11.12-13; 5.31-32; Mariko 10.11-12)

¹⁴eBafarisayo* bakiangá barukirá ebinwa mbyo, básea Yesu bushwa mbu babesenga báshimá behe nguru. ¹⁵Yesu wére bo mbu: «Banu mwishéanga kuri ebea mbu banu ho nge bea baombokara, ina Ongo usibanga ebiri mu mitima yinu. Bushwa mbu, ekisungwanga mu meso ebea mbu kikai kikiri, Ongo iwe wanéná cho.

¹⁶«eYomba ya Musa n'ebitabo by'ebatahwa* nge byabesengá byemisange ebea ieya na mu matu a Yohana Mubatisai. Itukire mu matu

ngo, nitúranga eMwasi Wakonda w'eBwami bwa Ongo*. Itukire mu matu ngo eMwasi Wakonda w'eBwami bwa Ongo nge uturwange ho mu matu ano, na kira mwea uronjange maa ae ati kongo wákime mu Bwami mbo. ¹⁷Ratamba kuri echuo n'embingu irimina, ina eMyomba ya Ongo itatukiyo mo anga na kakinwa kakeke.

¹⁸«Kinsi wabume wahénsá mukari n'ibinga umpě, wakórá nsingirani. Nǎngu wabinga mǎmína ngu wahenswa na moke nae wakórá hotu nsingirani.»

Mushinga w'emutumba bána Rasaro

¹⁹Yesu wákera tu emushinga uno mbu: «Kwarikanga mutumba umǎ. Emutumba ngo wabesenga umbaranga nchangi sakonda nguru na sa busí kwasuma nguru, na nt'urisanga shu kirotu. ²⁰Kwarikanga hotu na musene umǎ mbu nge Rasaro. Rasaro ngo, emubi wae uti wabesengá urisere bihurũ. Wabesenga urikanga hamiango mw'emutumba ngo. ²¹Wabesenga wisanenga ebió mbi bikirengi itukire mu mesa y'emutumba ngo. N'esambibi sabesenga seyangǎ karámba ebihuru byae.

²²«Otu rumǎ, Rasaro wákwa. Ebamaraika* bêya kǎmuringa n'imuria hari Ibrahimi. Emutumba nae wákwa, n'ebeta benda kǎmutáa. ²³Emutumba warekia uri mu marunga nt'unubange nguru, watarisha emeso, wásúnga Ibrahimi kore, na Rasaro kumushi nae. ²⁴Wárake Ibrahimi n'ieba mbu: «Etita, ninubange nguru mu kashá kano, níkwiri bonso! Nitúmíri Rasaro warubike entonga y'emurimba wae mu mecha kongo waboboya erwami rwani.»

²⁵«Ina Ibrahimi wámusako mbu: «Emwana'ni, uaníkirangá mbu ubésengá na butumba bwingi mu chuo, ina Rasaro iwe nt'unubange. Na hano ke, uri mu sangoa na ōngo unubange. ²⁶Usibanga tu mbu hari kiribu kikiri nguru munkati na bate ninu. Nge bumbo, ebari kúno, kuba bahunange isoka kuri banu nko, bátámukocha. N'ebárí kuri banu nko, batamukocha isoka kúno kuri bate.» ²⁷Emutumba wéba mbu: «Etita, nikuhemange útumé ke Rasaro mu mwitu, ²⁸bushwa mbu basike bitu basanu bárí mo, wēndi kǎtonde bo kongo batahieriyi mu minubo ino.» ²⁹Ibrahimi wámusako mbu: «Basike binu bárí n'ebitabo bya Musa nǎmbi by'ebatahwa*, bēndi bamisange ímbũ ebweba byo!» ³⁰Emutumba wéba mbu: «Anga, etita Ibrahimi! Ritamende mpo nensi. Ina kuba kuri íngu wamufukǎ wamenda kǎtonde bo, basereke esansambi sǎbó.» ³¹Ina Ibrahimi wámwire mbu: «Kuba banakinu mbo batamukocha irukira emitiro ya Musa na y'ebatahwa, batakochi hotu irukira emahano angu wafuka.»»

Yesu uhanange bushw'esansambi n'emusasiro

(Matayo 18.6-7,21-22; Mariko 9.42)

17 ¹Yesu wére ebanafunsi* bae mbu: «Ebinwa by'erikiria ebea mu sansambi bisenda bíbesengí ho ko, ina emwea ngu usingwange bampe bákíre mu sansambi waherwá! ²Rakomenwa rero kuri emwea ngo wáminwé osho mu ríkoti n'imutáa mu nyansa, kúkía wakíría umă mũmbi ebakeke bano.^a ³Mukohyanga! Kuba munakinu wakórá kibi umuhananga. Na kuba wasia ebubi bwae umusasiranga. ⁴Kuba wakuronjee bubí meta arinda mu rotu na ukweyerengi ho meta arinda kakukonga musasiro, umusasiranga ho.»

Yesu uhanange bushwa n'erisimira

⁵Kuruma nampo, esantumwa* sêre Nyere kuritu mbu: «eNyere kuritu, tuongereri erisimira.» ⁶Nae wásúbya mbu: «Kuba mumabesengi n'isimira rirengekane n'ekambuto k'eharandari, mumakochange iere emuti uno mbu wíkutu mpo hari o, na wëndi kwikome mu nyansa, na o wamuburukirengi.»

Emukobe wahwa ikóre nyere kurwabo

⁷Yesu wéba tú mbu: «Kuba umă mu banu uri na mukobe umuhingengi abe umurangengi bituana, entambi wamusúngá ukurukange ekwishwa, mbeni nyere kurwabo wamumushishă mbu weye na warise? ⁸Anga! Buno nge busemwire we: «Nironjei kasa bió, kuruma nampo mbara nchangi sakoma kongo únishee ebió. Entambi nji nasekinda irisa n'iomu, n'ongo ke nturísă n'iomu.» ⁹Mbeni banu mwanikirange mbu nyere kurwabo w'emukori ngo wamámutată bushwa mbu wakukora ebyakumwirenga we? Anga! ¹⁰Nge búbo hotu na banu. Entambi mukóra biti ebwakubuhema Ongo ikora, mwendi mweba mbu: «Bate bakobé ho busa, twamakora ho imbi ebyakongwa bate ikora.»»

Yesu waramyá babembi ikúmi

¹¹Yesu wakíanga wendange ku Yerusaremu, wétere mu byati by'echuo cha ku Samaria* na cha ku Ngariraya. ¹²Entambi wakíanga wamakime mu kubungu kimă, babembi ikúmi bêya kuri we. Básímána kore nae,^b ¹³na nti bakuange mbu: «eYesu Nyere kuritu, tukwiri bonso!»

^a 17.2 Hano, kuri bea bimă bahakange mbu ebakeke mbo nti nge bári n'erisimira rikeke. ^b 17.12 Itukana n'eMyomba ya Musa, emubembi ntwâkomenwanga ieya kwihî n'ebea. Soma Barawi 13.46.

¹⁴Yesu warekia wamasunga bo, wére bo mbu: «Mwëndí kishéá kuri ebakuhani*.» Barekia bendange ko, bárama. ¹⁵⁻¹⁶Umă mu bo wabesenga Musamaria*. eMusamaria ngo warekia wamasunga mbu wamarama, iwe wákuruka kuri Yesu na nt'utatange Ongo mu murenge mukiri. Wíndamya embaso yaé kwansi mu makako a Yesu. ¹⁷Nampo ke Yesu wáshísha mbu: «Mbeni ntí bea ikúmi nge bakurama? Ebampe mwenda bárí kuni? ¹⁸Mbeni kusira umpě munkati nabo wakúruká kátata Ongo irénga emweni uno?» ¹⁹Yesu wére eMusamaria ngo mbu: «Simană, írí rabe. Erisimira rabe ramakuramya.»

Buni nge busêyayo eMwana w'eMwea

(Matayo 24.23-28,37-41)

²⁰Kuruma nampo, eBafarisayo* bashisha Yesu mbu: «Mbeni eBwami bwa Ongo* busêyayo mu ání matu?»

Wásako bo mbu: «eBwami bwa Ongo* butangeya buri kikai kisungwange mu meso. ²¹Kusira mwea wasêbayo mbu: «Mukai, nge bunó!» Abe: «Nge bubó!» Murukire, eBwami mbo ngie buri munkati ninu.»

²²Kuruma nampo, Yesu wére ebanafunsi* bae mbu: «Kuseyayo ntambi nji mukusondekanyayo inisúnga ani eMwana w'eMwea*, nakiro mu otu rumă ho, ina mutunisungiyó. ²³Ebea basebwireyo mbu: «Mukai, nge uó kukó!» Abe mbu: «mukai, nge uno kúno!» Ina kiro mumisayo bo. ²⁴Bushwa mbu ani eMwana w'eMwea nasekia nakurukă, nisesúngwayo buri kimpunya bukiana chasungwa mu sankaro siti n'irisha chaka mu chuo kiti. ²⁵Ina nakomenwa kasa inuba nguru n'itinwa n'ebéa b'ekiranga kino. ²⁶Ebyabesenga mu matu a Noa, nge bisebeseyo hotu mu matu nge asekiayo ani eMwana w'eMwea nakúrukă. ²⁷Bushwa mbu mu matu ngo, ebea babesenga barisange n'iomó, babingange n'ibingwa ieya na mu rotu ndu rwakiana Noa wákime mu bwato. Nampo, mbura nyankende yáke, yarisía echuo n'ishiria ebea bati. ²⁸Nge bumbo bwabesenga hotu mu biranga bya Roti. Ebea babesenga barisange n'iomó, nti bachurange n'ichuya, nti bekange n'iumba. ²⁹Ina erotu rwakiana Roti wátuka ku Sondoma, Ongo wáhicha rúngére rwa kashá ituka mu mbingu n'ishiria ebea bati.^{ch} ³⁰Nge bumbo hotu busebeseyo erotu ruseyayo ani eMwana w'eMwea.

³¹«Erotu ndo, kuba mwea uri hamambio watásikiyo tú mwikime mu numba mbu waringe mo bikai. Na kuba mwea usebeseyo ekwishwa watákurukiyo tu ku kwae. ³²Mwanikiranga mukari wa Roti!^e ³³Kinsi mwea ngu wasehunayo iranga ebuingo bwae, waseriminyayo bo. Ina

ch 17.29 Soma Ntangiyo 18.20-33; 19.1-25. e 17.32 Soma Ntangiyo 19.26.

íngu waseriminyayo bo, waseramyayo bo. ³⁴Nibwirengi banu: Bea bábí basebeseyo mu ntange nima mutu, umă wasingwayo na umpě wasesiayo mpo. ³⁵Bamína bábí basebeseyo bátútángé mongo, umă waserierwayo na umpě wasesiayo. [³⁶Bea bábí basebeseyo mwishwă rima, umă waserierwayo na umpě wasesiayo.]»

³⁷Ebanafunsi bamushisha mbu: «Nyere kuritu, mbeni ebinwa bino bisêtayo kuni?»

Yesu wásako bo mbu: «Ehasebeseyo ekında nge hasekiayo esânju sakumanana.»

Emushinga w'emushumbakari n'emushunguri

18 ¹Yesu wákere ebanafunsi bae emushinga uno mwishéa bo mbu rakomenwa kiro bendi batetérage mu rihema Ongo ematu ati. ²Wéba mbu: «Mu ubungu rumă, kwarikanga mushunguri wa binwa umă nti watasubahanga Ongo. Iwe wabesenga watasubahanga na nti tíwirae mu mwea uti-uti. ³Mu rubungu ndo, kwarikanga hotu mushumbakari umă. Emushumbakari ngo wabesenga umweyerenga ematu ati imwire mbu: «Nikerĩ ebinwa byani ishú ebirikanga nani n'emuréndá wani.»

⁴«Ina kwetanga matu mingi emushunguri ngo nt'umutinirenga. Kuruma nampo waanikira kumunda nae wisine mbu: «Nakiro mbu ntasubahanga Ongo na ntínirae mu mwea uti-uti, ⁵ina bushwa mbu emushumbakari uno waniruhya nguru, nasemuninka eriíra rae kongo watêndi tú weyange hano kănitanninga.»»

⁶Nampo Nyere kuritu Yesu wéba mbu: «Murukire ímbu bweba emushunguri uno wemá! ⁷Nge bumbo Ongo nae, ebea mbo barondorángá we, nămbo bamurakengí mutu na mumwishi wăkereyo bo erubansa ishú na watâsíyo mu risake bo. ⁸Nibwirengi mbu iwe wasebuninkayo eriíra rinu tete. Ina ani eMwana w'eMwea* nasekíayo nakurukă, mbeni nasekumanayo mu chuo nti mukiri bea bári n'erisimira?»

Emushinga w'eMufarisayo n'emukongori w'ehoro

⁹Kwarikanga bea mbi babesenga bitatange mbu ibó nge bea baombokara mu makako a Ongo na nti bánéná bampe. Ngerikia ke Yesu wákere bo emushinga uno mbu: ¹⁰«Otu rumă, bea bábí bendángá kăhema kumunda n'eNumba ya Ongo*. Umă wabesenga Mufarisayo* na umpě nti mukongori wa horo. ¹¹eMufarisayo wásimana nt'uhemange mu mutima wae mbu: «Tita Ongo, nakutata bushwa mbu ani ntarikanga buri ebea bampe: ibó banyai, bea ba bibí na basingirani. Nikutatange hotu bushwa mbu ntíniri buri emukongori uno w'ehoro. ¹²Nihemanga mahemo erikwitinisha irisa

n'iomo meta abi mu riinga, na nininkananga echakumi ch'ebikai bitu mbi bishéengă ani.»

¹³«Ina emukongori w'ehoro iwe wásimana kore, na watashimi n'irame ekwio. Ina wíkaso-kaso mu bukuba mu rishea ebonso bwae na nt'uhemange mbu: «Tita Ongo, nikwiri bonso bushwa mbu ani mwea wa bibí!» ¹⁴Nampo ke, Yesu wéba mbu: «Nibwirengi mbu emukongori w'ehoro wákuruka kukwae na nt'wamáansirwa eriíra mu makako a Ongo, ina ntí eMufarisayo ngo. Bushwa mbu kinsi mwea ngu witarishanga wasehichiwayo, ina kinsi mwea ngu wihichanga wasetarishiwayo.»

Yesu wakasane etubonsobonso

(Matayo 19.13-15; Mariko 10.13-16)

¹⁵Otu rumă, bea bimă barishie tu Yesu tubonso-bonso mbu warié mine hiyo na to. Ebanafunsi* barekia basungă mbo, báfinyae bo. ¹⁶Ina Yesu wéba mbu bamurishii ebana mbo n'ieba tu mbu: «Múreki ebana beye hano! Kiro muhangire bo, bushwa mbu eBwami bwa Ongo* bari kuri bea mbi ebasusanyiwa nabo. ¹⁷Mu riíra nibwirengi mbu: kinsi mwea ngu wafundwa ikóke eBwami bwa Ongo bari mwana mukeke, watakimiyo mo kárankuso.»



Yesu ukasanengi ebana (18.16)

Yesu ushambarange na mutumba

(Matayo 19.16-30; Mariko 10.17-31)

¹⁸Kuruma nampo, mukwakare umă wa Bayuta wáshisha Yesu mbu: «eMuhani wakonda, mbeni nokie buni kongo nashée ebuingo bw'ematu ati?» ¹⁹Yesu wamushisha mbu: «Umebá mbu nakóndá bushwa nki? Kutarikanga mwea wakonda, ina Ongo wisine ho. ²⁰Ntíongosi ebweba emyomba: «Angienda usingirana, angienda ushúrá mwea, angienda ushuma, angienda ushukashuka, wendi usubaha iso na nsoko.» ²¹Emwea ngo wásubie Yesu mbu: «Emyomba iti njo, nironjanga ebwebayo itukire ebuyu bwani.» ²²Yesu warekia warukirá ebinwa mbyo, wámwire mbu:

«Urukwa ho kinwa kimă nchi chahwa ironja ōngo: endá kachuya ebikai bitu mbi biri nabe, tǐngě ebusoki mbo na ubanyii byo ebasene. Kuba uronjá būbo, ukūbésě na butumba mu mbingu. Kuruma nampo, weyanga unimise!» ²³N'emwea ngo warekia wárukira ebinwa mbyo, wátindibara nguru bushwa mbu iwe wabesenga mutumba nguru.

²⁴Yesu warekia wamasunga mbu emwea ngo wamatindibara nguru, wéba mbu: «Ííra, ntí ratamba mu basoki ikime mu Bwami bwa Ongó*.

²⁵Rasuma nguru kuri engamia ikime mu kiribu ch'enandi ina rasuma tú nguru mu mutumba ikime mu Bwami bwa Ongó.»

²⁶Ebea mbi babesenga barukirange ebinwa mbyo beba ke mbu: «Reroro, inyé ke ngwashukarayo!» ²⁷Yesu wére bo mbu: «Echasuma kuri ebea nge chatamba kuri Ongó.» ²⁸Nampo Petero wámwire mbu: «Kaé ke, bate twamakinda isía ebitu biri rero nitu n'íkumísa ōngo!» ²⁹Yesu wére bo mbu: «Nibwirengi mu riíra: kuba emwea wasia enumba yae, abe mukari, banachabo, babuti bae bushwa n'eBwami bwa Ongó*, ³⁰Ongó wasemuninka bikai bingi nguru hano hansí, na mu matu ngi aseayo, waseninkwayo ebuingo bw'ematu ati.»

Yesu waturá tu emwasi w'erikwa n'erifuka rae

(Matayo 20.17-19; Mariko 10.32-34)

³¹Kuruma nampo, Yesu wátunge ebanafunsi bae ikúmi na bábí, wére bo mbu: «Múnítée emate ke! Bate nge bano twendange ku Yerusaremu. Mu rubungu ndo nge kuri ebitu mbi byaandikwángá n'ebatahwa* itukana nani eMwana w'eMwea*, na nge kusébererá byo. ³²Basenisibura mu mine y'ebapakani,^a basenisea, basenikambaa n'initúráe intě. ³³Basenirasaka tushushu, kuruma nampo basenishura. Ina nasefuka erotu rw'emeta ashatu.»

³⁴Ina esantumwa ntíbarukiranga kikai bushwa mbu ebinwa mbyo byabesengá byabisamá. Ntíbasibanga kinki chakianga Yesu wahuna iere bo.

Yesu waramyá kihumihumi

(Matayo 20.29-34; Mariko 10.46-52)

³⁵Yesu wakíanga wásonda ikime mu rubungu rwa ku Yeriko, wákumana kihumihumi kimă chabesenga charika mwendende n'ense nti kikongakongange. ³⁶Warekia warukirá erukindo rw'ebea bingi betange, wáshísha mbu: «Mbeni kinki cheta nku?» ³⁷Ebea bamwíre mbu: «Yesu wa ku Nasareti ng'wetange.» ³⁸Ekihumihumi ncho chakua mbu: «eYesu Musike wa Ndauti, nikwiri bonso!»

^a 18.32 Ebapakani bea imbi ntí Bayuta.

³⁹Ebea mbi babesenga basondórá bamufine mbu wakobe, ina iwe wakua ketu na nguru mbu: «eYesu Musike wa Ndauti, nikwiri bonso!»

⁴⁰Yesu watindira, wére bo mbu bamurishé hari we. Warekia wêya kwihi na Yesu, Yesu wamushisha mbu: ⁴¹«Ōngo uhunange nikuronjei kinki?»

Wásúbya mbu: «eNyere kuritu, nisondánge mbu nikai tu.» ⁴²Nampo, Yesu wámwire mbu: «Èo ke kaé tu! Erisimira rabe ramakuramya.» ⁴³Hiha-hiha wabucha tu ikae, wamisa Yesu na nt'utatange Ongo. Ebea mbi basungángá mbo nabo batata Ongo.

Yesu wakumanáná na Sakayo

19 ¹Yesu wakíanga wakimě mu rubungu rwa ku Yeriko, wéta munkati na ro. ²Kai mu rubungu ndo nti m̄ri mwea umă mbu nge Sakayo. Sakayo ngo wabesenga kapíta k'ebakongori b'ehoro, na nti mutumba. ³Wabesenga uhunange isúnga Yesu, ina bushwa mbu wabesenga mwih, ntíwakochangá imúsúnga bushwa n'ebwingi bw'ebéa. ⁴Bushwa năncho, wátibita tete kubusondori n'ebéa n'itaya mu mutí kongo wásúnga Yesu, bushwa mbu himpo nge hakomenwanga ho ieta Yesu. ⁵Yesu wakíanga wêya mpo, wárarame ekwio n'iére Sakayo mbu: «Sakayo, hită tete, bushwa mbu runotu nakomenwa isame mu mwabe.» ⁶Sakayo wáhita tete n'ienda kakoke Yesu mu mwae na ngoa.



Sakayo hiyo n'emuti (19.5)

⁷Ebea bati bakiangá basunga mbo, babucha imutera mbu: «Rero-rero, Yesu wendá kasame mu numba ya mwea wa nsambi!» ⁸Ina Sakayo wásimana, wére Yesu mbu: «eNyere kuritu, nasebanyie ebasene muhango w'ebehe byani, na kuba nashumanga kikai cha mwea mwimuhusa, nasemukuruchie cho meta anye.» ⁹Yesu wéba mbu: «Runotu, Ongo wamashukaya enumba ino bushwa mbu emwea uno hotu mwana wa mu ruanda rwa Ibrahimu, ¹⁰bushwa mbu ani eMwana w'eMwea* nareya kăsonda ebariminanga n'ishukaya bo.»

Mushinga w'ebakori bashatu

(Matayo 25.14-30)

¹¹ Yesu wákera tu emushinga uno kuri mbi babesenga bamurukirengi. Nāmbu ebwakianga ngié ubungurengi ku Yerusaremu, ebea báanikira mbu eBwami bwa Ongó* ngié buri këya hiha-hiha. ¹² Nampo ke Yesu wákere tu bo umpě mushinga mbu: «Kwarikanga wabume umă nti murúsi. Emurúsi ngo wēnda mu chuo cha kore kongo bāmusímika ko buri mwami. Kuruma n'erisímikwa, wákuruké tú kasimanire echuo chae. ¹³ Wakíanga wásonda ienda, wábikira bea ikúmi mu bakori bae. Wábanyie bo kira mwea kichere kimă cha noro,^a n'iere bo mbu: «Mwēndí kănonka n'ebehe mbyo ieya nāmbu busekurukáyo ani.»

¹⁴ «Ina ebea b'echuo chae babesenga bāmuyongwa. Bushwa nāncho, bátúma bea kuruma nae kongo bamwíre mbu ntíbáshima mbu wabesi mwami wăbó. ¹⁵ Ina emwea ngo wasímikwa ho buri mwami, n'ikuruka tu ku kwabo. Warekia wamakuruka, wéba mbu bamubíkiri ebea ikúmi mbi ebabanyiengá we ebehe mwisíba kuba kira mwea wakukimisha sínga. ¹⁶ Emukori waroso wēya, wéba mbu: «Enyere kuritu, ekichere chambesenga ōngo chamabuta bimpe ikúmi.» ¹⁷ Emwami wamusubie mbu: «Ushamucha, ōngo mukori wakonda. Ímbu bwamabesa ōngo mwea w'inyihirwa mu bikai bikeke, nasekuninka isimanire mbungu ikúmi.» ¹⁸ Emukori w'emeta abi nae wēya, wéba mbu: «Enyere kuritu, ekichere kimă chambesenga ōngo chamabuta bimpe bisanu.» ¹⁹ Emwami nae wámwire mbu: «Na ōngo hotu, ukúsimanire mbungu isanu.» ²⁰ Kuruma nampo, umpě mukori nae wēya n'ieba mbu: «Enyere kuritu, ekichere chambesenga ōngo nge kino. Naranganga cho mu muri w'eribike mo behe. ²¹ Năkukusubahána bushwa mbu ōngo mwea wasuma. Ōngo ukutonga entibyakubikanga ōngo n'ikao entibyakuhinganga ōngo.»

²² «Emwami wamusubie mbu: «Ōngo mukori wemá! Nasékukere erubansa itukana n'ebwaměba ōngo. Usibángá mbu ani nirikanga mwea wasuma, na nibákanga entibyakubikanga ani, na nikaonga entibyakuhinganga ani, ²³ mbeni ke bushwa nki ufundwángá iría ebehe byani ekubánki? Mu rikuruka rani, namákúmánange ebehe byani nti byamabúta!» ²⁴ Ngerikia wére ebea babesenga mpo mbu: «Emukori ngu, mumunyake ekichere kimă ch'enoro ncho tete, na múninké cho íngu uri n'ebichere ikúmi.» ²⁵ Nabo bamwíre mbu: «Enyere kuritu, íngu ngié uri na bichere ikúmi!» ²⁶ Wásubie bo mbu: «Nibwirengi mbu kinsi mwea ngu uri na kikai ng'waseninkwayo

^a 19.13 Kikoroto kimă chabesenga kikorerwanga mibisi iyana.

kîmpě, ina eusira kikai wasenyakwa tu n'ekakeke kárí rero nae. ²⁷Wéba tu mbu: ebarénda bani mbi ebatinángá mbu ntabesi mwami wábó, murishe bo hano na mushure bo mu meso áni.»

Yesu wakímé ku Yerusaremu

(Matayo 21.1-11; Mariko 11.1-11; Yohana 12.12-19)

²⁸Yesu wakíanga wameba ebinwa mbyo, wasondore ekikembe ch'ebéa mu rienda ku Yerusaremu. ²⁹Wakíanga wásonda ieya kwihi n'erubungu rwa ku Betefake na ku Betania kumushi n'erou rw'eMiseituni, wátúma banafunsi* bae bábí, wére bo mbu: ³⁰«Mwëndí mu rubungu eruri kubusondori ninu. Mũkía mumeya kuro, mukusungă chana cha mbúndá chámínwa kitangaria nensi umpě mwea, muboronga cho na murishe cho hano. ³¹Kuba mwea wabushisha mbu bushwa nki mwobora cho, mumusakonga mbu: «Nyere kuritu waráé mu cho.»»

³²Ebanafunsi mbo bēnda. Bákúmana ebikai bití ímbu bwakúkianga Yesu wére bo. ³³Barekia b'oborange echana ch'embúndá cha, bísá cho báhisha bo mbu: «Mbeni banu mwoborange echana ch'embúndá bushwa nki?» ³⁴Basako bo mbu: «Nyere kuritu waráé mu cho.»

³⁵Ebanafunsi barishie Yesu echana ch'embúndá cha. Batereka enchangi sábó hiyo n'emongo w'embúndá, ituka mpo batárísha Yesu



Yesu hiyo n'embúndá (19.36)

hiyo nayo. ³⁶Yesu wakíanga ukiri mu ruendo, ebea nabo nti bánsansange esanchangi sábó mu munse.^b ³⁷Wakíanga ubungurengi mu rubungu rwa ku Yerusaremu, ihita n'erou rw'eMiseituni, ebanafunsi* babesenga bamoá nguru na nti batatange Ongo mu murenge mukiri bushwa n'ebishisharo biti byasúngánga bo. ³⁸Babesenga bebange mbu:

«Wákasani rwé eMwami ngu weyange mu rina ra Nyere kuritu!

Mu mbingu kubesi buhóro,

Na Ongo watatwe!»^{ch}

³⁹Bushwa nãmbó, Bafarisayo* bimã munkati n'ekikembe ch'ebéa, bere Yesu mbu: «eMuhani, finé ebanafunsi* babe mbu bákobé!» ⁴⁰Yesu wásako bo mbu: «Nibwiringi banu: kuba ebea bano bãmubibirã, emakoi asékúá.»

Yesu wariré erubungu rwa ku Yerusaremu

⁴¹Yesu wakíanga urikasáá ku Yerusaremu, warekia wasúngã kuro, wabucha ire. ⁴²Wéba mbu: «Kuba na ōngo umusibange ebyamukurishiengi ebuhoro runotu! Ina ubiswa bo, utukoche isúnga bo enompena! ⁴³Kuseyayo matu ngi asekiyayo ebarénda babe basekutimbayo kongo bakukwanisha. N'entambi basekiá bamumba erukito rw'erikwiranga kwihi ninu, nampo ke basekuekenyayo mu sankaro siti. ⁴⁴Basekushiriayo shũ-shũ, ōngo n'ebãna binu. Batakusieriyo kiro n'ikoi hambasiro na rimpe, bushwa mbu Ongo wameya kãkushukaya, ina ntí ukumuteerera!»

Yesu wahénsá ebachurusi mu Numba ya Ongo

(Matayo 21.12-17; Mariko 11.15-19; Yohana 2.13-22)

⁴⁵Yesu wakíanga wamakime habutara bw'eNumba ya Ongo*, wabucha ihénsa ebachurusi mpo, ⁴⁶wére bo mbu: «Mu Mitiro Yashurukara, Ongo wéba mbu: «Enumba* yani isebeseyo numba ya mahemo.» Ina mumabundura yo ibese numba inji ibisamengi mo ebíbi!»^e

⁴⁷Kirotu, Yesu wabesenga uhananga ebea kumunda n'eNumba ya Ongo*. Ebakwakare b'ebakuhani*, ebahani b'eMyomba* hima n'ebampe bakwakare babesenga básondangã buni bwamúmuyã bo. ⁴⁸Ina batáshéí mbu bwamuronjã bo, bushwa mbu ebea bati babesenga bamurukirirengã nguru.

^b 19.36 eBayuta bakiangã bákókengi emukwakare, bánsansangã esanchangi sábó mu munse mwimunika itúnda. ^{ch} 19.38 Soma Saburi 118.26. ^e 19.46 Yesu washemba ebachurusi mbu ibó bíbi bushwa mbu babesenga báhunangã mbu ebea báchure ebikai byábó kongo basibura byo kuri Ongo mu Numba ya Ongo. Babesenga bachuyangã ebikai mbyo busí kwasuma nguru kuri ebea. Soma Isaya 56.7



Yesu uhensange ebachurusi mu Numba ya Ongo (19.45)

Emaa a Yesu asaa kuni?

(Matayo 21.23-27; Mariko 11.27-33)

20 ¹Otu rumă, Yesu wabesenga uhanange n'ihubiri ebea eMwasi Wakonda kumunda n'eNumba ya Ongo*. Ebakwakare b'ebakuhani* n'ebahani b'eMyomba* hima n'ebikondó by'eBayuta bamusaire nsisu, ²bamushisha mbu: «Ebinwa bino, twĩri inyé ngwakukutuma karonja byo, abe inyé ngwakukuninka emaa erironja byo?»

³Yesu wásubie bo mbu: «Nani nibushishange kinwa kimă. Munĩri ke, ⁴mbeni Yohana wakutonga emaa eribatisa kuni? Kwa Ongo abe kuri ebea?» ⁵Nampo, bábucha ihakanyana mbu: «Kuba twamwire mbu emaa ae asaange kwa Ongo, wasetushisha mbu: «Bushwa nki ke ntĩmukumusimira?» ⁶Kuba twamwire tu mbu emaa a Yohana asáá kuri ebea, ebea bati basetushura na makoi, bushwa mbu ebati basimira mbu Yohana wabesenga mutahwa* wa Ongo.»

⁷Nampo bámusubie ke mbu: «Bate ntĩtosi kwakianga Yohana wakuto emaa eribatisa ebea.» ⁸Yesu nae wére bo mbu: «Nani hotu ntăbwiri mbu mu maa ányé nge aronjange mo ani ebinwa mbi.»

Mushinga w'ebakori bema

(Matayo 21.33-46; Mariko 12.1-12)

⁹Kuruma nampo, Yesu wákere ebea emushinga uno mbu: «Kwarikanga wabume umă ngu wahinganga ishwa ra misabibu. Wásombya ro bahingi

bimã kongo benda bamuninkange muhango mu mirime, nae wênda mu chuo cha kore matu mingi. ¹⁰Emirime yakianga yamase, emwea ngo watúma mukori wae umã kuri ebahingi mbu bamuninke emuhango wae mu mirime. Ina ebahingi mbo bahumba emukori ngo n'imuhensa, n'imukurucha kobokobo. ¹¹Miné erishwa wátumire tu bo umpě mukori, ina bamuhumba hotu n'imukambaa, n'imukurucha kobokobo. ¹²Wátumire tu bo mukori wa meta ashatu, nae hotu bamubabaya n'imutáa kumushi n'erishwã. ¹³Nampo ke, miné erishwa wéba mbu: «Nasekía ke buni? Mbo! Nasetúma ke musikyani, kitwana chani, munantambi básemusubaha.» ¹⁴Ina ebakori mbo barekia basunga emwana ngo weyange, bamwende rwanko, beba mbu: «Uno nge miné emwandu w'erishwa ríno, kai tumushure kongo twasia na ro.» ¹⁵Bámutinge, bámutáa kumushi n'erishwã n'imushura.

«Nampo Yesu wáshísha ebea mbu: Ebahingi mbi, mbeni miné erishwa wamuronjá bo buni? ¹⁶Waseya kashiria ebahingi mbo n'ininka ro bampe bahingi.» Ebea barekia barukira mbo, beba mbu: «Ebinwa buri mbyo, kiro byatuhieroyo rotu!» ¹⁷Ina Yesu wásindera bo n'iere bo mbu: «Múníri kuba eMitiro Yashurukara ino yebá buni!

«Erikoi ratawanga n'ebimbi,

iro nge ramabese ikoi rikiri r'enkuso y'enumba.»^a

¹⁸Kinsi mwea ngu wasekireyo mu rikoi ndo wasenechaayo, nãngu wasehukirwayo na ro risemubunguraayo.»

¹⁹Ebahani b'eMyomba* n'ebakwakare b'ebakuhani* barekia bamarukira mbo, basiba mbu Yesu wamakera emushinga ngo bushwa nabo. Hiha-hiha básonda imutinge, ina bákwa böba bushwa n'ebwingi bw'ebea.

Eritúa ehoro ya Kaisari

(Matayo 22.15-22; Mariko 12.13-17)

²⁰Ebakwakare mbo b'eBayuta babucha ikairire Yesu kongo bashée kinwa chimusongere kuri emukwakare w'eBaroma. Nampo ke básonda bea, batúma bo kuri Yesu. Ebea mbo bironjángá buri bea baombokara, kai babesenga basondange itingire Yesu mu binwa byae kongo bámusibura kuri ebakwakare b'echuo. ²¹Ebea mbo bamwíre mbu: «eMuhani, bate twosi mbu ebinwa byebangã öngo n'ebihanangã öngo ebea birikangã byaombokara. Utwiraenga rabe mu birira bya bea, ina öngo uhananga bo binwa byaombokara by'ense ya Ongo. ²²Eo twiiri ke, mbeni eMyomba yitu yarisía ituwa ehoro kuri Kaisari abe anga?»

^a 20.17 Soma Saburi 118.22.

²³Ina Yesu warekia wamäkengura ebwamamutéá bo ebinwa mbyo, wére bo mbu: ²⁴«Munishée kasa kikoroto kimă.» Nampo ke wáshísha bo mbu: «Mbeni ensusanya ino yanye? N'erina ríno raandikwa hano mbeni ranye?» Nabo basubya mbu: «Bya Kaisari.» ²⁵Nampo ke Yesu wére bo mbu: «Kai mwendi muninka Kaisari ebikai mbi byae, na Ongo nae mbi byae.»

²⁶Ebea mbo ntíbakochanga imushée mo kinwa echamumutingirě bo mu mbi ebyabesenga byebange we munkati n'ebéa. Ina báshishárangá mu kinwa nchi chasubienga we, bákóba!



Ebehe by'emwami Kaisari (20.24)

Mbeni ebakwire basefukayo?

(Matayo 22.23-33; Mariko 12.18-27)

²⁷Kuruma nampo, Basandukayo* bimă beyere Yesu. (eBasandukayo nge bebangă mbu ebakwire batafukiyo.) ²⁸Bamushisha mbu: «eMuhani, Musa watwandikirenga mu kitabo ch'eMyomba bunu mbu: «Kuba mwea wabinga na wámakwá usira mwana, munachabo wahwa ibinga emushumbakari kongo wabutire íngu warikwa băna.» ²⁹Nge bumbo, kwarikanga misike írinda ya bura buma. Entangi yábinga mămína, ina yákwa nti tíyasia mwana. ³⁰W'emeta abi nae wátinge emushumbakari ngo, ina nae wákwa nti tíwabuta n'emushumbakari. ³¹Kuruma nampo, w'emeta ashatu nae hotu búbo. Rabesenga bumbo-bumbo mu bati barínda. Ebati bákwangá nti tíbáributa nae anga na mwana umă. ³²Kuruma nampo emushumbakari ngo nae wákwa. ³³Mbeni ke, erotu rw'erifuka, emămína ngo wasebeseyo wanye, bushwa mbu emisike írinda iti yamubinganga?»

³⁴Yesu wásubíe bo mbu: «Mu chuo kino, ebea babinganangă. ³⁵Ina ebea mbi ebasungwa mu makako a Ongo mbu bakomenwa ifuka mu rikime mu Bwami ebuseyayo, batâbingiyo abe ibingwa. ³⁶Batâkwiyo tu. Bushwa mbu basebeseyo burí bamaraika. Ibó nge băna ba Ongo bushwa barífuka. ³⁷Musa washéanga shŭ-shŭ mbu ebakwire basefukayo, ekwaandikanga we itukana n'ekitundi ch'ekashá.^b Híhă nge habikira we Nyere kuritu mbu Ongo wa Ibrahímu, Ongo wa Isake na Ongo wa Yakobo.» ³⁸Yesu wéba

^b 20.37 Soma Ituka 3.1-6.

tu mbu: «Ongo ntí Ongo w'ebakwire, ina iwe Ongo w'ebári ho; ebea bati bári ho bushwa na we.»

³⁹ Bahani bimă b'eMyomba* bamwĩre mbu: «eMuhani, umasúbyá shu.»

⁴⁰ Kuruma nampo, kusira mwea íngu werekangá imushísha tu kinwa kiti-kiiti.

Kirisitu mukiri irénga Ndauti

(Matayo 22.41-46; Mariko 12.35-37)

⁴¹ Kuruma n'ebinwa mbyo, Yesu wáshísha ebea mbu: «Bushwa nki ebea bebange mbu Kirisitu* nge Mwana wa Ndauti? ⁴² Ntí Ndauti wisine ke ngwebanga mu kitabo ch'eSaburi mbu:

«Nyere kuritu Ongo wakweré Nyere kuritu mbu:

"Rika mu kuboko kwani kw'ekwabume,

⁴³ ieya n'erotu ndu rusekia ebarénda babe bábése kikai ch'eritereke mo ebisando byabe^{ch}.")

⁴⁴ «Kuba Ndauti wakubikira Kirisitu mbu «Nyere kurwabo», buni ke tu Kirisitu ngo ngwamubesě musike wa Ndauti?»

Mukohyanga kuri ebahani b'eMyomba

(Matayo 23.1-36; Mariko 12.38-40)

⁴⁵ Ebea bati bakiangá bakírí batéange Yesu emate, wére ebanafunsi* bae mbu: ⁴⁶ «Mukohyanga n'ebahani b'eMyomba*! Ibó bashimangă ietana-etana na nchangi sareha-reha. Na bashimangă tu ikeiwa munkati n'ebae n'irika mu bitumbi bya kubusondori by'emasinangoki* nănkuriwanga ebió. ⁴⁷ Banyakangă ebashumbakari ebikai byábó biti. Na bahemangă tu mahemo a mundiendie kongo basúngwa n'ebae. Bushwa năncho, Ongo wasehukumuyo bo nguru!»

Ebisabo by'emushumbakari musene

(Mariko 12.41-44)

21 ¹ Yesu wakíanga ũri mu Numba ya Ongo, watámbya emeso mu bea, wásúnga ebukiange ebatúmbá bária ebisabo byábó mu nkă y'ebisabo. ² Wásúnga tu mushumbakari umă musene íngu weyangá nae karia mo twabikoroto túbí. ³ Nampo Yesu wéba mbu: «Nibwiringi mu riíra, emushumbakari uno musene, iwe nge wamakuto bisabo bingi irénga mbi ebyamakia ebea bati bakuto. ⁴ Bushwa mbu ebati bano, ebisabo byamakuto bo ibyo muhango wambi byakusianga mu behe byábó nti bamakindanya

kasa emirao yābo iti. Ina emushumbakari uno, iwe mu busene bwae, wamakuto ebiti biri rero nae by'erimusake mu buingo bwae.»

Yesu waturá mwasi w'eribiha r'eNumba ya Ongó

(Matayo 24.1-2; Mariko 13.1-2)

⁵Bea bimă babesenga bashambarange bushwa n'eNumba ya Ongó*. Babesenga bebange mbu yimbwa mu makoi akóndá-kóndá hima na bimpe bikai mbi byakíangá ebea básaba Ongó. Ina Yesu wére bo mbu: ⁶«Bino ebisungange banu, kwásêya matu ngi mutusungiyi tu ikoi rima hambasiro na rimpe, ebisusu bitu bisekakurwayo.»

Ebinwa by'ematu a hende

(Matayo 24.3-14; Mariko 13.3-13)

⁷Ngerikia ebanafunsi bae bamushisha mbu: «eMuhani, mbeni ebinwa mbi byebange ōngo byasetayo mu ání matu, na buni nge busekíayo ebea basiba mbu ebinwa mbyo biri keya?» ⁸Yesu wásako bo mbu: «Mukohyanga, kiro muhuswa na mwea uti-uti. Bushwa mbu bea bingi baseyayo mu rina rani n'ieba mbu ibó ke nge Kirisitu, entambi yameya! Ina kiro mumisa bo. ⁹Mukúkíayo murukira emyasi y'ebita n'ebushokoshoko, kiro musubahi bushwa mbu ebitu mbyo byakomenwa kasa isúngwa, ematu ngo echuo kisebeseyo ntíchahieré nensi engendero ya cho.»

¹⁰Yesu wéba tu mbu: «Bea ba chuo kimă basekwanayo na bea ba kímpě chuo, na bwami buma busekwanayo na bumpe bwami. ¹¹Kwasetayo karingiri kákiri mu chuo. Kusebeseyo rwaka rwingi na makoni mingi ásuma mu byuo. Kusesungwayo biteerere bya bishisharo ituka ekwio.

¹²«Ina kubusondori n'erísúngwa r'ebinwa mbyo, ebea bendi bábúmínange n'ibunubya, kongo musambishwa mu masinangoki* n'ibutáa mu mwiýóróró. Na básenda baburiange tú mu makako ebami n'ebakwakare b'echuo bushwa nani. ¹³Ietere mbyo, mukwenda banu mwebange ebinwa ebyosi banu bushwa nani. ¹⁴Kino nge chasibiriranga banu: kiro mwinubya na kwishishirisha mbu mbeni buni nge busenda bwebange banu. ¹⁵Bushwa mbu ani ngi nendi nibuninkange ebinwa by'ebutesa ebisenda byebange banu, ieya n'entambi nji ebarénda binu batendi bakochange ienga byo abe itina byo. ¹⁶N'ebabuti binu, na basike binu, na banakinu, na bira binu nabo basebusiburayo kuri ebakwakare. Na bimă munkati nínu basekererwayo ubansa rw'ikwa. ¹⁷Ebea bati basebubaayo bushwa n'erina rani. ¹⁸Ina mu bitu mbyo, kusira anga n'uteo rumă rw'emintwe yinu indu ruseriminayo. ¹⁹Mwendi mwiandiya, bushwa náncho mukushukayayo ebuingo bwinu.»

Erishamburwa ra ku Yerusaremu*(Matayo 24.15-21; Mariko 13.14-19)*

20 Kuruma nampo, Yesu wênderana n'ieba mbu: «Mukâkíayo musungã ebasura batimba erubungu rwa ku Yerusaremu, musibanga mbu ngie ruri kashamburwa. **21** Nampo, ebea mbi basebeseyo mu chuo cha ku Yundea bábekĩ mu sângu, nãmbi basebeseyo ku Yerusaremu bátuké kuro. Nãmbi basebeseyo mu tunsari kiro bákúruka tũ.

22 «Bushwa mbu ematu ngo ngyasekíayo Ongo wahukumu ebea kongo ebiti mbi byebwangá mu Mitiro Yashurukara bíberereré.^a **23** Mu matu ngo, risebeseyo buhanya kuri ebamána barito na mbi barishange ebana mabere, bushwa mbu kusebeseyo minubo mingi mu chuo ncho. Na Ongo waseshéayo ebea mbo mbu iwe wasúbúké bo. **24** Bimã baseshurwayo mu myere na bampe basendayo rereke mu byuo by'esankaro siti. Nãmbi ntíbosi Ongo basenantayo ku Yerusaremu ieya nãmbu busekíayo ematu aninkwangá bo árumira.»

Erikuruka ra Yesu Kirisitu*(Matayo 24.29-31; Mariko 13.24-27)*

25 Kuruma nampo, Yesu wéba tu mbu: «Ebea basesungayo biteerere mu mwĩshĩ, mu mwëri na mu sankekeni. Na hano hansĩ, ebea basekwayo koha n'itingirwa na bõba bushwa emibimbi n'emirurumo y'enyansa. **26** Ebea baseriminyayo ebwenge bushwa n'ebõba mu rianikira ebinwa mbi bisetayo mu chuo. Bushwa mbu ebiti mbi biri n'ema mu mbingu bisetenjiwayo. **27** Kuruma nampo, ebea basenisungayo ani eMwana w'eMwea* bweyange ani mu rutundo na maa hima na busimé bwingi. **28** Mu ntambi ebinwa mbyo bisekíayo byabucha isúngwa, musimananga n'ibese na maa, bushwa mbu ematu inu erishukara ameya.»

Ebiteerere by'erikuruka ra Yesu*(Matayo 24.32-35; Mariko 13.28-31)*

29 Kuruma nampo, Yesu wákere ebea emushinga uno mbu: «Mwĩhanisanga mu mutĩ w'etini n'emítĩ impě: **30** Entambi nji yasunga banu emasani aó abúchá ishuka, banu musibanga mbu ekiranga chakonda ngie kírĩ kéya. **31** Nge bũmbo, mukâkíayo musungã ebinwa mbyo ngie byetange, musibiriranga mbu eBwami bwa Ongo* ngie burĩ keya. **32** Nibwirengi mu ríira mbu: ebinwa bino biseberereshiwayo na bea bimã b'ematu ano

^a **21.22** Soma Osea 9.7.

nensi nti t́bakwa. ³³Embingu n'echuo bisetayo, ina ebinwa byani ibyo bitetiyo kárankuso.»

Erotu rwa hende ruseyayo nsisu

³⁴Kuruma nampo, Yesu wéba mbu: «Mukohyanga! Emitima yinu kiro yabinduke n'embusha y'erisonda irisa ringi, n'itamira, na kwínubya bushwa n'ebuingo bwínu. Kuba ntímukae shu, erotu rwa hende ³⁵rusebeseyo ímbu búkianga emuteo wátíngé. Bushwa mbu erotu ndo ruseyayo, rusesarimiyayo ebea bati b'echuo. ³⁶Mwendi mukohya na mwendi muhema kira ntambi. Mu rikía mbo, mukushee emaa eribeka ebinwa mbi biseyayo n'emaa erisimana mu makako nani, ani eMwana w'eMwea*.» ³⁷Kirotu ndu rwakianga Yesu wabesenga usibanange mwihana ebea mu Numba ya Ongo*, wabesenga wendanga kasame mu rou rw'eMiseituni. ³⁸Na kirotu muranga-ranga, ebea bati babesenga béyangă kamurukira ha Numba ya Ongo.

Enama y'erishura Yesu

(Matayo 26.1-5; Mariko 14.1-2; Yohana 11.45-53)

22 ¹Erotu rukiri rw'emikati nji isira chachu, rwabikirwa mbu Pasaka*,^a rwabesenga ngíe ruri keya. ²Ebakwakare b'ebakuhani* n'ebahani b'eMyomba* babesenga basondange buni buseshurishayo bo Yesu, ina babesenga basubahange ebea.

Yuta warisia isibura Yesu

(Matayo 26.14-16; Mariko 14.10-11)

³Nampo ke, Mushumbu* wákime mu mutima wa Yuta Isikarioti, umă mu santumwa sa Yesu. ⁴Yuta wênda kashambara n'ebakwakare b'ebakuhani*, hima n'ebakwakare b'ebasura mbi barangangă eNumba ya Ongo, kongo warana nabo buni busesibure we bo Yesu. ⁵Ebakwakare mbo bashima nguru, na bárana nae mbu basemuninka behe. ⁶Yuta wárisia, wabucha isonda ntambi yakóna y'erininka bo Yesu n'lebea nti t́bósi.

Yesu warisa ebió bya hende hima n'ebanafunsi bae

(Matayo 26.17-25; Mariko 14.12-21; Yohana 13.21-30)

⁷Erotu rukiri rw'emikati nji isira chachu rweya. Mu rotu ndo, eBayuta babesenga bashurangă mburi bushwa n'erotu rukiri rw'ePasaka. ⁸Yesu

^a **22.1** ePasaka yashembwa hano nge yasubukia erotu ndu rwatukanga Baisiraeri mu bukóbé bwa Farao ku Misiri, ina ntí nge Pasaka y'erifuka ra Yesu Kirisitu.


watúma Petero na Yohana, wére bo mbu: «Mwendi katuteke bió by'erotu rukiri rw'ePasaka* kongo twarísa.» ⁹Bamushisha mbu: «Mbeni ushima twëndĩ katekere byo kuni?» ¹⁰Wére bo mbu: «Mwendi mu rubungu rukiri. Mumeya ko, mukukumana mwea umã waria irea ra mecha. Emwea ngo mumumisanga mu numba nji yasekime mu we, ¹¹na mwerenga miné mo mbu: «Muhani ukushishange kuba hání nge hari buari mu numba haseríre we ebió by'ePasaka hima n'ebanafunsi* bae.» ¹²Nae wasebushéa buari bukíri ekwio ínka ekwamatunganyiwa. Nänko nge kutekĩ banu ebió by'ePasaka.» ¹³Ebanafunsi mbo benda. Bakiangá bameya ko, bákúmána ebikai biti mbu bwakíangá Yesu wére bo. Nampo, bateke ho ebió byábó by'erotu rukiri rw'ePasaka.

Ebió by'erikandire mõ Nyere kuritu

(Matayo 26.26-30; Mariko 14.22-26; 1Bakorinto 11.23-25)

¹⁴Entambi yakianga yameya, Yesu n'esantumwa* sae báríka n'ibucha irisa. ¹⁵Wére bo mbu: «Nákuhunángá nguru irisa ninu ebió bino by'erotu rw'ePasaka* kubusondori n'erinuba rani! ¹⁶Bushwa nibwiringi mbu ntárisiyo tu ninu Pasaka ieya n'erotu ndu rusekiayo narísa imbi byarumira mu Bwami bwa Ongó*.»

¹⁷Nampo, Yesu wátíngé erusára, wátata Ongó n'ieba mbu: «Mutingĩ erusára runo, na mwomu banu bati. ¹⁸Bushwa nibwiringi mbu itukire enompena, ani nt'omu tuyo ndifai* ieya n'erotu ndu ruseyayo eBwami bwa Ongó*.»



Yesu ubengange emukati (22.14)

¹⁹Kuruma nampo, Yesu wátinge mukati, na watata Ongo. Wanoa o n'ininka esantumwa sae n'iere bo mbu: «Uno nge mubi wani ewamakinda isiburwa bushwa ninu. Mwendu muronja buno murinikandira.»

²⁰Bakiangá bamahea irisa, Yesu wáninka hotu bo usara rwa ndifai n'ieba mbu: «Erusára runo ng'erirai rishasha r'enchama yani eisekubuka bushwa ninu. Iro ng'erirai ndi raronjanga Ongo mu nchama yani inji isekubuka bushwa ninu.

²¹«Ina mukaenga! Emwea ngu usenisibura ngie urisange hima nani. ²²Mu riira, ani eMwana w'eMwea* nasékwa ímbu bwakíangá Ongo wéba. Ina wahérwá emwea ngu wasenisibura!» ²³Nampo, esantumwa sabucha ishishana munkati nato kuba inyé ngwasekora ekinwa ncho!

Inyé nge mukwakare?

²⁴Kuruma nampo, ebanafunsi babucha buhaka bukíri bw'isiba kuba inyé ngwamubesé mukwakare munkati nabo. ²⁵Yesu wére bo mbu: «Mu bea mbi ntíbosi Ongo, ebami bábó basimanirengá bo mu maa. Ina ebakwakare bashimangá ebea bábikiré bo mbu: «Bakori ba binwa byakonda.» ²⁶Ina kiro byendi bibesange mbo munkati ninu. Kinsi mwea ngu mukwakare mu banu ngwakomenwa ibese buri iwe nge mwanunke, n'emukwakare wahwa ibese buri iwe nge mukori. ²⁷Mbeni inyé nge mukwakare mu bea bano: íngu wariká mwirisa ebió abe íngu eumusheéngi byo? Kai ntí ngu wariká n'urisange ebió! Ina ani niri munkati ninu buri mukori.

²⁸«Banu ntímukunisiyanga mu ntambi y'emyereko yani. ²⁹Bushwa náncho, namábuninka eBwami ímbu bwakíangá hotu Tita wánininka bo, ³⁰kongo murisa n'iomu hima nani mu Bwami bwani. Na banu tu mukurikayo mu bitumbi by'ebami kongo muhukumuyo esangandá ikúmi na sibi s'eBaisiraeri.»

Yesu weré Petero mbu wasemutúna

(Matayo 26.31-35; Mariko 14.27-31; Yohana 13.36-38)

³¹Kuruma nampo, Yesu wére Simoni mbu: «eSimoni, Simoni! Rukira! Mushumbu* wamaninkwa ntambi y'eribufufura ebukianga emwea wafufurá engáno. ³²Ina namakuheme kongo utusii erisimira rabe kuri ani. N'entambi isekia ukuruká kuri ani, usakenga banakinu kongo báandira nguru mu risimira.»

³³Petero wámwire mbu: «eNyere kuritu, ani nasimira imánwa hima nabe n'ikwa hima nabe.»

³⁴Yesu wámusako mbu: «Nikwiréngi óngo Petero mbu runotu enchongore isebikira na nt'umakinda inítúna meta ashatu mbu ntíongonosi.»

Behe, kimbese na mbengé

³⁵Kuruma nampo, Yesu wáshísha ebanafunsi bae mbu: «Mbeni nakíángá nabutúma, banu nti tímuria behe, kimbese abe birato, mbeni kuri kikai charukwanga banu?» Nabo mbu: «Anga!»

³⁶Nae wére bo mbu: «Eo ke, kinsi ngu uri na karufaranga watingi ko, nǎngu uri na kimbese nae watingi cho, nǎngu usira mbengé wachúye enchangi yae kongo wachúra yo. ³⁷Nibwiringi mbu rakomenwa ebinwa bino binihieri imbi ebyaandikwa mu Kitabo Chashurukara mbu: «Uansirwange munkati n'ebabisha.»^b Íra, ebinwa biti mbi byanikae ani ngíe bíri kwihi n'ieya hende.»

³⁸Nampo, ebanafunsi bamwíre mbu: «eNyere kuritu, kaé, túri na mbengé sibi hano.» Nae wásako bo mbu: «Ae, múshirí mpo.»

Yesu wahema Ongo mu rou rw'eMiseituni

(Matayo 26.36-46; Mariko 14.32-42)

³⁹Yesu wátuka mpo, watárie mu rou rw'eMiseituni ímbu bwabesenga bukíanga ho we. N'ebanafunsi* bae bamutucha. ⁴⁰Warekia wameya ko, wére bo mbu: «Muheme kongo muhundusa emyereko.» ⁴¹Kuruma nampo, wíshíka kore kakeke nabo mu bwende ebwamuhieré mo ikoi ritawa na mwine, wákome emaru n'ihema mbu: ⁴²«eTita, kuba usasá, erusára runo rweminubo ino n'echei ro kore nani! Ina kiro byabunduke burí ebwashima ani, ina ebyashima óngo nge bikorwe.» [⁴³Nampo, maraika umǎ wátuka mu mbingu wéya kongo wámuninka maa. ⁴⁴Yesu wabesenga na koha nguru, nampo wabucha ihema ketu na maa. N'esantubano sabucha imutuka mo n'irara ekwansi burí matondi a nchama.]

⁴⁵Yesu wakíanga wamakinda ihema, wásimana n'ikuruka hari ebanafunsi* bae. Wákumana bo nti barere bushwa babesenga na bonso bwingi. ⁴⁶Wére bo mbu: «Mbeni banu murére bushwa nki? Musumuke na muheme kongo kiro mukime mu myereko.»

Eritingirwa ra Yesu

(Matayo 26.47-56; Mariko 14.43-50; Yohana 18.3-11)

⁴⁷Yesu wakíanga ukíri webange, hiha-hiha kikembe cha bea chamusaire nsisu. Yuta umǎ mu santumwa sae nge wasondorenga bo. Wákensere hari Yesu kongo wámukoke. ⁴⁸Ina Yesu wamushisha mbu: «eYuta! Mbeni mu rinikoke nge ranisibura mo óngo, ani eMwana w'eMwea*?» ⁴⁹Ebea

^b 22.37 Soma Isaya 53.12.



Yuta wasibura Yesu (22.47)

mbi babesenga hima na Yesu barekia basunga ebyasondanga isúngwa, bamushisha mbu: «eNyere kuritu, mbeni tukondae bo na mbengé?» ⁵⁰Hiha-hiha umă mubo wákera ekote kw'ekwabume kw'ekahungu k'emukwakare w'ebakuhani*. ⁵¹Ina Yesu wéba mbu: «Köko, burómbó!» Wátíngé mu kote kw'emwea o n'imuramya.

⁵²Nampo Yesu wére ebakwakare b'ebakuhani*, n'ebakwakare b'ebasura mbi ebarangangă eNumba ya Ongo*, n'ebakúngú mbi béyángá kămumína mbu: «Bushwa nki banu muniyere na mbengé hima na mihumbo buri ani mwibi? ⁵³Ematu ati nabesenga niri nĩnu mu Numba ya Ongo ina ntímunitingenga. Ina entambi ino nge yinu na ntambi y'emukwakare w'emwirimya.»

Petero watúná Yesu

(Matayo 26.57-58,69-75; Mariko 14.53-54,66-72; Yohana 18.12-18,25-27)

⁵⁴Kuruma nampo, ebea mbo batinge Yesu. Bakiangá bamamutinge, bamuria mu numba y'ekuhani mukwakare*. Petero wabesenga umisange bo kasando kihi na kare.

⁵⁵Barekia bêya, bákóya kashá munkati n'ebutara bw'ekuhani mukwakare, n'irika. Petero nae wêya kanyukara mu kashá hima nabo. ⁵⁶Mukori umă wamumína wásúnga Petero ntwarika kumushi n'ekashá. Ekikumi ncho chamusisirisira nguru n'ieba mbu: «Ewabume ngu nae uri rero hima na Yesu!» ⁵⁷Ina Petero wítuna n'ieba mbu: «Ōngo mămína, ntínosi emwea ngo!»

⁵⁸ Kuruma na ntambi nkeké, umpě mwea nae wásúnga Petero n'imwire mbu: «Na óngo hotu umă mu bo.» Ina Petero wásako emwea o mbu: «Etita, ani ntínimosi.»

⁵⁹ Kwakianga kwameta buna ntambi nima, umpě mwea wéba na kwimíma mbu: «Mu riíra, emwea ngu iwe nae wabésěyo hotu hima na Yesu, bushwa mbu iwe nae mwea w'echuo cha ku Ngariraya.»

⁶⁰ Ina Petero wámwire mbu: «Etita, ntínosi chebange óngo!» Wakíanga ukiri webange, enchongore yábikira nákubá. ⁶¹ Nyere kuritu wíkebera, wásindera Petero. Petero wásubukia ebinwa byamweréngá Nyere kuritu mbu: «Nikwiréngi óngo Petero mbu runotu enchongore isebikira na nt'umanitúna meta ashatu mbu ntíongonosi.» ⁶² Petero wátuka habutara na nt'urengi nguru.

Ebea basea Yesu n'imuhumba
(Matayo 26.67-68; Mariko 14.65)

⁶³ Ebea mbi babesenga barangange Yesu babesenga bamuseange n'imuhumba. ⁶⁴ Bamumína emeso n'imushisha mbu: «Tabura k'emwea ngu wamăkukaso!» ⁶⁵ Ibó bamurekérángá bímpe binwa bingi by'imukambaa.

Yesu warierwá ha Rüşhu rukiri rw'eBayuta
(Matayo 26.59-66; Mariko 14.55-64; Yohana 18.19-24)

⁶⁶ Ebutu bwakíángá bwamacha, ebakwakare b'eBayuta n'ebakwakare b'ebakuhani* hima n'ebahani b'eMyomba* bákúmánana mu Rüşhu rukiri rwabo. Nampo barisha Yesu mu makako ábó. ⁶⁷ Bamushisha mbu: «Eo twíri ke, mbeni óngo nge Kirisitu*?» Yesu wásubíe bo mbu: «Nakiro namubwire, mutunisimiri, ⁶⁸ na namubushishă kinwa mutúnisubii. ⁶⁹ Itukire enompena, ani eMwana w'eMwea*, mu ruharo rw'ekwabume rwa Ongo miné maa nge mwěnda karika ani.»

⁷⁰ Nampo ke, ebati bamushisha mbu: «Ngerieba mbu óngo ng'eMusike wa Ongo?» Na Yesu mbu: «Banu nge mumeba mbo!»

⁷¹ Mu rikindanya, beba mbu: «Ntí twirae túna mu mwea uti-uti ngu wamututúre emyasi y'emwea uno! Bushwa mbu twamakinda irukira bate bisine ebyameba we!»

Yesu warierwá kuri Pirato
(Matayo 27.1-2,11-14; Mariko 15.1-5; Yohana 18.28-38)

23 ¹ Kuruma nampo, ebea bati mbi babesenga ha nkumanano y'eRüşhu rukiri rw'eBayuta basímána n'iria Yesu kuri Pirato. ² Bakiangá bameya ho, babucha imusogere mbu: «Twamakumanyanya emwea uno nt'usheereshange ebea bitu. Werengi rero bo mbu kiro bendi

batuange tu ehoru kuri Kaisari, na webange tu mbu iwe kisine nge Kirisitu*, mwami.»

³Pirato wáshísha Yesu mbu: «Mbeni ōngo nge Mwami w'eBayuta?» Yesu wámusako mbu: «Ōngo ng'umeba mbo!» ⁴Nampo, Pirato wére ebakwakare b'ebakuhani* n'ekikembe ch'ebesa mbu: «Ntínasúngá kinwa nchi chamusingwa mbu emwea uno wáhukumiwe ikwá.» ⁵Ina bímíma nguru n'ieba mbu: «Emwea uno, ebinwa bihanange we ebea bisheerasha echuo kiti cha ku Yundea. Wákubúchie nabyo mu chuo cha ku Ngariraya, na nge uno wamaremba nabyo kúno ku Yerusaremu.»

Yesu warierwá kwa Herote

⁶Pirato wakíanga warukirá ebinwa mbyo, wáshísha mbu: «Mbeni emwea uno mwísa ku Ngariraya?» ⁷Wakíanga wamarukira mbu Yesu mwísa echuo nchi chabesenga chasimanirwa na Herote, wére bo mbu barie Yesu kwa Herote bushwa mbu erotu ndo Herote wabesenga uri ku Yerusaremu.

⁸Herote wabesenga urukiranga ho emyasi ya Yesu. Itukire kare nt'usondanga ho imúsúnga. Wabesenga uhunanga imúsúnga nt'uronjange bishisharo. Nampo ke wámoa nguru mu rimúsúnga. ⁹Washishirisha Yesu binwa bingi, ina Yesu ntwamusakonga. ¹⁰Ebakwakare b'ebakuhani* n'ebahani b'eMyomba* e babesenga mpo babesenga bákwmíma nguru mu ríhambike Yesu binwa bingi. ¹¹Herote n'ebasura bae babucha ikambaa Yesu n'imucharika. Bamumbaricha nchangi inji yabesénga yakomá nguru, nampo Herote wámukurucha tu kwa Pirato. ¹²Herote bána Pirato babesenga barénda, ina itukire erotu ndo bábése bamwíra na mwíra.

Pirato wakerá erubansa rwa Yesu mbu wáshurwe

(Matayo 27.15-26; Mariko 15.6-15; Yohana 18.39—19.16)

¹³Pirato wábikira ebakwakare b'ebakuhani* n'ebampe bakwakare hima n'ebesa. ¹⁴Wére bo mbu: «Mumanirishíé emwea uno mbu usheereshange ebea. Namámushisha mu makako inu bushwa n'ebinwa mbi byamamusongere banu, ina ani ntínasúngá kiro na kinwa kimá chema mu'mbi ebyamamusongere mo banu. ¹⁵Herote nae ntíwasunga kinwa chema kuri we nge chasingwa wamatukuruchie tu we. Kai emwea uno ntwákukora kinwa chema inchi chamusingwa wáshurwa. ¹⁶Kai naseninkana ho momba bamurase tushushu, kuruma nampo nasemwobora.» [17Mu kirotu rukiri rw'ePasaka, Pirato wabesenga wobórenga bo mwea umá ituka mu mwiýóró.]

¹⁸Ina ebea bati bakúa mongo mbu: «Shúră emwea uno, ina twoboreri Baraba!» ¹⁹Baraba ngo waminwangá bushwa n'eburúngá mbu bwabesenga

mu rubungu, na kwákwa mwea. ²⁰ Mu rííra, Pirato wabesenga uhunange ibora Yesu. Wéba tu kasa n'ebea. ²¹ Ina ebea babesenga bakúange mbu: «Mútúndíke mu musaraba, mútúndíke mu musaraba!»

²² Pirato wáshisha tú bo r'emeta ashatu mbu: «Mbeni emwea uno wákukora kinki chema? Ani ntínasunga kiro kinwa kimá chema nchi chamusingwa washurwa. Kai naseninkana ho momba bamurase tushushu, kuruma nampo nasemwobora.»

²³ Ina bákúá ketu nguru n'ieba mbu Yesu wátúndikwe mu musaraba. N'emirenge yábo yáhundusa Pirato. ²⁴ Nampo, Pirato wásúnga nti rakoma waronjei bo ímbu ebuhunange bo! ²⁵ Wóbore bo Baraba ngu waminwangá bushwa n'eburúngá mu rubungu n'erikwa r'emwea.

Ebasúra batúndika Yesu mu musaraba

(Matayo 27.32-44; Mariko 15.21-32; Yohana 19.17-27)

²⁶ Ebasúra barekia bendange na Yesu, bakúmana wabume umá mbu nge Simoni wa mu rubungu rwa ku Kurene na nt'utukange ekwishwa. Bamuriesha emusaraba wa Yesu, n'imwire mbu wamumise kuruma.

²⁷ Bea bingi babesenga básiere Yesu kuruma. Mubo, habesenga hotu bamína bingi baréngi na bonso bwingi bushwa nae. ²⁸ Yesu wíkebera kuri ebamína n'iere bo mbu: «Banu bamína ba ku Yerusaremu, kiro murire bushwa nani! Ina mwírírí banu bisine n'ebána binu. ²⁹ Bushwa mbu mu matu ngi eyange, ebea básebayo mbu: «Esangumba, námbi bátangabútanga, n'ebátangaríshanga bána mabere, nge bakasanirwá!» ³⁰ Mu matu ngo, ebea basêréyo esângu mbu: «Mútúsúrukí!» N'íire esantata mbu:

«Mútúsíkí.»^a


³¹ Bushwa mbu kuba baronjee emuti múbísi mbo, ngyâbere hání emuti wakama?»

³² Ebasúra barishángá tú babisha bábí kongo báshura bo hima na Yesu. ³³ Bakiangá bameya mpi habikirwangá mbu «Kahangasi», bátúndika Yesu mu musaraba. Bátúndika hotu n'ebabisha mbo, umá ekwabume kwa Yesu n'eumpě ekurembe kwae. ³⁴ [Yesu wéba mbu: «E'ita, sasírá bo bushwa mbu ntíbosi ebikorange bo.»]

Mu risonda ibanya esanchangi nsi sabesenga sámbara we, ebasúra bárekera mishari ekwansi kongo básiba emuhango wa kira mwea.

³⁵ Ebea babesenga bákusimana mpo nti bákaengi. Ebakwakare b'eBayuta babesenga bamuseange na nti bebange mbu: «Wákushukayanga bampe, wíshukaye ke nae, kuba iwe ho nge Kirisitu* ngu warondorwanga na Ongó!»

^a 23.30 Soma Osea 10.8.



Yesu watundikwa mu musaraba (23.33)

³⁶Ebasura nabo babesenga bámúseange. Bákensere kwihi nae n'imuninka ndifai eyashubuka, ³⁷bamwĩre mbu: «Kuba ōngo nge Mwami w'eBayuta mu rĩira, ishukáye mpo ōngo kisine!» ³⁸Na hambasiro n'emuntwe wae habesenga haandikwa buno mbu: «Uno nge Mwami w'eBayuta.»

³⁹Umã mu babisha mbi bátundikwángá mpo, wabesenga umucharikange mbu: «Mbeni ntĩ ōngo nge Kirisitu*? Ishukáye ke, na bate hotu tushukaye!»

⁴⁰Ina eumpe wáfine míné n'ieba mbu: «Mbeni ōngo ntũsubahá Ongo nakiro mbu umahukumiwa hima n'emwea uno? ⁴¹Bate bábĩ twahukumiwa itukana n'ebibĩ byakoranga bate. Ina emwea uno usira bubĩ buti-buti bwakukora we.»

⁴²Kuruma nampo, wéba mbu: «eYesu, anginobya mu ntambi isekurukayo ōngo kasimanire ebea mu Bwami bwabe!» ⁴³Yesu wamusubie mbu: «Mu rĩira, nikwiréngi mbu runotu hona ukũbése hima nani mu Paratiso.»

Erikwa ra Yesu

(Matayo 27.45-56; Mariko 15.33-41; Yohana 19.28-30)

⁴⁴⁻⁴⁵Rakianga rarengeka buna ntambi mutuba sa mumwishi, emwishi wárima. Emwirimya wírasa ekwansi mu chuo kiti ieya na mu ntambi

mwenda. Enchangi nji yabesénga irembengi mu Numba ya Ongó* yábereka bebe bíbí.^b ⁴⁶Nampo, Yesu wákua mu murenge mukiri n'ieba mbu: «eTita, natereka emutima wani mu mine yabe.» Wakíanga wamahea ieba ebinwa mbyo, wákera emutima.^{ch}


⁴⁷Emukwakare w'ebasura ba ku Roma wakíanga wamasunga ebyameta, watata Ongó n'ieba mbu: «Íira, emwea uno wabesenga w'íira!»

⁴⁸Ebea bati mbi beyanga kakae, bákúruka nti bikaso-kasongi mu bukuba bushwa n'ebónso. ⁴⁹Ebati mbi babesenga bosí Yesu n'ebamína mbi babesenga bámutindikia itukire mu chuo cha ku Ngariraya, babesenga bakusimana kore mu risúnga mbu bwabesenga bwetange ebinwa bití mbyo.

Eritawa ra Yesu

(Matayo 27.57-61; Mariko 15.42-47; Yohana 19.38-42)

⁵⁰⁻⁵¹Kwabesenga mwea umă mbu nge Yosefu w'erubungu rwa ku Arimatayo, mu chuo cha ku Yundeá. Yosefu ngo wabesenga murongu na mwea waombokara. Wabesenga urindirengi eBwami bwa Ongó* bweye. Wabesenga tu umă mu bakwakare b'eRüşu rw'eBayuta. Ina iwe ntwákimenga mu nama ya banachabo y'erishura Yesu. ⁵²Yosefu ngo wênda kuri Pirato n'imukonga ekínda cha Yesu. ⁵³Kuruma nampo, wéba mbu bahiche cho. Wábiririre cho enchangi na wataa cho mu risinda



Yesu warierwa murisinda (23.53)

^b 23.44-45 Enchangi njo yabesénga yabanyá mpi hashurukara nămpi hashurukara nguru mu Numba ya Ongó. ^{ch} 23.46 Soma Saburi 31.6.

rûmbwa shu mu ukanga rukiri. Kusira mwea uti-uti ngu wabesenga wamatáwanga mu ro. ⁵⁴Ebiti mbyo byetángá otu rwa asanu, n'eSabato* nti ngié iri kabucha.

⁵⁵Ebamína mbi babesenga batindikiange Yesu itukire mu chuo cha ku Ngariraya, bámísa Yosefu. Basúnga erisinda nǎmbu bwaterekangá bo mo ekínda cha Yesu. ⁵⁶Kuruma nampo, bákuruka n'itunganya mafuta na marashi erisingo ekínda. Erotu rw'eSabato*, báruhuka itukana n'ebwébá eMyomba.

Yesu wafuká

(Matayo 28.1-10; Mariko 16.1-8; Yohana 20.1-10)

24 ¹Erotu rw'eriinga muranga-ranga, ebamína mbo baramuke hisinda nti báhátá emarashi ngi atunganyangá bo. ²Bakiangá bameya ho, bákúmána erikoi rikiri ndi rabesenga raribia erubi rw'erisinda nti ramashíkwá kore n'erísinda. ³Bákíme kumunda n'erísinda, ina ntíbakumanangá mo ekínda cha Nyere kuritu Yesu. ⁴Nampo bárúkwá busekía bo. Hiha-hiha, kumushi nabo hasúngwa babume bábí nti bambara nchangi sisanángé nguru. ⁵Ebamína batingirwa na böba nguru, nabo bindamya emintwe yábo ekwansi. Ina ebabume mbo bere ebamína mbu: «Bushwa nki banu musondekanyange mwea ngu ushére munkati n'ebakwi? ⁶Iwe usira tu hano, wamafuka! Musubukianga ebwabwirenga we ntúkiri mu chuo cha ku Ngariraya. ⁷Wabwirenga mbu iwe eMwana w'eMwea* rakomenwa wasiburwe mu bea b'ensambi. Wabwirenga tu mbu wasetundikwa mu musaraba, ina wasefuka kuruma na matu ashatu.»



Ebomina h'isinda ra Yesu (24.5)

⁸Nampo, ebamína mbo basubukia ebinwa byebanga Yesu. ⁹Batuka hisinda, benda kature ebinwa mbyo kuri esantumwa ikúmi na nima na kuri ebampe banafunsi. ¹⁰Ebamína mbi batúrérngá esantumwa* ikúmi na nima emwasi nge bano: Maria wa ku Makitara, Shani na Maria nina wa Yakobo, hima na bampe bamína. ¹¹Ina esantumwa ntísasimiranga emwasi ngo, báhaká mbu binwa bya busa-busa. ¹²Ina Petero iwe wásimana

n'ienda hisinda nt'ukanyahange. Warekia wěya ho, wíndama n'irungurira kumunda erisinda, ina wákumana ho emirémbe y'enchangi njo, wákuruka kukwae na nt'ushisharange mũmbi ebyakweta.

Yesu wasáírē ebanafunsi bae bábí mũnse ya ku Emausi

(Mariko 16.12-13)

¹³ Erotu ruro-ruro ho, kai banafunsi bábí ba Yesu babesenga bendange mu rubungu rwa ku Emausi, ubungu ndu rwabesenga ruri mu biometere buna ikúmi na kimă na ku Yerusaremu. ¹⁴ Babesenga bashambarange bushwa n'ebinwa mbi byakweta. ¹⁵ Barekia bakiri bebange n'ishishana, Yesu wisine wákumana bo n'imisanya nabo mongo. ¹⁶ Bábēsenga bamusungangé ina emeso ábó abumbirwangá kongo batamuteereri. ¹⁷ Yesu washísha bo mbu: «Banu mwendange n'ishambara binwa nki?» Batindira na nti bárí na bonso mu mitima yábo. ¹⁸ Umă mubo wabikirwá mbu Kireopa wámusako mbu: «Kai mu bea bati bárí rero ku Yerusaremu ōngo kisine ho nge nt'fongosi ebinwa byakweta ko mu matu abi ano?» ¹⁹ Yesu wáshísha bo mbu: «Mbeni binwa nki?» Nabo mbu: «Ebyakusunga Yesu wa ku Nasareti. Wabesenga mutahwa* na nti ũri na maa mu rieba na mu rironja ebishisharo mu makako a Ongo na kuri ebea bati.

²⁰ «Ebakwakare bitu b'ebakuhani* hima n'ebampe bakwakare bitu, bamusibura kongo wakererwa ubansa rw'ishurwa. Nampo bamutũdika mu musaraba. ²¹ Twabesengá twamămwinyihire mbu iwe ngwasêshukayáyo eBaisiraeri. Kai, ōho! Na runotu ngé matu ashatu ebinwa mbyo byeta. ²² Na bamína bimă ba mu kikembe kitu baktutushishaya. Bámukéyo hisinda, ²³ ina nt'basungayo ekĩnda chae. Bákurukăyo n'itwĩre mbu ebamaraika* bakusaire bo nsisu n'iere bo mbu Yesu munkangwe. ²⁴ Banakitu bimă hotu bëndáyo hisinda, nabo basungayo ebikai bitu ímbu bwakukianga ebamína bere bo. Ina nabo nt'ibakusunga ekĩnda chae.»

²⁵ Nampo Yesu wére bo mbu: «Banu birunge! Banu mutusibanga tete ebinwa byébangá ebatahwa*! ²⁶ Mbeni nt'irakomenwa rero mbu Kirisitu* wasunge minubo kubusondori n'erikime mu busimé bwae?» ²⁷ Ngerikia ke Yesu wánsomsomore bo ebiti byaandikwángá kuri we mu Kitabo Chashurukara cha Ongo. Wabuchie mu bitabo mbi byakíangá Musa waandika, n'yere mu bitabo bitu by'ebatahwa.

²⁸ Bakíangá bábungurengí erubungu rwendange mo ebanafunsi bábí mbo, rasúngwa buri Yesu iwe usondángo ienda kore, ²⁹ ina ebanafunsi mbo bámuhema warike nabo bushwa mbu abesenga ngé murisisi n'ebutú nti bwamasiro. Nampo wákime mu numba n'irika nabo. ³⁰ Entambi Yesu wakíanga ũrisange nabo, wátíngē mukati, watata Ongo. Wánoa o n'ininka

bo o. ³¹Nampo ke emeso ábó óboka, nabo bámuteerera ke. Ina hiha-hiha, Yesu wáriribana mu meso ábó. ³²Babucha ishíshana mbu: «Íra! Etambi yebange rero we nitu mu munse n'itunsosomore eMitiro Yashurukara, emitima yitu yakubesenga ntyamarisa ngo!»

³³Hiha-hiha básímána n'ikuruka ku Yerusaremu. Bákúmána esantumwa ikúmi na nima hima n'ebampe banafunsi himpi habesenga hatumána bo ³⁴nti bebange mbu: «Íra, Nyere kuritu wamafúka! Simoni wákumusunga!» ³⁵N'ebanafunsi bábí mbo nabo bature babine ebyakusungangá bo mu munse, nāmbu bwakúkíanga bateerera Yesu entambi nji yakunoanga we emukati.

Yesu wishéá kuri ebanafunsi bae

(Matayo 28.16-20; Mariko 16.14-18; Yohana 20.19-23;

Mikorere 1.6-8)

³⁶Ebanafunsi bakiangá bakírí bebange mu binwa mbyo, Yesu wisine wísaisha munkati-nkati nabo, n'iere bo mbu: «Mubesi na buhóro!»

³⁷Bisarima na bátingirwa na kóha, bahaká mbu batíngwá na kifwasi. ³⁸Ina Yesu wére bo mbu: «Bushwa nki mumakwa bóba? Bushwa nki banu munitikatikange? ³⁹Mukai emine n'ebisando byani: mu riíra, ani nge uno! Múningi mo, na muníkai; bushwa mbu ekifwasi kítarikanga na mununku n'ikúá, ina ani niri nabyo ímbu bunisungange banu.»

⁴⁰Wakíanga ukírí webange mbo, wáshéa bo emine n'ebisando byae. ⁴¹Ebanafunsi mbo babesenga ntíbasimira nensi ebinwa mbyo bushwa n'esangoa n'erishishara. Nampo ke Yesu wáshísha bo mbu: «Mbeni banu muri na bió hano?» ⁴²Bámuninka chunda kimá cha kikwa chahwa. ⁴³Wátíngé cho n'irísa cho mu meso ábó. ⁴⁴Kuruma nampo wére bo mbu: «Ematu abesenga ani nínú, nabwirengá mbu ebinwa bití byaandikwángá bushwa nani mu Kitabo ch'eMyomba na mu mbi by'ebatahwa*, na mu kitabo ch'eSaburi, byakomenwa bití bíberereré.»

⁴⁵Nampo ke Yesu wóbora bo emyanikiri kongo bateerera ebwaandikwa eMitiro Yashurukara. ⁴⁶Wére bo mbu: «Raandikwa mbu Kirisitu* wahwa inubiwa, na wasefúka munkati n'ebakwi kuruma na matu ashatu.^a ⁴⁷Na mu rina rae nge basehubiri ebea bati mbu báreki esansambi sábó kongo basasirwa to. N'emurimo ngo ubuchíí ku Yerusaremu. ⁴⁸Banu ngi mwendi mutúránge ebiti mbi byákusúngangá banu. ⁴⁹Munirukiri, naséburebeka echakianga Tita waburaa. Ina murike kasa ku Yerusaremu ieya n'erotu rwaseshééyo banu emaa ngi asetuka mu mbingu^b.»

^a 24.46 Soma Isaya 53; Osea 6.2. ^b 24.49 Soma Mikorere 1.4-5.

Yesu wendá mu mbingu

(Mariko 16.19-20; Mikorere 1.9-11)

50 Kuruma nampo, Yesu wênda nabo kwihi n'erubungu rwa ku Betania. Nampo wáría emine yae kwiyo n'ikasane bo. **51** Warekia ukiri ukasanengi bo, wasia bo n'itarishwa mu mbingu. **52** Ina ibó bîndama mu makako ae, kuruma nampo bákúruka ku Yerusaremu na ngoa ningi. **53** Babesenga bárikangă mu Numba ya Ongó* ematu ati nti bamutatange.



Yesu watayá mu mbingu (24.51)

Ebinwa bishasha mu Kinyanga

Bafarisayo Ibo kikembe kimă cha Bayuta mbi babesenga bifunsangă nguru emyomba nji yakianga Ongo wáninka Musa. Babesenga bebangă mbu ebea bati bakomenwa imísa emyomba njo. Ina ibó babesenga batáríkangă mu yo ekutime yăbo na nti bahanangă yo ebea. Bingi mubo babesenga bea ba ngari na bea bakwitundurika kuri bampe (Mariko 7.1-13).

Bahani b'eMyomba Ibo nge bea imbi babesenga bifunsangă, n'insonsomora, n'ihana emyasi yaandikwa mu bitabo by'eMyomba ya Musa.

Barawi Babesenga bea babútwa mu ruanda rwa Rawi, b'ekisasa cha Isiraeri. eBarawi nge babesenga bariangă esanduku y'erirai, na nge baninkwangă hotu emurimo w'erisake ebakuhani mu Numba ya Ongo ku Yerusaremu (Ituka 10.8).

Basandukayo Ibo kikembe kimă cha Bayuta mbi babesenga bamisangă ebinwa bya Ongo na nti bahanangă byo ebea. Ina ibó babesenga bebangă mbu kusira ifuka (Ruka 20.27-38). Babesenga bebangă hotu mbu kusira bamaraika abe kikai kiti-kiti nchi kitasúngwanga mu meso ebea. Mu Rirai Rishasha, eBafarisayo n'eBasandukayo basungwa buri bea mbi babesenga bengangă ebinwa mbi byabesengă bihanange Yesu.

Bwami bwa Ongo, Bwami bwa mu mbingu Ebinwa mbyo byeba kinwa kimă mbu Ongo nge Mwami. Ina bushwa mbu eBayuta babesenga bahangirwa ishembra erina ra Ongo, kicha nge chasingwangă Matayo waandika mbu "eBwami bwa mu mbingu" kurá ieba mbu "Bwami bwa Ongo". Ongo ngwasimanire ebiti by'echuo na bya mu mbingu. Ebinwa mbyo byashéa mbu ebwami mbo ngié buri mu chuo itukana n'erieya ra Yesu rae raroso hano hansi, n'itukana n'ebyakoranga we (Matayo 12.28; Ruka 7.28; 8.1). Ina ebwami mbo bwashiwa buri kikai nchi kiseyayo mu rotu rwa hende (Mariko 9.1; Ruka 22.30; 1Bakorinto 6.9-10; 15.50).

Kuhani Iwe wabesenga mwea íngu wasimanire murimo mu Numba ya Ongo. Wabesenga tuna mwea w'eriria ebihembo mbi byarishiwa n'ebeta mu makako a Ongo n'iebere bo.

Maraika eRirai ra Karekare n'eRirai Rishasha ashea mbu ebamaraika ng'esantumwa sendangă katura emyasi nji yatúmwá bo na Ongo (Ntangiyo 3.24; Matayo 4.6). Ina eRirai Rishasha rashea tu mbu kurikanga bamaraika ba Mushumbu (Matayo 25.41).

Masia, Kirisitu Mu mwebe w'eKieburania, "Masia" ngerieba mbu íngu wamasingurwa mafuta mwironja murimo. Wamubese kuhani abe mwami. Mu mwebe w'eKikiriki, "Masia" wabikirwá mbu "Kristos". Himpo nge habuchiénga erina ra Kirisitu. Ebatahwa bebánga bushwa na rukombora uma ho w'ííra. Bebangá mbu wasebseyo wa mu kisasa ch'emwami Ndauti. Wasebeseyo mwami, na iwe ngwasekomborayo Baisiraeri n'ikuruchie bo ebwami bwábó (Isaya 61.1; Ruka 4.16-21).

Mushumbu Mu ntangiyo, erina ra Mushumbu rabesenga rininkwanga mwea ngu usongerengi bampe ekumaturubinari. Kuruma nampo, Mushumbu wabikirwá mbu nge mukwakare w'ebifwasi, murenda wa Ongo. Bamubikira hotu mbu mushuanyi, mubí na mukwakare w'echuo kino (Sakaria 3.1-2; Saburi 109.6; Yubu 1.6).

Mutahwa Iwe mwea ngu uninkwange myasi na Ongo, ituka mpo nae ntwenda kature yo ebea. Ina mu Bibiria murikire bampe bea mbi babesenga bibikirangă mbu batahwa na nti tibakutúmwá na Ongo (Mikorere 13.6-12).

Mwana w'eMwea Yesu wisine wabesenga wibikirange mu rina ndo mwishea mbu nakiro mbu iwe Ongo, ina iwe hotu mwea (Ruka 5.24). Rashea hotu ebunakima bwa Yesu n'ebeta imbi beyanga kashukaya we (Ruka 19.10). Wabesenga wibikirange hotu mbu Mwana w'eMwea kongo ebea nensi batasibi mbu iwe nge Masia (Mariko 8.29-33). Erina ndo rashéa hotu erikwihicha rae (Ruka 9.58; Mariko 8.31) n'ebusime bwae hende echuo (Matayo 25.31; Mariko 8.38).

Mwanafunsi Iwe mwea ngu umisange muhani mwirukira emahano ae. Mu Rirai ra Karekare, Ongo wabikirwá mbu Muhani (Isaya 54.13). Mu Rirai Rishasha hotu, meta mingi Yesu wabikirwá mbu nge muhani (Matayo 22.16; Ruka 8.24). Ebati mbi barimusimira n'imumisa babikirwá mbu banafunsi (Ruka 14.26-27).

Ndifai Iyo mau ngi atunganyiwangă ituka mu byuma by'emuti w'emusabibu.

Ntumwa Iwe mwea ngu watúmwa na Yesu. Yesu warondoranga mu banafunsi bae bea ikumi na bábí mbu bëndi bebange mu rina rae. Warondoranga bo mbu bamumise, barukire emahano ae n'itura emwasi w'eBwami bwa Ongo (Mariko 3.13-19). Yesu wakianga wamafuka, esantumwa samusunganga. Na mu rotu rw'ePentekosite, Yesu waninkanga bo emaa eMutima Washurukara. Watúmanga bo kature emwasi mbu bakumusunga ntwamafuka na katura eMwasi Wakonda mu chuo kiti. Kuruma n'erotu rw'ePentekosite, Yesu wásaire Sauri, ngwabikirwa tu mbu Poro, n'imubikira mbu wabesi nae hotu ntumwa yae (1Bakorinto 9.1; Bangaratia 1.1).

Numba ya Ongo Iyo yabesenga numba nkiri nji yimbwángá mu rubungu rwa ku Yerusaremu. eBaisiraeri babesenga batingengã yo buri burikí bwa Ongo hano hansí. Mu numba njo, mwabesenga murikanga buarí mbu bwashurukara impi habesenga hakorengã ebakuhani emurimo wábó kira otu. Mwabesenga hotu Buari mbu bwashurukara nguru impi habesenga hakimengã ekuhani mukiri rima mu mwáka, na nti wahátá nchama ya nyama nji yasiburwa n'ebéa kuri Ongo bushwa n'erisairwa esansambi sábó. Habesenga hotu na butara imbu bwabesenga burikangã mo bea bampe.

Pasaka Iyo otu ruma mu matu makiri eBayuta. Baisiraeri babesenga barisangã ePasaka mu rikandira mbu bwatukanga bo mu bukobé mu chuo cha ku Misiri (Isubukia 16.1-8). Mu bakirisitu, ePasaka yasubukia erikwa n'erifuka ra Yesu murikombora bo (Ruka 22.1-23).

Sabato Iyo nge rotu rw'emeta arinda rwa mu riinga r'ekarandirie k'eBayuta. Erotu ndo rubesenga otu rw'ikandira bwakianga Ongo waruhuka muribúmba ebikai biti. Rubesenga hotu otu rw'iruhuka n'itata Ongo (Ituka 20.8-11). eBayuta babesenga bárikingã na myomba yashéá ebikai imbi byahangiswa ikora mu rotu ndo. Na mu biranga bya Yesu, eBayuta babesenga bakumananangã erotu rw'eSabato mu masinangoki kahema n'isoma eMitiro Yashurukara (Ruka 4.16).

Samaria Icho chuo kírí munkati n'echuo cha ku Ngariraya na cha ku Yundeá. Bísá ku Samaria babesenga barisiangã ho ebitabo bisanu mbi byaroso bya Musa. Babesenga batarisianga emyomba iti y'eBayuta. Bingi mubo babesenga batabingánga Bayuta. Ebiti mbyo byashéá mbu kwabesenga burenda munkati eBasamaria n'eBayuta. eBayuta babesenga bánéangã eBasamaria na nti batashimanga ikoane nabo (Ruka 10.25-37; Yohana 4.1-42).

Sinangoki Iyo yabesenga numba yumbwanga n'eBayuta mu kira ubungu. Kumunda n'enumba njo nge mwabesenga muhemerenga bo Ongo, isoma ekinwa chae, ihubiri n'ihana cho kuri bampe bea.

